


ҲАСАНБОЙ ҒОЙИБ

Ҳаёт Беланчаги



Душанбе
«Андалеб Р»
2016

ББК 84 тожик 7-4
F-72

Мухаррир
Сайфиддин Қараев

Ҳасанбой Ғойиб.

Ҳаёт беланчаги. – Душанбе: «Андалеб Р», 2016.
- 288 бет.

Ҳасанбой Ғойибнинг шеърлари мавзу, оҳанг, тасвир ва ифода услуби билан ўзига хос жиҳатларга эга. Шеърдан шеърга фикр ва туйғулар тасвирининг ранго-ранг баёни эркин парвоз этар экан шоир руҳий оламини янада ёрқинроқ очиб боради. Шоир ижоди яна шуниси билан аҳамиятлики, унда эзгулик, муҳаббат ва ҳақиқат тушунчалари устувордир.

ISBN 978-99975-50-30-9

© Ҳасанбой Ғойиб, 2016.

*Ўлмас Жамол,
Тоҷикистон Республикаси Ёзувчилар
Иттифоқи ўзбек бўлимининг бошлиғи*

УМИДЛИ ҚАЛАМ СОҲИБИ

Ҳасанбой Ғойибнинг илк поэтик асарлари билан матбуотда танишиб, яхши бир қалам соҳиби етишиб келаётганидан хурсанд бўлган эдим. Бугун унинг анчагина шеърларини ўқиб чиқиб, ўшанда хато қилмаганимни англадим. Ҳасанбойнинг дунё воқеаларига, инсон зотининг кўп қиррали туйғулари чексиз оламига нисбатан ўз қарашлари ва муносабатининг эҳтирос билан қаламга олиниши кишини бефарқ қолдирмайди.

Ижодкор сифатида унинг яна бир фазилати шундаки, чайналиб кетган, ҳаммага таниш бўлган бадиий воситаларни чеклаб ўтишга, танҳо шоирнинг ўзига хос бўёқларни топиб фикрини ифодалашга уриниш кўзга яққол ташланиб турибди.

Буюк сўз устаси Лев Толстой айтганидек, чинакам санъаткор ўз қалбида туйган ҳаёт қувончларини ҳам, унинг алам-изтиробларини ҳам шундай тасвирлай олсинки, уни кўрган томошабин ва ёки ўқувчи хонанда ҳам худди ана шу туйғуни ўз қалбида ҳис этсин. Ҳасанбой адабиётнинг олдига қўйилган ана шу талабини чуқур ҳис этиб, ижод оламига кириб келаётгани унинг келажагига умид билан қарашга асосдир.

2002 йил.



*Иброҳим Усмонов,
Тоҷикистон илм ва техника арбоби*

КАМОЛОТ ФАСЛИ **(«Уйғониш фасли» китобига сўзбоши)**

Иқтидорли шоир Ҳасанбой Ғойиб ўзининг янги шеърлар тўпламини «Уйғониш фасли» деб атабди. Уйғониш фасли инсон балоғати ва камолотининг рамзи, замоннинг яхши-ёмонини англаши ҳамда қадрлашидир.

Уйғониш фасли ижодкорнинг маънавий тараққиёт босқичидир. Мазкур тўплам шеърларини ўқиб, мулоҳаза қилар экансиз, шоирнинг том маънода уйғонганлигини, қаламининг ўткирлашганини, сўзларининг дардчил, санъати ранг-баранг, шеърлари равон ва жозибали бўлганлигини ҳис этасиз.

Шеърларида тасвирланган меҳр Ватан, халқ, она қадри мадҳидан келиб чиқадиган устувор меҳрдир. У мазмунли ва жозибали жилоланади. Бу меҳр чин юракнинг самимий меҳридир. Бу нафақат ижод, балки Ҳасанбойнинг ўзлиги ва самимияти ҳамдир.

Ҳасанбой Ҳисор водийсининг фарзанди. У шундай ҳаводан нафас олганки, бу ҳаво Мирзо Турсунзода, Носиржон Маъсумий сингари буюқларнинг ҳам димоғини муаттар қилгандир. Маҳмуд Тўлқин, Ўлмас Жамол, Зайниддин Дўстматов ва Қосимжон Мамажоновлар ижод қилган лафзда ёзади.




Ҳасанбой қайси тилда ижод қилмасин Тожикистоннинг гўзаллиги ва улуғлигини куйлайди. «Кимки Ватанни севса, Ватан ҳам уни севади»-дейишлари бежиз эмас.

Тилагим шу, Ҳасанбой! Сиз-Ватан ошиғи. Кошонангиз гулистон, шеърларингиз дилрабо бўлсин!

2004 йил, Душанбе шаҳри.





I

Юрагимга туташган Ватан!



- *Ватан меҳри*
 - *Икки эл муҳаббати*
 - *Тоҷикистон*
 - *Рози дил*
 - *Тоҷик тили ҳақида*
 - *Байрогимиз мадҳи*
 - *Ватан васфи*
 - *Ҳисор қалъаси қошида*
ўйлаганларим
 - *Ватан*
 - *Ватаним*
 - *Тоҷик элим менинг*
 - *Тавалло*
 - *Тоҷик тили – назм тили*
дейдилар
 - *Шу Ватанда*
 - *Фахр*
 - *Шукрона*
 - *Юрагимга туташган Ва-*
тан!
 - *Муборак онлар*
 - *Ниятинг – йўлдошинг*
 - *Сурурбахш келажак истай-*
ман
 - *Ватан ифтихори*
 - *Обод Ватанда озод яшашни*
насиб этсин
 - *Орияти бор бўлган одам*
 - *Икки тилли бир миллат*
 - *Фидойилар қушиги*
 - *Тинчлик куйчиси*
 - *Ватан обод*
 - *Ватан аجدодлардан*
 - *Меҳри дарё*
 - *Аҳиллик ҳам ибодатдир*
 - *Йигит бўлса*
 - *Она шаҳримга*
 - *Тоҷигу ўзбекча ширин шева-*
си
 - *Богбонда*
 - *Хатлонзамин*
 - *Чилламазор*
 - *Чилламазорда ёзилган шеър*
 - *Толбулоқ*
 - *Ширкент дарёсига*
 - *Яхшиобод мадҳи*
- Шеърҳои ба тоҷикӣ***
навиштаи муаллиф
- *Ба хотираи устод Лоиқ*
 - *Дўстон, як осмон дорем бас*
 - *Ифтихор*
 - *Ширу шакар*
 - *Баҳори сулҳ*
 - *Борони умед*
 - *Мухаммас*



ВАТАН МЕҲРИ

Киндик қони томган макон олдида
Бурчин бажармоғи керакдир инсон.
Гўзал диёримиз Турсунзодага
Янги китобимни этдим «Армуғон».
Аммо қарзим кўпдир она ватандан
Ҳали улгурмаган ишларим бисёр.
Ватан меҳри дилга сингиган ондан
Англадим - умримда мазмун-маъно бор.
Мен яхши биламан энди кимлигим
Дилларга яхшилик улашгувчиман.
Эзгулик элчиси - дўстлик жарчиси,
Ёмонликка қарши курашгувчиман.
Ҳар кун бир учрашув режамда мавжуд
Мавзу тинчлик, бирлик, дўстлик, ободлик.
Ҳар гал одамлар-ла сўзлашар экан
Дилимда жўшади илҳом ва шодлик.
Кўп доно зотларни, мард инсонларни
Учратдим, тингладим ва сабоқ олдим.
Одамлик номига лойиқ, муносиб
Инсонларни кўриб ҳайратда қолдим.
Раббим! Холиқ ўзинг, Молик ўзингсан,
Яширин сирлар ҳам ўзингга аён.
Одамдек яшашни истаган зотман
Муродим ҳосил қил, йўлимни равон!

03.10.2015 йил.



ИККИ ЭЛ МУҲАББАТИ

Шоир бўлиш ёшлигимдан орзум бўлди,
Ёзганларим ўз дардларим, арзим бўлди.
Назар солсам эл ҳам менга дарддош экан,
Эл дардини куйлаш олий қарзим бўлди

Улуғ бахтни насиб этди менга ҳаёт,
Икки элнинг муҳаббати бўлди қанот.
Гоҳ ўзбекча, гоҳ тожикча тилда баёт,
Куйлаб яшаш менинг ҳаёт тарзим бўлди.

Меҳмон бўлдим Хужанд, Хатлон, Бешкентларда,
Мухлис пайдо қилдим шаҳар ҳам кентларда
Шеърим кўшиқ бўлди ҳатто Тошкентларда
Дўстлик ипин боғлаш менинг фарзим бўлди.

Юрагимда туйғуларим сувдек зилол,
Қутлуғ бўлсин икки элга ҳур истиқлол!
Бири қуёш бўлса, бири менга ҳилол,
Икки элнинг мадҳин куйлаш қарзим бўлди.

20.21.2011



ТОЖИКИСТОН

Ваҳдат куйи таралган юрт, Тоҷикистон.
Эй, меҳнатдан ҷаралган юрт, Тоҷикистон.
Ҳамдиллигу яғоналик шиоримиз,
Олам аҳли тан олган юрт, Тоҷикистон.

Ҳаёт асли синовлардан иборатдир,
Тинч ва тотув яшамоқ ҳам саодатдир.
Қутлуғ бўлса кўнгилдаги орзу, ният,
Рӯёби ҳам Яратгандан башоратдир.

Бугун элнинг юрагида яшар тинчлик,
Қатта-кичик тилагида яшар тинчлик.
Яқдиллик ҳам элнинг буюклигин рамзи,
Мард ўғлонлар билагада яшар тинчлик.

Эй она юрт, кўрай бахту камолингни,
Аллоҳ асло кўрсатмасин заволингни,
Тоҷикистон, мағрур янграар қутлуғ номинг,
Ватан аҳли кўрсин ёрқин жамолингни.

16.02.2010 й.



РОЗИ ДИЛ

Ватан, бағрингдаги пинҳон ганжларинг
Жисму жонимизга бергайдир қувват.
Ҳурлик истаб чеккан озор, ранжларинг
Бекорга кетмади – келди ҳуррият.
Аммо юрагимни ўртар бир ҳадик,
Қандай сарф этипмиз ушбу қувватни?
Юракнинг тубида асрай олдикми
Истиқлол аталмиш улуғ неъматни?!
Ватан, аждодларнинг хоки туфайли
Жаннатга айланган гўзал бўстони.
Кун келиб бир сиқим тупроғинг бўлиб
Розийдим бағрингга кўшилса жоним.
Мен сендан ҳеч нарса тамаъ қилмасман,
Онамсан – пойингга садқадир бошим.
Баъзан сенга қараб хўрлигим келар,
Кўзимдан қон бўлиб сизилар ёшим.
Ҳали қанча заҳмат чекмоқ керакдир,
Қутулмоқлик учун тўсиқ, ғовлардан.
Минглаб фарзанд керак Темурмаликдек¹
Ҳимоя қилмоққа сени ёвлардан.
Уқдирмоқ бўламан ўгил, қизимга
Сени дилдан севмоқ кераклигини.

1. Чингизхонга қарши курашган тожик миллий қаҳрамони



Агар зарур бўлса, Ватан, сен учун
Хатто жондан кечмоқ кераклигини.
Аммо сўз топмасман баён этмоққа,
Дилимни ўртаган қайғуларимни.
Яна қирқ йил керак сингдирмоқ учун
Қирқ йилда етилган туйғуларимни.
Тунлар қочиб кетар кўзимдан уйқу,
Бўғзимга тикилиб келар фарёдим.
Менинг етти пуштим яшаган юртда
Озод яшармикан етти авлодим?!
Осмонга тикилиб ётаман ўйчан,
Не чоғ оғир ожиз яшаб ўтишлик,
Ёдимга тушади зафар истар чоғ,
«Инна фаттахна»ни такрор этишлик.
Руҳим енгил тортиб, кўнглим ёришиб,
Таҳорат олгали аста тураман.
Тунда ўқилажак «Таҳажжуд»-дан сўнг
Ватан, бахтинг сўраб дуо қиламан.

12.01.2012 йил.



ТОЖИК ТИЛИ ҲАҚИДА

Дунёда тиллар кўп гўзал ва жозиб,
Барчасин ўрганмоқ эрур ноимкон.
Гўзал сатрларни битсинлар дея
Шу тилни яратди биз учун Яздон.

Ҳатто Пайғамбар(с.а.в.) ҳам, айтишларича,
Тожиқча лисонда «ду, ду» деганлар.
Ўзининг улуғвор салтанатини
Шу тилда бошқарган не жаҳонгирлар.

Қанча шоҳ асарлар нақшланмишдир
Шу тилда тарихнинг китобларига.
Ҳофиз ғазаллари илҳом бермишдир
Донишманд Гётенинг хитобларига.

Озод жаранглайди бугун Ватанда,
Унинг садосидан хушдир ҳар оним.
Ғойиб чин юракдан таманно этар:
Оянданг бор бўлсин қутлуғ забоним!

30.09.2011 йил 16.40.



БАЙРОҒИМИЗ МАДҲИ

Фидо бўлсин юрт учун ҳам тану ҳам жонимиз,
Армуғон бўлсин унга бор шараф ва шонимиз.
Жон қадар бизга азиз Тожикистон - хур Ватан,
Ул туфайли файзlidir ҳар нафас, ҳар онимиз.
Тинчлигу ваҳдат йўлин ихтиёр этгач элим,
Минг шукр, бўлди бутун ушбу кунда нонимиз.
Мустақил юрт ҳурлигин рамзи-гимсоли ўшал,
Энг баланд байроқ учун берсак арзир жонимиз.
Ғойибо, юрт васфида битгил Ўлмасдек ғазал,
Шояд ки, эл ёдида қолса шоир номимиз.

07.12.2011 йил

ВАТАН ВАСФИ

Ердаги жаннат ўзинг
Мангу бўстоним, Ватан.
Жоним ичра жон ўзинг
Тоза иймоним, Ватан.

Ҳар гиёҳинг тўтиё,
Малҳами жоним Ватан.
Сен туфайли хуш эрур
Ҳар нафас, оним Ватан.

13.06.2012 йил



ҲИСОР ҚАЛЪАСИ ҚОШИДА ЎЙЛАГАНЛАРИМ

Дўстлигимиз пойдевори
Мустаҳкамдир метиндан ҳам.
Ўзбек-тожик жондош, қондош
Бир-биридан эмасдир кам.
Бу дўстликка асос солган
Навой ва Жомий эрур.
Турсунзода, Ғафур Ғулом
Бу дўстликка ҳомий эрур.
Ўлмас Жамол ва Гулназар
Дўстлигини юргум мактаб.
Шеър бағишлаб бир-бирига
Яратдилар янги мактаб.
Боболарнинг ҳаёт йўли
Бизлар учун бўлсин ибрат.
Яшамокни ўрганайлик
Аҳилликка этиб рағбат.
Ширу шакар шеър айтмоққа
Шогирдларни ўргатайлик.
Ҳар бир ишда бағрикенглик,
Саховатла йўл тутайлик
Сузимизни тинглаган эл.
«Баракалло, шоир» десин.
Боболарнинг пок руҳлари
Биздан рози бўлиб юрсин.

25.09.2011й



ВАТАН

Ватан, менинг қалбимдаги зорим ўзинг,
Бу дунёда топган давлат, борим ўзинг.
Қайга бормай ёдинг мени тарк айламас,
Сен ягона менга ҳамдард, ёрим ўзинг.

Ҳар заррангни тавоф этгум юзларимга,
Ҳар гиёҳинг тўтиёдир кўзларимга.
Шукроналар айтгум нону тузларингга
Ватан, менинг илҳом берган торим ўзинг.

Сен онамсан, алла айтиб оқ сут берган,
Сен отамсан, мени тўғри йўлга бурган.
Сен дўстимсан, жигаримсан бирга юрган,
Ватан, менинг қатордаги норим ўзинг.

Сен бордирсан менга ўзга бахт керакмас,
Садоқатдан ўзга менга аҳд керакмас,
Бир кафт тупроғингдан ўзга тахт керакмас,
Ватан, менинг юксакдаги дорим ўзинг.

2002й



ВАТАНИМ

Менга ҳаёт инъом этган илдизимсан, Ватаним,
Умр йўлим равшан этган кундузимсан, Ватаним,
Мен-ку бир кун ўтгайдурман, тупроқ бўлгай бу таним,
Сен кўкдаги мангу сўнмас юлдузимсан, Ватаним.
Боболарим орзу қилган камолингни кўрдим мен,
Момоларим эртак этган жамолингни кўрдим мен,
Сенинг озод кучоғингда давронимни сурдим мен,
Менга ҳаёт инъом этган илдизимсан, Ватаним.
Такдир-азал ҳар бир бошга солар экан савдолар,
Баъзан мен ҳам ёш бошимга орттирганда ғавғолар,
Сенинг меҳринг нурларидан топдим дилга даволар,
Умр йўлим равшан этган кундузимсан, Ватаним.
Кучоғингда ўсиб ундим, шукроналар қилгайман,
Фарзандларим камолида келажагинг кўргайман.
Яратгандан сенга доим иқбол тилаб юргайман
Осмонимда мангу сўнмас юлдузимсан, Ватаним.

16.02.02.



ТОЖИК ЭЛИМ МЕНИНГ

Менинг киндик қоним тўкилган юртим,
Жонимни сен учун айлайман тортиқ.
Сенинг дардинг асли бу менинг дардим,
Мен сени севарман ўзимдан ортиқ.
Ҳар бир ютуғингдан қувонгай кўзим,
Тоҷик элим менинг- қадрдон элим.
Туркзобон шоиринг бўлсам ҳам ўзим,
Сенинг-ла диним бир, бир эрур дилим.
Оғир синовларни бошдан ўтказдик,
Ҳамон дилдан кетмас унинг оғриғи.
Шу азиз кунларга Тангри етказди,
Оламларни тутди сенинг доврўғинг.
Давр чархфалаги айланмасин терс,
Айланса Ҳақ йўлни топмоқлик қийин.
Миллатни олдинга олиб чиқмоқ – чун,
Меҳнат қилмоқ керак тун-кун тинмайин.
Токи дунё аҳли бизларга қараб,
Нокас, тиланчи деб қилмасин таъна.
Она еримизни айлайлик обод,
Келажак насл-чун асрайлик яна.



Токи арзимаган мушкулликни деб,
Муқаддас ғоядан ортга қайтмайлик.
Қарам бўлиб яшаш минг марта «хуб» деб,
Қуллик кўшиғини қайта айтмайлик.
Токи англаб етсин ҳар битта юрак
Ватан олдидаги муқаддас бурчни.
Жўмард фарзандларни йўлламоқ керак
Масъул мансабларда ишламоқ учун.
Беш кўл баробармас деганларидек,
Миллат душманлари юрар ғимирлаб.
Бир хато топдими, тилидан қўймас,
Эрта-кеч ғийбатлар қилар шивирлаб.
Қалбим озор чекар бундай гаплардан.
Дейман нега булар бунча бетайин.
Бош чиқариб юрсак битта ёқадан,
Толёь бизга кулиб боқиши тайин.
Биз ваҳдат жомини кўтарган халқмиз
Дош бериб даврнинг туғёнларига.
Элим, ободликни истасанг агар
Ишонгин мард, ботир ўғлонларингга!

2008

ТАВАЛЛО

Рашитлик дўстларимга

Ошиб тоғу довонлардан,
Дала дашту ёбонлардан.
Дўстлар дийдорини кўмсаб
Келдим Регар томонлардан.
Раштонзамин бағрингни оч,
Меҳрим берай, меҳрингни соч!

Файзободнинг шамолидан,
Обигарм жамолидан
Баҳра олиб, кўзим қувнаб
Роғун ГЭСи камолидан.
Келдим, менга бағрингни оч,
Меҳрим берай меҳрингни соч!

Барно йигит, қизларинг бор,
Аҳил қора кўзларинг бор.
Пешона тер билан топган
Ҳалол нону тузларинг бор.
Раштонзамин бағрингни оч,
Меҳрим берай меҳрингни соч!

Раштонзамин тоғинг гўзал,
Тоғингдан-да боғинг гўзал.
Парвардигор ато этган
Озод ва ҳур чоғинг гўзал,
Шоирингга бағрингни оч,
Меҳрим берай меҳрингни соч!

28.11.2014 йил.



ТОЖИК ТИЛИ – НАЗМ ТИЛИ ДЕЙДИЛАР

Ҳамза, эслайсанми Олма-Отада
Дилда кучли эди ғайрат, шижоат.
Мен таклиф қилгандим бир кун ҳафтада
Тоҷикча сўзлашув бўлсин деб одат.

Барчамиз Регардан, элдош, заминдош
Уч тоҷик ўғлони, бир ўзбек ўғли.
Русча гаплашардик, гоҳо ўзбекча
Тоҷикча сўзлашни билмасдим, тўғри.

Аммо олисдаги Ватан соғинчи
Дилимни ўртарди ҳар лаҳза, ҳар он.
Ҳар гал Душанбега қайтган чоғимда
Дилим дардларига топардим дармон.

Ким билан танишсак, қаерга борсак
«Бизлар Тоҷикистон фарзанди» дердик.
Қозоқ халқи учун, устозлар учун
Улуғ Тоҷикистон фарзанди эдик.

Ҳижратда англадим Ватан кадрини,
Ғурбатда ғариблик кўп хайрликдир!
Тоҷик тили назм тили дейдилар,
Тоҷикча сўзлашув, бу-шоирликдир!

12.10.2013-йил



ШУ ВАТАНДА

Бир кун биз ҳам ўтиб кетамиз
Бу ҳаётга қоникмай, тўймай.
Қаро ерга элтадилар тез
Уйимизга бир кун ҳам қўймай.

Озод бўлган руҳимиз секин
Парвоз қилиб кетади кўкка.
У барчани кўриб туради
Ғамгин боқиб жасад-шўрликка.

Шунда бирдан аён бўлади
Биз билмаган чин ҳақиқатлар.
Дўстлар кўзи ёшга тўлади
Хўрсинишиб дерлар:”рахмат”ли.

Не бўлса ҳам яратган Эгам,
Шу Ватанда ўлмоқ бахтин бер.
Шод бўлардим гар ёза олсам
Шу Ватанга арзигулик шеър!

2008.



ФАҲР

Бирлик ва тинчлик асосчиси - Миллат пешвоси Эмомали Раҳмонга

Минг йиллик тарихи бўлган миллатнинг
Сарвари эрурсиз, бу-нечоғлик бахт!
Худо назар қилса қайси миллатга
Бошига тож бергай, ҳам пойига тахт.

Улуғ аждодлардан мерос бу макон-
Озод Тожикистон ободир бу кун.
Йигирма уч йилдирки, Сиз-аҳли Сомон,
Тортдингиз миллатнинг заҳматли юкин.

Оғир лаҳзаларда, қалтис онларда
Баъзилар панага урдилар ўзни.
Майдонга чиқдингиз элнинг бахти деб,
Ошкора айтдингиз халқ кутган сўзни:

«Токи миллатимнинг битта фарзанди
Сарсон юрар экан, мен безовтаман.
Буюк аждодларнинг ҳаққи-хурмати,
Миллат бахти учун хизмат этаман».

Бугун тожикларнинг иқболи кулган,
Ватан аҳли саржам ва бахтиёрдир.
Дунёда минг йиллик тарихи бўлган-
Қадим миллатимнинг пешвоси бордир.

2007



ШУКРОНА

Элим, қора кунлар кечди бошимиздан,
Дарёлар ҳам шўрландилар ёшимиздан.
Ногоҳонда ёв чиққанда қошимиздан,
Аллоҳ бизга элим деган инсон берди,
Юрт тинчлигин ўйлагувчи султон берди.

Шукр айтсак арзир, эсди эрк шамоли,
Чирой очди бу шамолдан юрт жамоли,
Насиб этди бизга ватан истиқлоли,
Аллоҳ бизга элим деган инсон берди,
Юрт тинчлигин ўйлагувчи султон берди.

Бугун бу юрт ахиллигу ваҳдатдадир,
Фарзандлари бари унга хизматдадир,
Ёшлар иззат, кексалари ҳурматдадир,
Аллоҳ бизга элим деган инсон берди,
Юрт тинчлигин ўйлагувчи султон берди.

Синовларда синмади ҳеч бардошимиз,
Меҳр билан нур сочмоқда куёшимиз.
Ўз халқига муносибдир юртбошимиз,
Аллоҳ бизга элим деган инсон берди,
Юрт тинчлигин ўйлагувчи султон берди.

Ким ёмондир эл ёдида доғи қолар,
Яхшилардан обод бўлган боғи қолар.
Ҳасанбойнинг ашъор битган чоғи қолар,
Аллоҳ бизга элим деган инсон берди,
Юрт тинчлигин ўйлагувчи султон берди.

05.02.05.



ЮРАГИМГА ТУТАШГАН ВАТАН!

Ишқинг доим қалбимда яшар
Соғинаман узоқроқ кетсам.
Дунё сенсиз зулматга ўхшар,
Қуёшимсан, ўхшатиб айтсам.

Муқаддассан, қутлуғсан Ватан,
Онам каби меҳрибон, мунис.
Болалигим бағрингда кечган
Гарчи бу кун кетса ҳам олис.

Ота-онам бағрингда ётар,
Дийдорига зор қилиб кетган.
Сен бир улуғ дарахтсан, Ватан,
Юрагимга туташиб кетган.

14.03.2010.



МУБОРАК ОНЛАР

Қанча гул умримиз ўтди беҳуда,
Ҳақ йўлни англолмай, оввора бўлиб.
Яшадик кўринмас ғуллар ичида,
Тарихни унутиб, ғафлатга тўлиб.
Аллоҳни унутган ғофил қулларга
Сигиндик Худога сигинганнамо.
Айландик шайтоннинг ҳаммолларига,
Унутиб нимадир рўзаю намоз.
Улуғ боболарнинг қутлуғ изидан
Бормадик “эскилик сарқити” дея.
Ишониб иблиснинг ёлғон сўзига
Иғво тошин отдик кўҳна мозийга.
Аммо зулматнинг – да ёруғ куни бор,
Ёлғон ақидалар бўлди чил-парчин.
Магар Худо бордир, унинг дини бор,
Бугун юрт мустақил, ихтиёр эркин.
Ватанга қайтдилар валийлар руҳи,
Эрта кеч таралар муборак овоз.
Муборак онларга шукрона айтиб,
Ибодат қил, элим, мўминларга хос.

22.05.02.



НИЯТИНГ – ЙЎЛДОШИНГ

“Ниятинг - йўлдошинг” дейдилар азал,
Яхши ниятларга тўлсин дилимиз.
Ҳар янги кун бизга бахт олиб келсин,
Нурли, равон бўлсин бизнинг йўлимиз.

“Ниятинг - йўлдошинг” дейдилар азал,
Элим, садқа бўлсин сенга жону тан.
Сенинг камолингни кўрмоқ - истагим,
Сенинг ободлигинг бахтимдир, Ватан!

11.01.2010 й



Сурурбахш келажак истайман
Жаннатий, гўзал ва соҳира.
Дилимга қувват бахш этгувчи,
Нурдек соф, тоза ва бокира.
Юрагим яйраса қувончдан,
Шодликдан порласа кўзларим.
Қуёшдек нур сочса соғинчдан
Сарғайиб қолган бу юзларим.
Бўстонга айланган Ватанда
Шод, хуррам яшаса одамлар.
Келажак бахти деб ҳар куни
Ташланса ҳар битга қадамлар.
Мен шундай келажак истайман.

10.01.2012 й.



ВАТАН ИФТИХОРИ

Ватан, сенинг бир кафт тупроғинг
Алишмасман сийму олтинга!
Ҳар бир гиёҳ, ҳар бир япроғинг,
Болаликдан сирдошдир менга.
Ватан, сенинг юксак тоғларинг,
Рух бағишлар туйғуларимга.
Эрк шамоли эсган боғларинг,
Ором берар уйқуларимга.
Ватан, сенинг соф ҳаволаринг
Менга она меҳридек суюк.
Нурдек шаффоф, зилол сувларинг
Биҳиштдаги Кавсардек буюк.
Ватан, сенинг пок муҳаббатинг,
Дилимга жо туғилган ондан.
Дунёга кўрк берар келбатинг,
Азиздирсан мен учун жондан.
Ватан, сенинг ҳар бир саҳифанг,
Юрагимда бир-бир очилар.
Бир кафт тупроқ–энг ноёб тухфанг,
Ўлсам қабрим узра сочилар.

2001.



ОБОД ВАТАНДА ОЗОД ЯШАШНИ НАСИБ ЭТСИН

Бунёд этган боғингда яшашни насиб этсин,
Аҳли мардга ошини ошашни насиб этсин.
Раҳбар бўлиб юриш ҳам отга минмоқ дегани,
Асл мард каби отдан тушишни насиб этсин.
Катта карвонда юргач, мақсад ҳам катта бўлар,
Азим қир, довонлардан ошишни насиб этсин.
Тожикистон гулбоғим, суянган улуғ тоғим,
Улуғлигинга ҳисса қўшишни насиб этсин.
Лаълим-Бадахшонимсан, Ҳисорим, Хатлонимсан,
Лоиқ каби ишқингда жўшишни насиб этсин.
Ободлигингни истаб заҳмат чекурман тун-кун,
Ақлимга дарё бўлиб тошишни насиб этсин.
Тарихи минг йил бўлган менинг она халқимга
Оламда яна минг йил яшашни насиб этсин.
Худо азиз этгани ҳеч кимса хор этолмас,
Обод Ватанда озод яшашни насиб этсин.
Жаҳон томида яшаб, дунёга тилагим шу:
Аллоҳ розилигини топишни насиб этсин.
Гуллаб яшнасин доим она Тожикистоним,
Асл мардга зафарни қучишни насиб этсин.

24.01.2012 й.



Орияти бор бўлган одам,
Ватанини севар ардоқлаб.
Бир кун келиб гадо бўлса ҳам,
Элу юртдан кетмас йироқлаб.
Орияти бор бўлган одам,
Халқни ўйлар ҳар қандай онда.
Бир кун келиб шоҳ бўлганда ҳам,
Фақирликни қилмайди қанда.

2002.

ИККИ ТИЛЛИ БИР МИЛЛАТ

Айтгин яна қаерда бундай ҳолни кўргайсан,
Гарчи тили бошқадир, бир хилдир урфу одат.
Иккисини кўрганда эгизак деб ўйлайсан
Исми жисмига монанд икки тилли бир миллат.
Азалдан бир Ватанда аҳил бўлиб яшаган
Дўстликнинг кучи билан яратган буюк давлат.
Гар ҳамла қилса душман, биргаликда курашган
Бирлик туфайли ғолиб икки тилли бир миллат.
Юлдузларга бўй чўзган боқиб дунё тоmidан
Бир-бирини камситмоқ бизга ёт бўлган иллат.
Таълим олган Навоий ўз устози Жомийдан,
Устоз шогирд азалдан икки тилли бир миллат.
Насиб этса кўп йиллар бирга умр кўргаймиз,
Аждодлар меросини асрамоқ бизга суннат.
Озод, эркин Ватанда қатта тўйлар қилгаймиз,
Доимо бор бўлгаймиз икки тилли бир миллат.

09.02.2002й.



ФИДОЙИЛАР ҚЎШИҒИ

Юрт учун, Ватан учун
Жўшар танда қонимиз.
Шу гўзал макон учун
Армуғондир жонимиз.
Бизда ўзга ташвиш йўқ,
Халқ ташвиши-ғамимиз.
Дуо қилса эл агар
Бут бўлади камимиз.
Ҳақ назар этган зотнинг
Ишончини оқлайлик.
Шавкатли аждодларнинг
Шарафини сақлайлик.
Мустақил Тожикистон-
Ватанимиз, фахримиз.
Мақсадимиз ягона
Обод бўлсин шаҳримиз.
Тоҷик, ўзбек, рус, татар
Шу диёр дилбандимиз.
Ака-ука, кадрдон,
Бир Одам фарзандимиз.
Юрт учун, Ватан учун
Жўшар танда қонимиз.
Шу гўзал макон учун
Фидо бўлсин жонимиз.

11.12.2015.



ТИНЧЛИК КУЙЧИСИ

*Мирзо Турсунзода таваллудининг
100 йиллигига бағишланади.*

1

Тоғлар салтанатин бир гўшасида
Қаратоғ аталмиш гўзал дара бор.
Шу дара бағрида мавжланиб оққан
Камруд деб аталмиш гўзал дарё бор.
Жўшқинлик истасанг дарёга боқкин,
Улуғлик истасанг боқкин тоғларга.
Гўзаллик истасанг Қоратокқа бор,
Тоғлари тутшиб кетмиш боғларга.
Шовуллаб оқаркан бу азим дарё,
Тоғлар ҳам ҳайратла унга боқади.
Навқирон ёшликнинг рамзидек дарё,
Мавжли тўлқинлари дилга ёқади.
Зилол сув, соф ҳаво, сеҳрли дара
Чарчаган руҳимга ҳаёт бахш этар.
Мени чулғаб олар ширин хотира
Хаёлим боғида мозий акс этар.



2

Йигирманчи аср, жаҳолат асри,
Зулм, қон тўкишлар авж олган замон.
Ҳунарманд бўлса-да одамлар аммо
Хароб кулбаларда асрар эди жон.
Ўша замонларда ушбу дарада
Ҳаёт кечирарди битта фақир мард.
Дурадгор эди у тенгсиз, мислсиз.
Барчага меҳрибон, барчага ҳамдард.
«Усто Турсун» дея эъзозларди эл,
Ўз ризқу рўзини топарди ҳалол.
Тонг чоғи хушхабар бердилар унга
Фарзанд берди дея Тангри Зулжалол.
Нур таралар эди гўдак юзидан,
Хуршедмонанд эди, чиройли, соғлом.
«Илоҳим, кўпайсин ўз-ўзидан» деб
Гўдакка Мирзо деб кўйишдилар ном.



3

Буюк зот юз йилда келар дунёга,
Юзга кирибдилар муҳтарам инсон.
Агар ҳақиқатни тан олсак дангал,
Унингдек шоирни кам кўрган жаҳон.
Гарчи шоирлар бор, бордир олимлар
Ҳеч ким шоир каби этмади парвоз.
Озодлик истаган мазлум халқларнинг
Дуосин олгандир сулҳпарвар устоз.
Улуғ эди шоир шахси, бетакрор.
Олам дарди билан яшарди мангу.
Истаги одамзод бўлмасин афгор,
Озод бўлсин қуллик кишанидан у.
Кезаркан Осиё, Африка бўйлаб,
Тинчлик ва дўстликни мадҳ этиб юрди.
Шоирнинг барҳаёт ғояси билан
Оламга танилди тожиклар юрти.
Бугун ҳам бизларга раҳнамодир у,
Сулҳу ваҳдат, дўстлик бош шиоримиз.
Эзгулик яшаган юрт бўлгай мангу,
Гуллаб яшнагайдир хур диёримиз!

05.02.2010й.



ВАТАН ОБОД

Ватан обод йигитларнинг марди билан
Номард ўтар шаънида доғ, гарди билан.
Эл севмайди кимнинг агар парвоси йўқ,
Одамларнинг қалбидаги дарди билан.

Мард яшаган юрт доимо боғ бўлади,
Номардлардан элнинг қалби доғ бўлади.
Ватанини фарзандидек севолганлар
Юрти учун суянчиғу тоғ бўлади.

Кўхна дунё чархпалакдек айланади,
Бунда ҳамма ҳокимликка шайланади.
Томирида мардлик қони жўшган зотлар,
Юртга асл сардор бўлиб сайланади.

Мансаб билан давлат дўстим омонатдир,
Элни алдаб жим юришлик хиёнатдир.
Ғойиб жони фидо бўлсин халқи учун
Элу юртга хизмат қилмоқ матонатдир.

2002.



Ватан аждодлардан мерос бир қалъа,
Мозий ҳам ўзгармас яхши билингиз.
Беҳуда сафсата, ғийбатдан кўра
Сиз ҳам бу қалъага бир ғишт қўйингиз.
Аждодлар руҳини сиз чинқиратманг,
Улар шуҳратига тарих гувоҳдир.
Ўтганлар ҳаққига ёмон сўз айтмоқ
Тангри огоҳ этган қаттиқ гуноҳдир.

2003.



Меҳри дарё, мард халқимиз бор
Фахрлансак арзир чинакам.
Икки полвон курашга тушса
Дуо берар иккисига ҳам.
Меҳри дарё, мард халқимиз бор,
Одилликда тенги йўқ ҳакам.
Ким курашда номардлик қилса
Кечирмайди уни сира ҳам.

05.02.2010й.



АҲИЛЛИК ҲАМ ИБОДАТДИР

Туғилган юрт она каби азизлигин
Дилдан туйиб яшамоқ ҳам матонатдир.
Ватан учун хизмат қилсанг чин юракдан,
Ерда босган ҳар қадаминг зиёратдир.

Маърифатли бўлсин дея она элим,
Заҳмат чексанг ўлмасин деб она тилим.
Юрагингни кесиб ўтса ҳақнинг йўли,
Ҳар нафасинг, ҳар бир онинг ибодатдир.

Эй ватандош, шу азиз юрт-Тожикистон
Барчамизга жондек азиз, қутлуғ макон.
Кел, яшайлик шу Ватанда аҳил, омон,
Аҳиллик ҳам яратганга итоатдир.

13.03.2010.

ЙИГИТ БЎЛСА

Йигит бўлса, шижоатли, мард бўлсин,
Юрагида ўти бўлсин, дард бўлсин.
Дўсту ёвнинг кўзларига тик қараб,
Сўзломаса ранги хазон, зард бўлсин.
Йигит бўлса иймон унга ёр бўлсин,
Ҳақ севгиси қалбида тумор бўлсин.
Эл дуоси билан кўкараар одам,
Эл учун тоғ бўлсин, чинор бўлсин.
Яшар бўлса ҳақ, адолат талашиб,
Йигитлик ҳам кетар унга ярашиб.



Рақиблар ҳам тан бергуси оқибат
Юрар наслу насабини сӯрашиб.
Юртим бағринг тўлсин мард ўғлонларга,
Хизматингга бел боғлаган жонларга.
Сенинг она тупроғинг обод айлаб
Довруғингни ёйсин кенг жаҳонларга.

07.03.2010.

ОНА ШАҲРИМГА

Мен сени севаман, эй она шаҳрим,
Бир фарзанд онасин севган мисоли.
Ҳар гал кўрганимда илҳом бахш этар,
Қўлда китоб тутган шоир тимсоли.

Мен сени севаман, эй она шаҳрим,
Исми жисмига мос шаҳарсан гўзал.
Дарахтлар, дарёлар шоирдир бунда,
Шоирдир бу юртда одамлар азал.

Мен сени севаман, эй она шаҳрим,
Бағрингда улғайдим меҳрингга қониб.
Фарзандман, бурчимни англайман дилдан,
Сени мадҳ этаман ишқингда ёниб.

2006й



ТОЖИГУ ҲЗБЕКЧА ШИРИН ШЕВАСИ

Шаҳрим кўчаларин кезиб юраркан,
Ажиб бир ҳислардан шодланар қалбим.
Сенинг хислатларинг ўйлаб кўраркан,
Тасанно айтаман мен сенга, ҳалқим.
Бирор бир шаҳарда бундай ҳолатни
Кузатган эмасман ўттиздан ошиб.
Ҳамдиллик аталган буюк неъматни
Аллоҳ сенга берган ризқингга кўшиб.
Келиб қолганида гапнинг жўяси,
Юрак сўзларимни айтмоғим даркор.
Тожигу ўзбекча ширин шеваси,
Тошга жон бағишлар гўзал тилинг бор.
Тожикча бошланса суҳбатнинг боши,
Албатта ўзбекча топади якун.
Бунда ҳеч ким юрмас миллат талашиб,
Бунда ҳар бир инсон дилимга яқин.
Шундай аҳил, иноқ эл омон бўлсин,
Асло тўкилмасин кўзидан ёши.
Топгани доимо тўйга буюрсин,
Бошида порласин иқбол қуёши.

20.07.2006 й.



БОҒБОНДА

Дилим таскин топар
Бу ерга келсам.
Ёдимга тушади
Ёшлик дамларим.
Дурбентсой ғулувин
Бир бор тингласам,
Унут бўлар барча
Ташвиш, ғамларим.

24.07.2012й.



Хатлонзамин бағрида кўпдир
Қадамжолар, зиёратгоҳлар.
Мен бу юртнинг хокини ўпдим,
Зиёратга борганим чоғлар.
Тавоф қилар зиёратчилар
Авлиёлар ҳаққи, хурмати.
Хатлонзамин узра эрта кеч
Ёғиб турар Аллоҳ раҳмати.

2006й



ЧИЛЛАМАЗОР

Анжирқишлоқ яқинида
Бордир буюк зиёратгоҳ,
Неча йилдир бу маконни,
Тавоф қилар Қалдирға тоғ.
Бир замонлар бу ерларда
Нафс-ҳаводан ўзни поклаб,
Аллоҳ қули-авлиёлар
Ўлтиришган чилла сақлаб.
Бунда худо зикри яшар,
Ҳар бир гиёҳ, япроғида.
Ҳакни севган зотлар ётар
Чилламазор кучоғида.

2003.

ЧИЛЛАМАЗОРДА ЁЗИЛГАН ШЕЪР

Қирдаги қамишлар
Тарихдан сўйлар,
Қирдаги қамишлар
Аллоҳни ўйлар,
Қирдаги қамишлар
Туну-кун бедор
Мангулик қўшиғин куйлар.

02.05.2006



ТОЛБУЛОҚ

Эй толбулоқ, эй толбулоқ!
Ҳаволаринг кўнглим олди.
Бағрингдаги туғдонанинг
Шохларида дилим қолди.
Мангу яшил арчалардан
Яшаш сирин ўргандим мен.
Сувларингдан баҳра олиб,
Зикр айтган тилим қолди.
Сўқмоқ бўйлаб қирлар ошдим,
Ҳамроҳ бўлди тоғу тошлар.
Улар ҳардам Ҳақни эслаб,
Туришларин билиб олдим.
Тол бағрида юрар шодон,
“Тақ-тақ” қилиб қизилиштон.
Какликларнинг сайроғидан
Хуш ҳол бўлиб ўйга толдим.
Эй толбулоғ, эйтол булоғ!
Ҳаволаринг кўнглим олди.
Бағрингдаги туғдонанинг
Шохларида дилим қолди.

04.2006.



ШИРКЕНТ ДАРЁСИГА

Ҳисор тоғин кўрагидан
Сизиб чиққан армон, дарё.
Нурдек тиник, зилол сувинг
Жонгинамга дармон, дарё.

Тўлқинланиб, жўшар юрак,
Шовқинларинг авжларидан.
Шоир бўлиб кетсам керак,
Илҳомланиб мавжларингдан.

Тўлиб - тошиб оқавергин
Эй сен, мовий карвон, дарё.
Ҳисор тоғин кўрагидан
Сизиб чиққан армон, дарё.

21.02.03.



ЯХШИОБОД МАДҲИ

Исми жисмига мос бўлгани яхши
Ҳар бир маҳаллаю ҳар бир работнинг.
Савобни ўзига шараф деб билган
Одамлари бордир Яхшиободнинг.

Гузарлари бордир кўркам ва шинам,
Мен меҳмон бўлганман нечаларида.
Худди афсонага тушиб қолгандек
Адашиб қоласан кўчаларида.

Бу қишлоқ қалбимни ўзига тортар,
Боргим келаверар уни сўроқлаб.
Бу қишлоқда яхши дўстларим яшар,
Яхшилардан ҳеч ким кетмас йироқлаб.

23.05.03



**ШЕЪРҲОИ БА ТОЧИКӢ
НАВИШТАИ МУАЛЛИФ**

*«Шоҳқоре не агар, байте бимонад ёдбуд
Дар забони миллати худ...»*

Бозор Собир

БА ХОТИРАИ УСТОД ЛОИҚ

Умри чавонам меравад, донӣ, намеоям дигар,
Ин достонам меравад, донӣ, намеоям дигар.
Дар ошиқи сарсон шудам, чонони чонам нест, нест,
Ин дилситонам меравад, донӣ, намеоям дигар.
Бишкуфта гулҳо буд ҳама дар кӯчабоғи ишқи ман,
Ин бӯстонам меравад, донӣ, намеоям дигар.
Таскин мадеҳ, эй ту сабо, таскин намеёбад дилам,
Бишнави зи ман акси садо, донӣ, намеоям дигар.
Уммеди ман бахти ту ҳаст, эй Тоҷикистон зинда бош!
Озурда чонам меравад, донӣ, намеоям дигар.

2009



Дўстон, як осмон дорем бас,
Як замин, як ошъён дорем бас.
Гар ҳазорон сол умри мо бувад,
Рафта як роҳи равон дорем бас.
Зиндагиро бо диёнат парваред,
Рӯзи маҳшар меҳрибон дорем бас.
Тоҷику ўзбек пайванди ҳаманд
Дўстони роздон дорем. бас!

ИФТИХОР

Мекунам шукри Худо, зебо макон дорем мо,
Родмарду бохирад пиру чавон дорем мо.
Шуҳраташ дар назму ирфон гаштааст оламшумул,
Софу ширин аз сухан лафзу забон дорем мо.
Тоҷиконро эътироф бинмуда дар рӯйи ҷаҳон,
Фаҳр андар синаи худ як ҷаҳон дорем мо.
Сулҳу ваҳдат, рушди давлат, баҳти миллат аҳди ў,
Ворисе аз Оли Сомон ин замон дорем мо.
Номбардорони Сино, Саъдиву Айнӣ, Камол
Дар тамаддуни ҷаҳонӣ дoston дорем мо.



ШИРУ ШАКАР

Дӯстон! Чун қатраҳо чамъ омадем,
Мавж урармиз шӯх, азим дарё бўлиб.
Даштхоро мекунем шодоб мо,
Яшнагаймиз бир гӯзал дунё бўлиб.
Дӯстиро мо қавитар мекунем,
Бирлашурмиз янгидан эҳё бўлиб.
Аз чаҳолат меравем сӯйи сафо,
Илму ирфон нуридан бино бўлиб.
«Мо барои васл кардан омадем»
Ошиқи девони Мавлоно бўлиб.
Оварад Қахҳор¹ гар дурри сухан
Бо Ҳасанбой шаккару ҳалво бўлиб.

14.06.2015

1. Ушбу шеър А. Қосим билан ҳамкорликда ёзилган.



БАҲОРИ СУЛҲ

Бо дӯстон осон бувад ҳар мушкиле,
Бо дӯстон обод бувад ҳар хонадон.
Дӯстиро мекунем мо ҷустуҷӯ,
То ки, пайвандем бо аҳли ҷаҳон.

Даври истиқлол-ин даврони мо,
Бахту иқбол кулди бизга ин замон.
Бир эрур Вахшу Бадахшонимиз,
Бо Ҳисору, бо Хучанди бостон.

Раҳнамои мо шуд Истиқлоли мо,
Қад кӯтарди Парчам андар осмон.
Ваҳдати Миллӣ-баҳори сулҳи мост,
Тоҷикистон зинда бодо ҷовидон!

2015



БОРОНИ УМЕД

Борони найсони баҳор
Борони умеди мани.
Эй беҳтарини ман биё,
Имрӯз Хуршеди мани.

Биншаста андар чонамоз
Дасту дуо бардошта,
Сӯйи Худо зорӣ кунем
Аз донаҳои кошта.

Ҳар як фаришта ин замон
Бо катра борон омада.
Бар даштҳои бекарон
Бар кӯхсорон омада.

Шукронаи мо мешавад
Арзи сипоси мардумон.
Обод гардад ин макон
Озода мулки тоҷикон!

2013





**МУҲАММАС БАР ҒАЗАЛИ МАВЛОНО
ҶАЛОЛУДДИНИ БАЛҲӢ**

Гуфтам: эй, ту чонона мен ошиғинг бўларман,
Кўйингда неча йилдир куйиб, ёниб юарман.
Уйинг остонасида зор, интизор турарман,
Дони, ки ман зи олам ёлғиз сани севарман,
Гар дар барам наёй, андар ғамат ўларман.

Чаро санам сахтдилӣ, токай бағрим тиларсан,
Севишимни сен ўзинг ахир яхши биларсан?
Гоҳо шўх назар ташлаб аҳволимдан куларсан,
Ман ёри бовафоям, бар ман чафо қиларсан,
Гар ту маро нахоҳӣ, ман худ сани тиларман.

Ман ошиғи васли ту, ту тахти Сулаймонам,
Сенинг учун майли, ёр, нисор мекунам чонам.
Гар раҳми ту наояд, бисўзад хонумонам,
Рўй чу моҳ дорӣ, ман содадил аз онам,
З-он шаккари лабонат ман як бўса тиларман.

Гоҳ кибру ҳаво айлаб осмонларда учарсан,
Нозу карашманг бирла менга кафан бичарсан.
Ўлсам агар тўсатдан «Э воҳ» дея қучарсан,
Ту ҳамчу шери масти, мани қоним ичарсан,
Ман чў сағони кўят дунболи ту кезарман...

Гар хоҳи аз чашмонам ашки хунолуд резад,
Як лаҳза нигоҳ баҳшад он чашмони фирӯзат.
Ёки зар, бахмал ёпиб менинг тобутим безат,
Фармой ғамзаатро, то хуни ман бирезад,
В- арна санинг ишқингда мен бир ёзғур ёзарман.

Ошиғи бенавонгман, ақлим кирган онимдан,
Ҳажринг ўтида ёниб мадор кетди жонимдан.
Ошиқлар тумор этса арзир менинг қонимдан,
Ҳар дам ба хашм гўй: кетгил менинг ёнимдан,
Ман рўй сахт карда(м) наздики ту турарман.

Эҳ, қанча сарсон юрдим дашту биёбонингда,
Бир гадога жой йўқми мулки Сулаймонингда?
Лайлимсан, Ширинимсан сан икки жаҳонимда,
Рўзи нишаста хоҳам ёлғиз сенинг ёнингда,
Сен-ла чоғир ичаман, ҳам ман Қайс бўларман.

Келмасин деб бар дарат монди ҳазор кулфҳо,
Кетмагайман бўлса ҳам бошимга дор ин зулфҳо.
Тоқати тоқ бўлдими, дигар намуд рафторро,
Моҳе, чу ШамсиТабрез ғайбат намудо гуфто:
Аз ман дигар мапурсед, ман сўйладим, борарман.

03.03.2012 йил.

II

Ҳаёт Беланчаги



- *Баҳор нафаси*
- *Наврӯз*
- *Наврӯз таронаси*
- *Баҳор манзараси*
- *Наврӯз тилаги*
- *Баҳор чоги*
- *Ортада қолди*
- *Кечиккан баҳор*
- *Богбон қирларида*
- *Куз манзаралари*
- *Кузда дарахтлар*
- *Ҳамдардлик*
- *Дарахтдаги*
- *Кумуш балдоқ*
- *Қиш манзараси*
- *Остонада турар янги йил*
- *Табиат қуйнида*
- *Янги йил тилаги*



БАҲОР НАФАСИ

Февраль.
Қиш ҳам алвидо айтар.
Сезилади баҳор нафаси.
Қағ-қағ этар дарахт шоҳида
Қарғалар галаси.
Майин еллар олиб келади
Димоғимга ялпиз бўйини.
Бутун борлиқ жўр бўлиб чалар
Соғинч куйини.

2010й

НАВРҮЗ

Уйғониш фаслининг хушдир ҳар они,
Табиат қучоғи гулга тўлмоқда.
Сойларда зилол сув оқар тўлғониб,
Бахт, иқбол чечаги Наврӯз келмоқда.

Дарахтлар чизади яшил суратлар,
Севинч ёшларини тўкар булутлар.
Куёш ҳам жилмайиб бизларни қутлар,
Баҳор келинчаги Наврӯз келмоқда.

Оламини тўлдириб қўшиққа, шеърга,
Баҳор яшил либос тўшади қирга.
Барака уруғин қадайлик ерга,
Ҳаёт беланчаги Наврӯз келмоқда.

30.03.2002.



НАВРҮЗ ТАРОНАСИ

Наврӯз келиб кулди олам яшнаб еру осмонлар,
Қутлуғ бўлсин халқимизга шу фаровон замонлар.
Ғарбу Шарқдан юртимизга ташриф этар меҳмонлар,
Меҳмон эмас улар бизга дилдош, дарддош инсонлар,
Минг шукрким, пайдо бўлди бизга катта имконлар.

Паға-паға ёққан қорга тўлиб кетди ўнгу сўл,
Тоғларда қор мўлу анҳор, дарёларда сувлар мўл,
Яшнаб кетса не ажаб ушбу йилда дашту чўл,
Наврӯз келиб кулди олам, яшнаб еру осмонлар,
Қутлуғ бўлсин халқимизга шу фаровон замонлар.

Хуш кўкламининг ифоридан илҳом олиб ёздим шеър,
Парвардигор юртга тинчлик, белимизга қувват бер.
Айни меҳнат палласидир- деҳқон ишлар тўкиб тер,
Наврӯз келиб кулди олам, яшнаб еру осмонлар,
Қутлуғ бўлсин халқимизга шу фаровон замонлар.

Табиатнинг гўзаллиги дилга шукуҳ бахш этгай,
Бу шукуҳдан завқим ортиб дилнинг ғубори кетгай.
Адолатли бўлса подшоҳ эл ҳам муродга етгай,
Наврӯз келиб кулди олам, яшнаб еру осмонлар,
Қутлуғ бўлсин халқимизга шу фаровон замонлар.

19.02.2012.





БАҲОР МАНЗАРАСИ

Олисга чекиниб қора қарғалар,
Самога турналар аргимчоқ солди.
Қиш бўйи ях босиб ётган далалар
Баҳор либосига бурканиб олди.

Тоғдан эсиб келган ўйноқи еллар
Баҳор нафасини таратди ҳар ён.
Сойларда шалола-залвор кокиллар
Рақсида баҳорни қилди намоён.

Самонинг соҳиби- қудратли қуёш
Оламга кўрсатди тилло тожини.
Бағрига чорлади баҳор елкадош,
Кўклам кўрикчиси - қалдирғочини.

Кўзгади баҳорнинг муаттар иси,
Дехқон қалбидаги ғайрат чўғини.
Вужудин эгаллаб меҳр туйғуси,
Ерга қадай кетди бахт уруғини.

1985 йил.



НАВРҶЗ ТИЛАГИ

Етиб келди баҳорий айём,
Кундуз билан кеча тенглашди.
Ўлкамизда бошланди байрам,
Юракларга қувонч улашиб.
Аямади Аллоҳ неъматин,
Ёғиб берди ёмғир ҳам тинмай.
Эрта тонгдан элни уйғотиб
Жаранглади карнаю сурнай.
Кўчаларда одамлар гавжум,
Ҳамма хурсанд, ҳамма бахтиёр.
Таралади куй, қўшиқ мавжи,
Чехралардан таралар зиё.
Онахонлар қилиб мурувват,
Улашади муборак таом.
Орамиздан кетма, оқибат,
Наврўзимиз бўлсин бардавом.

21.03.2004.

БАҲОР ЧОҒИ

Баҳор чоғи борган эдим Каронига
Асир этди чучмомаю лолалари.
Туғдонадан тумор ясаб қўлларига
Тақиб юрар экан тоғнинг болалари.
Эҳ тоғликлар, донолигу улуғворлик
Хислатини сиз тоғлардан олганмисиз?
Туғдонадек бўлсин дея, чайир, маҳкам,
Болаларга тумор тақиб қўйганмисиз?!

27.04.03.



Ортда қолди совуқ қиш фасли
Ўз нурини сочди қуёш ҳам.
Еллар эсди баҳор нафасли
Келди бизлар соғинган кўклам.
Тарқаб қора булутлар аста
Чирой очди феруза осмон.
Ёмғир ёғиб ўтди оҳиста-
Яратганнинг файзидан нишон.
Энтикади озурда кўнглим
Исий бошлар музлаган танам.
Уйғонмоқда дилда умидим,
Баҳор, баҳор сени севаман.
Унутмоқлик гарчи қийиндир
Ноҳақ чеккан оҳу зорларни.
Баҳор, келгин, мени севинтир
Унутайин ғам, озорларни.
Ёмғирингда бошяланг бўлиб
Толгунимча тинмай югурай.
Баҳор сени ҳадя айлаган
Яратгандан кушойиш сўрай.
Токи тирик эканман бунда
Тарк этмасин бахтим, омадим.
Рози бўлсин мендан доимо
Ўтган етти пуштим, авлодим.

2008



КЕЧИККАН БАҲОР

Март ойи. Танангга игнадек
Санчилар қаҳратон совуғи.
Қалдирғоч келмади негадир,
Ёйгани баҳорнинг доврўгин.
Баҳорни соғинган булутлар
Туну кун тўкади ёшини.
Майсалар совуқдан толиққан,
Уйқудан кўтармас бошини.

18.02.03.



Боғбон қирларида бошланди баҳор,
Бинафша атрини сочди ўзидан.
Куёш ҳам нурланиб тиллақош тақди.
Булутлар пардасин олиб юзидан.
Боғбон қирларида бошланди баҳор,
Яшил гиламини ёзиб ҳар ёнга.
Дурбентсой лиммо-лим гувуллаб оқар,
Худди шошган каби буюк уммонга.
Боғбон қирларида бошланди баҳор,
Уйғониш палласи дилларга ёқар.
Шайдо бўлган каби бу гўзалликка,
Зангори осмондан турналар боқар.
Боғбон қирларида бошланди баҳор,
Ям-яшил ҳислардан хушланар табъим.
Қалбимни муҳаббат истило этар,
Олис болалиқда забт этган каби.

29.01.2005



КУЗ МАНЗАРАЛАРИ

Кўнглим кулбасига ҳатто қил сиғмас,
Билмам қай томондан бу шамол елди.
Оҳ дўстим, билсанг гар заминга эмас,
Менинг ҳаётимга тийрамоҳ келди.
Боғларда шовулла дарахтлар мунглиғ,
Ҳазонлар учмоқда мажруҳ ва ярим.
Йўқ, ҳазонлар эмас у сариқ рангли,
Менинг соғинчлардан сарғайган бағрим.
Феруза осмонда булут доғлари,
Қайдан келди дея бўлмагин хайрон.
Улар булут эмас менинг оҳларим
Кўкка кўтарилиб кезар саргардон.

2002



Кузда дарахтлар ҳам оғир ўй сураб,
Ҳаёлларга чўмар шоирга ўхшаб.
Гўё омад ундан кетган юз буриб,
Ёки севган ёри кетгандек ташлаб.
Қушлар сийраклашиб қолган туюлар,
Сайроқ кўшиқлари янграмас шодон.
Замин узра ғамгин наволар куйлаб,
Ҳазонлар тўкилар мисоли армон.
Учишдан ҳориган оққушлар мисол
Булутлар самодан боқишар хомуш.
Дарахтлар шоирга ўхшаб ўй сураб,
Рухида кечгандек буюк уйғониш.

09.04.04



ҲАМДАРДЛИК

Видолашув кўшиғини
Куйлаб ётар ҳазин боғ.
Солланади дов – дарахтлар
Дили вайрон, бағри доғ.

Айрилиқнинг ёшларидек
Ёға бошлайди ёмғир.
Бу боғ ичра йиғламасдан
Юрмоқлик жуда оғир.

Азиз боғим, ўксимагин,
Менинг ҳам кўнглим ярим.
Юрагимни сенга очсам,
Тоғдек келар дардларим.

Кел, дардингни менга сўйла,
Сўнгра тинглагил оҳим.
Энди бизнинг жонимизга
Тўзим берсин Аллоҳим.

11.09.2002й



Дарахтаги ҳилпираган яшил япрок,
Бир кун хазон бўлишини билармикан?
Кўзимни-ку тўлдиради бир кун тупрок,
Аммо менинг ғариб кўнглим тўлармикан?
Тунга менгзаб бормоқдадир кундузларим,
Осмонимда ғамгин боқар юлдузларим.
Нега эрта келдингиз сиз, ай, кўзларим,
Аммо менинг ғариб кўнглим тўлармикан?
Бу дунёда неки бор маҳв этилгайдир,
Ҳатто азим тоғлар жундек титилгайдир!
Рухим-ку ўз қафасидан қутулгайдир,
Аммо менинг ғариб кўнглим тўлармикан?

07.04.02

КУМУШ БАЛДОҚ

Балдоқ тақиб кумушранг ойдан
Кетар чинор уйкуга аста.
Кафтдек очик чинор баргига
Ой нурлари кўнар оҳиста.
Чор атрофни тутар сукунат,
Чулғаб олар оромбахш фарах.
Ойнинг кумуш ёғдуларида
Ором олар минг йиллик дарахт.
Юмиб олиб қабоқларини,
Чинор аста ухлаган чоғи.
Еллар – туннинг қароқчилари,
Олиб кетар кумуш балдоқни.

2003



ҚИШ МАНЗАРАСИ

Қор ёғади оппоқ ва майин,
Оқаради замин суврати.
Қор ёғади бирдам тинмайин-
Ёғилади Аллоҳ неъмاتي.
Йўл четида тизилган тутлар,
Оқ ипакдан кийишар кўйлак.
Қарғалар ҳам бир-бирин қутлаб,
Учиб юрар шўх кўшиқ куйлаб.
Болақайлар совуқни сезмас,
Қувнашади яхмалак отиб.
Тақинчокдек уйлар томида
Сумалақлар туради қотиб.

29.12.02.



Остонада турар янги йил
Болаларнинг қувончи чексиз.
Таърифлашга ожиз ҳатто тил,
Орзулари бир олам, тенгсиз.

Қорбободан совғалар кутар,
Шеър айтишар янги йил ҳақда.
“Вақт не учун оҳиста ўтар,
Қорбобожон ҳозир қаёқда?”

Болаларга ҳавасим келиб
Ёзар экан янги шеъримни.
Ёд этаман юрак- юракдан,
Ўтиб кетган азиз умримни.

6.12.05



ТАБИАТ ҚҰЙНИДА

Адирларни, қирларни кезсам
Қувватланар юрагим ҳар дам.
Нафис-нафис чечаклар терсам
Унут бўлар барча ташвиш ғам.

Пичирлашар майсалар сирли,
Қушлар мужда келтирар бахтдан.
Томчилайди раҳмат ёмғири,
Дарак бериб муқаддас аҳддан.

О, табиат сени англаган
Гўзаллигинг ҳис этгай дилдан.
Эрк ва ҳаёт салтанатида
Яшаганин сезиб кўнгилдан.

15.04.2014

ЯНГИ ЙИЛ ТИЛАГИ

Умримизнинг дарахтидан чирт узилди,
Яшнаб турган яна битта япроғимиз.
Яратганга шукроналар келтирайлик,
Ҳеч сўнмасин дилда умид чироғимиз.

Тилагимдир янги йилда барчамиздан
Савоб ишлар ҳамда ширин сўзлар қолсин.
Йил сўнгида эслаганда армон эмас,
Юракларда эзгуликдан излар қолсин.

11.01.2010й

III

Мозийга айланган йиллар



- *Эртанги болалар*
- *«Лисонут тайр»*
- *Алихонтўра Согуний хотирасига*
- *Рауф Парфи хотирасига*
- *Шавкат Раҳмон хотирасига*
- *Шавкат Раҳмоннинг армони*
- *Асқар Маҳкам хотирасига*
- *Халқ*
- *Тасанно*
- *Улус аҳволи*
- *Аҳд*
- *Ўзликка қайтиши*
- *Дорнинг оғочи*
- *Ҳурлик ҳақида*
- *Озод бўлиб яшаш учун*
- *Дидорлар хуш қолинг*
- *Шоир кўзларимда*
- *Мен кетаман*
- *Оламни кезаркан*
- *Яхшилик ҳақида*
- *Яхшиликнинг кўчаси*
- *Ҳар гал ўзим билан*
- *Болаликда Рўза ойлари*



ЭРТАНГИ БОЛАЛАР

Эртанги болалар ўткирроқ бўлар,
Пурқувват бўлади бизга нисбатан.
Улар ўз элининг бошини силар,
Эрк билан сийлайди уларни Ватан.
Халқини бошлайди улуғ йўлларга,
Туғ қилиб ўзига буюк аҳкомни.
Шавкатбек Раҳмонни унутмас сира,
Ва севиб ўқийди Асқар Маҳкамни.
Муқаддас заминнинг бағрида ётган,
Буюк авлиёлар уларни қўллар.
Чунки валийларни зикр қилишни
Абдулло Зухурдан ўрганар улар.

2004



«ЛИСОНУТ-ТАЙР»НИ ҮҚИБ

Самода чинқирар боболар рухи,
Авжига чиқаркан шайтоний иллат.
Англолмас панд берди қайси гуноҳи,
Минг йиллик тарихи бўлган бу миллат.

Улуснинг бўйнида укубат тавқи,
Дўзахий шаклда дунё намоён.
Одамда кадр йўқ, йўқ ҳаёт завқи,
Ердан кўтарилган инсофу иймон.

Одамий тилингни буткул унутиб,
Қушдек парвоз этсанг руҳлар баҳрига.
Ёки сайёралар бағрига учиб,
Танҳо кўним топсанг улар бағрида.

Тоат–ибодатни бажо келтириб,
Тинмай сажда қилсанг Ҳақ Таолога.
Одамий тилингни буткул унутиб,
Қушдек парвоз этсанг арши аълога.

2002.



АЛИХОНТЎРА СОҒУНИЙ ХОТИРАСИГА

Миллат юкин елкасида олиб юрган,
Маърифатнинг майдонида катта мерган.
Пайғамбарнинг тарихини ёзиб берган
Улуғ бобом элимизнинг посбони Сиз,
Юракларда армон бўлган достони Сиз.

Такдир сизни олиб кетди Қошғар томон,
Эл дардида яшадингиз ҳар лаҳза, он,
Армонингиз эди озод, хур Туркистон,
Улуғ бобом элимизнинг посбони Сиз,
Юракларда армон бўлган достони Сиз.

Ватан аҳли ҳар сўзингиз тинглар, суяр,
Тарих қилган хатоларни дилдан туяр.
Мардлар ўзи учун эмас эл деб куяр,
Улуғ бобом элимизнинг посбони Сиз,
Юракларда армон бўлган достони Сиз.

Саркардалик шиддати бор қонингизда
Хурлик ишқи жўш уради жонингизда.
Фарзанд бўлиб юрсам дейман ёнингизда,
Улуғ бобом элимизнинг посбони Сиз,
Юракларда армон бўлган достони Сиз.

17.07.06.



РАУФ ПАРФИ ХОТИРАСИГА

Бу юрт бағри ғам –қайғу бори,
Кундузлари фарқ этмас тундан.
Бор эди бир дарвеш шоири,
Бугун қолди айрилиб ундан.
Етти қават ер борар захлаб,
Осмон тинмай тўкар ёшини.
Шоирини севган дарахтлар,
Яшар мангу эгиб бошини.
Дилга жойлаб Ватан ёдини,
Озодликнинг тимсоли сўнди.
Куйлармикан элнинг дардини
Бирор шоир унингдек энди.
Шоирлик касб эмас, қисматдир,
Дард, алам бор ҳар бир ҳарфида.
Самодаги турналар ҳатто,
Видо айтар Рауф Парфига!

10.04.2005й

ШАВКАТ РАҲМОН ХОТИРАСИГА

Муқаддас айлаган Худо бу ерни,
Бу ерда улуглар арвоҳи кезар.
Эрк куши боғланган пўлат занжирни,
Қилич кесолмаса ўткир сўз кесар.
Зулфиқор руҳ билан яшадингиз сиз,
Мудом дилга тугиб ёруғ ниятни.
Ҳатто сўнгги йўлга кетар чоғингиз,
Уйғотиб кетдингиз буюк миллатни.

23.01.02.



ШАВКАТ РАҲМОННИНГ АРМОНИ

Зафарга эришди яна бир карра,
«Наҳсдан бино бўлган шайтанат» аҳли.
Ҳалқчи, қолаверади ўз фикри билан
Тилида захрию, дилида қаҳри.

Қай бир гуноҳ учун каффоратдир бу,
Адолат насими эсмас батамом.
Қанақа эркинлик, кафолатдир бу,
Ҳоқонлар бузғунчи, оломон авом.

Токай панд етайдир имонин сотмай,
Элим деб яшаган дарёдил мардлар.
Қолдими бу юртда сафсата сотмай
Тили ва дили бир бўлган жўмардлар?

Бўхтону игводан қилмасдан ҳазар,
Фитналар тўқилур, ҳукм ўқилур.
Алҳазар, алҳазар, минг бор алҳазар,
Номардлар устуну, мардлар йиқилур.

Эй, Худо, мен ожиз бандангни афв эт,
Сенга бўлсин барча ҳамду санолар.
Адолат насимин бизга насиб эт,
Ватанда янгрисин шодон наволар!

05.03.2010.



АСҚАР МАҲКАМ ХОТИРАСИГА

Ваҳдат водийсини тутди ҳазин куй
Кофарнихон оқди сокин, беисён.
Унинг соҳилига қайтди ушбу кун,
Бағри дарё шоир–муборак инсон.

Руҳи ором топди сўнги нафасда
Омонат вужудин берди тупроққа.
Кутулди меҳрсиз бу тош қафасдан,
Озодликка чиқди-қовушди Ҳаққа.

13.03.2007й



ХАЛҚ

Гарчи шеър олами самовий ҳислар,
Самовий туйғулар дунёси эрур.
Менга халқ ҳақида ёзгин десалар,
Исёнли туйғулар қуюлиб келур.
Халқнинг гарданига юклаб тузумни,
Тўралар юраркан кайфини суриб.
Халқининг дардидан қалби эзилиб
Шоирлар жон берар минбарда туриб.
Бағри кенг бу халққа қойил қоласан,
Асло нолимайди чиқиб майдонга.
Бир бурда нон топса қулдек суюниб,
Шукрона қилади буюк яздонга.
Қорни оч бўлса ҳам, кўзи тўқ мудом,
Ҳиммату саховат бобомеросдир.
Ўзи емай, ичмай, йиллаб қилиб жам,
Уч кунлаб тўй қилиб бериши ростдир.
Бундай буюк қалбли элдир ягона,
Буюклиги йиллаб топгандир сайқал.
Унинг меҳнатига, садоқатига,
Фақат шоирлари кўяди ҳайкал!

2003



ТАСАННО

Бирлашмаган эл доим хор бўлар, талош бўлар,
Бундай элнинг бағри доғ, кўзларида ёш бўлар.
Бўлар элнинг фарзанди ўн бешида бош бўлар,
Эл дардини тинглаган ўғлонларга тасанно,
Ҳақ йўлини англаган инсонларга тасанно.
Юз йилда бир дунёга келар эмиш буюк зот,
Адолат бўлган мулкда кўнгиллар ҳам бўлар шод.
Мардлар йўлбошчи бўлса ватан ҳам бўлар обод,
Эл дардини тинглаган ўғлонларга тасанно,
Ҳақ йўлини англаган инсонларга тасанно.
Сиз юрган бу тупроқда буюкларнинг изи бор,
Ортингизда миллатнинг минглаб қора кўзи бор.
Ҳасанбекнинг дилида сизга айтар сўзи бор:
Эл дардини тинглаган ўғлонларга тасанно,
Ҳақ йўлини англаган инсонларга тасанно.

19.08.2004

УЛУС АҲВОЛИ

Бунча ўртанмасанг ўзингни қийнаб
Улус аҳволидан қуйиб-ёнмасанг.
Яшасанг бўлмасми нафсингни сийлаб
Бунча ҳам исёнкор, саркаш бўлмасанг?
Яшасанг бўлмасми сурурга тўлиб,
Ўзингча шодмону, ўзингча масрур?
Не обрў топарсан сен қалқон бўлиб,
Ғақат сенда борми номус, ор, гурур?



Сен сира ишонма сӯзомол халққа,
Улар қалтис чоғда сӯзидан кечар.
Кеча Алмисоқда сӯз бериб ҳаққа,
Бугун шайтон берган томоқни ичар.

27 июль 2013-йил.

АҲД

Сокинлик истайди руҳим туну кун.
Етдими исённи енгмоқлик вақти?
Ислоҳ этгим келди бирма-бир бугун,
Хатога қоришиб суствлашган Аҳдим.
Бақир, чақирлардан фойда йўқ. Билдим-
Илдизи чуқурдир заққум дарахтин!
Шохи ҳам кенгайиб бормоқда илдам,
Аммо сафи сийрак бўйсунмас Аҳднинг!
Фожеа сирларин англамоқ учун
Мозийга айланган йилларга боқдим.
Аланга ўрнида бурқсирди тутун-
Чўғидан ўт олиб юракни ёқдим!
Энди ҳар лаҳзани ғанимат билиб
Ҳурлик малаклари-тоза дилларга,
Муқаддас бу чўғни жойламоқ керак
Токи шайлансинлар қутлуғ йўлларга!
Токи юракларда ёнган бу оташ,
Ҳеч қачон сўнмасин-шудир бош ғоя.
Токи манқуртликнинг темир қафасин
Эритиб ташлашга қилсин кифоя!

27 июль 2013-йил.



ЎЗЛИККА ҚАЙТИШ

Бугун аста кийдим бобомдан қолган
Занглар «нақш» солган темир совутни.
Ертўла тўридан муқим жой олган
Ўтдонга қайтадан қаладим ўтни.

Дами ўтмас бўлиб қолган қиличга,
Ўт билан сувда хўп обутоб бердим.
Беҳуда сочилиб ётган ўқ-ёйни
Эҳтиётлаб туриб бирма-бир тердим.

Йўл олдим отхонам сари оҳиста.
Пишқирган отимни силаб-сийпадим.
Эгар-жабдугини ўрнатиб аста,
Отни бўшатгандим-сакраб кишнади!

Ўйноқи от, айтгин, нечун кишнадинг,
Сездингми мендаги журъат-итобни?
Шу кеча билсанг гар қайта ўқидим
Бобомнинг мероси-қутлуғ Китобни!

27 июль 2013-йил.



«Ассалому алайкум, дорнинг оғочи»
«Кунтуғмиш» дostonидан
«Бош ўзи не керак эрки йўқ элга?»

Рауф Парфи

Эй, дор, сен туфайли неча золимнинг
Шаҳидлар хунида ювилган сочи.
То зулм, бор экан, ситам бор экан,
Қайга ҳам борардик биз сендан қочиб:
Ассалому алайкум, дорнинг оғочи!

Туркнинг бош авлоди Абу Турк Ёфас,
Унга тегишлидир туркларнинг тожи.
Тарих солиб турклар эркига қафас,
Уларни тарикдай ташлади сочиб:
Ассалому алайкум, дорнинг оғочи!

Кимки эрк истаюр, адолат истар,
Охири сен бўлдинг сўнги меърожи.
Эй, дор, «Кунтуғмиш»да илк бор жаранглаб,
Барча ҳақдилларга бердинг йўл очиб:
Ассалому алайкум, дорнинг оғочи!

Токи эл, улусда бирлик йўқ экан,
Токи талош экан элнинг хирожи.
Эрксиз бошимизни этгали қурбон,
Қошингга келурмиз кўкракни очиб:
Ассалому алайкум, дорнинг оғочи!

04.05.2012йил.



ҲУРЛИК ҲАҚИДА

Ҳурлик, озодлик деб курашиб ўтган
Азалдан миллатнинг зўр ўғлонлари.
Бири ғолиб бўлиб мақсадга етган,
Бири қувғин бўлган Ватандан нари.

Мен ҳам ўз-ўзимни савол айладим,
Хўш, бугун мен қулман кимнинг олдида?
Шунда рух қушимга панжара солган
Рақибларим келди кўзим олдида.

Мени сарсон айлаб етаклаб юрган
Асли, нафсим экан биринчи душман.
Шайтони лаъиндир гиж-гижлаб турган,
Шу иккисин енгсам, мен озод қушман.

11.02.2009й.



Озод бўлиб яшаш учун қалбимизда
Баъзан етмас журъатимиз, баъзан шуур.
Жумбоқларга тўла ҳаёт мактабида
Биз яшашни ўрганамиз бутун умр.

Рухимизда жилваланган илоҳий нур
Юксакларга чорлаб турар кўнглимизни.
Лекин маккор рақибимиз шайтон қурғур
Ҳар қадамда пойлаб турар йўлимизни.

2003



ДИЛДОРЛАР ХУШ ҚОЛИНГ

“Мени севган ёрлар хуш қолинг”

А.Маҳкам

Умр шоми яқиндир, дилдорлар хуш қолинг,
Бизга меҳр кўрсатган дўст- ёрлар хуш қолинг.
Гар йўқ эди заримиз, дилда кўпдир зоримиз,
Ҳиммати зўр, жавонмард ғамхорлар хуш қолинг.
Садоқатдан сўз айтиб сарсон бўлдик оқибат,
Меҳрини дариғ тутган маккорлар хуш қолинг.
Эл дардини дардим деб, доим миллат ғамин еб,
Она юртга бўй бўлган чинорлар хуш қолинг.
Зинҳор шону шуҳратмас шеър айтмоқликдан мурод,
Ватан мадҳин куйлаган ашъорлар хуш қолинг.
Ўтса Ғойиб дунёдан дардин айтолмай тамом,
Айтажаксиз сиз уни эй, ёрлар хуш қолинг. 31.10.09

ШОИР КЎЗЛАРИМДА ЯЛТИРАЙДИ ЁШ

Ҳовли орзу қилдим, бир кўркам ҳовли
Мевали дарахтлар экилган қатор.
Райҳонлар ифори таралиб майин
Шоир юрагимга илҳом бахш этар.
Ҳовуз бўйидаги супа устида
Ағанаб ётман хаёллар суриб.
Баланд кўтарилган ишком остида
Марварид узумлар турар осилиб.
Аста бош кўтариб машриқ тарафдан
Ҳовлимга ўз нурин сочади қуёш.
Рухланиб бу гўзал неъмат – шарафдан
Шоир кўзларимда ялтирайди ёш.



Кўнглим кўтарилиб бу кайфиятдан
Қидириб қоламан қоғоз, қаламни.
Ёқтирамай қоламан худи шу пайтдан,
Тош – бетон деворли совуқ хонамни.

26.09.2004й



Мен кетаман бир кун мардона
Сўзларимни дунёга бериб.
Мен кетаман нописандона
Бу дунёдан қаҳ-қаҳа уриб.
Мен кетаман бўлиб оввора,
Бир қиз йиғлар сочларин ёйиб.
Мен кетаман далли, девона,
Дунё кетар ҳайратдан ёниб.

май 2001



Оламни кезаркан ортди ҳайратим,
Дардим ортиб борди юрак боғида.
Англадим, умр ҳам олий неъматдир,
Дардни енгадирман илҳом чоғида.

Гарчи битилгандир тақдири азал,
Танлаш ихтиёри бордир бандада.
Комиллик йўлида юпанч шеър, ғазал,
Шеърдан кечгум ҳаққа етган паллада.

10.03.2012й.





ЯХШИЛИК ҲАҚИДА

Яхшиликнинг кенг кўчасида
Сийраклашиб қолди одамлар.
Хиёнатнинг тор кўчасида
Эшитилар гурс – гурс қадамлар.
Сигингандек бутга, санамга,
Курсиларга баланд иштиёқ.
Етмоқ учун мақсад, амалга
Хиёнат қўл келади кўпроқ.
Нафсу тамаъ исканжасида
Ўзлигини унутгай башар.
Яхшиликнинг кенг кўчасида
Иймони бут инсонлар яшар.



Яхшиликнинг кўчаси шунчалик ҳам тормикан?
Бу кўчада ҳозир ҳам бирор одам бормикан?
Нафснинг истак майлига эргашади одамлар
Яхшиликнинг йўлини танлаганлар хормикан?
Менимча яхшиликнинг кўчаси кенг ва ёруғ,
Фақат фарқламоқ керак яхшиликни ёмондан.
Бу кенг, ёруғ кўчага кирмоқ учун аввало,
Бохабар бўлмоқ керак иймондан, иймондан.

23.07.03.



Хар гал ўзим билан қолганда ёлғиз
Қалбимда соғинчлар уйғона бошлар.
Озурда дилимни хаёл кемаси
Болалик фаслимга боради бошлаб.

Бир-бир ўтар экан ўтган умримнинг
Ўзал лаҳзалари кўзим ўнгидан.
Илҳом ошно этар юрак-қумримни,
Мен яшай бошлайман яна янгидан.

2003й.



Болаликда Рўза ойлари
Юрар эдик Рамазон айтиб.
Йўлга чиқиб ифтор маҳали
Кеч кирганда келардик қайтиб.
Ҳадяларни тенг бўлишардик
Белбоғларни ўртага ташлаб.
Болаликнинг ширин онлари
Эртақларга кетарди ўхшаб.

2002й.

IV

Шерият



- *Кўнглим гулларини мен ишио этдим*
- *Навоий*
- *Менинг сўзим*
- *«Кичик дўрмон» илҳомлари*
- *Шоирлик*
- *Халқ шоирларига*
- *Шеърият*
- *Орзулари оппоқ элим*
- *Ўн олти ёш*
- *Ўйлар*
- *Шоир ва халқ*
- *Рост сўзни айтган марддир*
- *Шоирларга*
- *Тинчланаман*
- *Ораста юр*
- *Яшамогим шартдир*
- *Режасар тузаман*
- *Ўтиб кетар бир кун умр*
- *Ёмгир ёғар*
- *Ўттиз етти*
- *Иқрор*
- *Кайфият*
- *Яхшиликнинг ранги*
- *Офтоб кўкдан боқади*
- *Бир кун*
- *Туморим*
- *Йўли очиқ бўлсин*
- *Баъзан*
- *Қисмат тегирмони*
- *Бу кун кимга айтдинг*



КЎНГЛИМ ГУЛЛАРИНИ МЕН ИНШО ЭТДИМ...

Илоҳо, бандаи ожиз Ғойибман,
Шеърият сахнида ночиз Ғойибман.
Аммо умид бирла чекиб ранж, алам
Сенга роз айтмоққа тутдим мен қалам.
Чунки ноумидлик шайтонга хосдир,
Умид дилга қувват бериши ростдир.
Илк шеърий дафтарим атаб мен «Висол»,
Сенинг висолингни айладим тимсол.
«Рухим ранглари»да ботиб хаёлга,
Ўзимни илк бора тутдим саволга.
Мени мафтун этди сенинг жамолинг,
Гўзаллик бобида фазлу камолинг.
Сўнг умримда кечди «Уйғониш фасли»,
Рухимда бедорлик ва ёниш фасли.
Сен мени Мажнундек сарсон айладинг,
Кўйингда ошиғу ҳайрон айладинг.
Дилим соғарига ишқинг қуйилди,
Ҳар не кўрсам сенинг бўлиб туюлди.



Гоҳ Ватан ишқида, гоҳ ёр ишқида,
Гоҳ дилдор ишқида, дийдор ишқида,
Меҳру муҳаббатла мен ашъор битдим,
«Кўнглим гуллари»ни мен иншо этдим.
Ишонганим учун фазлингга сенинг,
Сўз айтмоқ истадим васфингга сенинг.
Шу ондан бошланди ҳижрон кунлари,
Ҳижронмас «Юракнинг маҳзун тунлари».
Кезиб юриб "Умр манзилларида",
Баҳра олиб назм қандилларидан.
Она халқим учун бўлсин деб ҳадея,
Дўстлик ришталари боғлансин дея.
Таржима ишига мен жазм этдим,
Қудратим етгунча мен назм этдим.
Тартиб бердим ўртаб озурда дилни
Китобим «Ҳажрида куйган кўнгил»ни.
Илоҳим, ниятга элтгувчи ўзинг,
Муродимни ҳосил этгувчи ўзинг.
Ожизона ёзган номаларимни,
Нома эмас, кўнгил ноаларимни.
Менга ҳам, элга ҳам сен таборак эт,
Ўқиган зотларга сен муборак эт!

27.05.2012йил



НАВОИЙ

1

Ишқ барқидан тушди менинг жонимга ўт,
Жон недирки тушди хонумонимга ўт.
Навоийни мутолаа айлаб эрдим,
Ҳоким ўлди ҳар лаҳзаю онимга ўт.

2

Васл умиди юрагимни ғарқ айлади,
Умидсизлик вужудимни тарк айлади.
Ёр сингари ёлғизлигин нажот йўли,
Англаб етгач Ёр ҳам мени дарк айлади.

3

Ҳам тану ҳам жондан мурод Ёр васлидир,
Бу ғанимат ондан мурод Ёр васлидир.
Рўзи маҳшар мақсадинг не деб сўрсалар,
Мен дегайман чекиб фарёд: Ёр васлидир.

06.12.08

МЕНИНГ СЎЗИМ

Болаликдан шеъриятга шайдо бўлдим,
Кўнглимга қул, ширин сўзга гадо бўлдим.
Адо бўлсам муҳаббат деб адо бўлдим,
Бойлик истаб қўлга қалам тутганим йўқ.
Инсон сабаб ҳар яхшию ёмонларга,
Лекин айбни ағдаради замонларга.



Ким юзини бурмаса эл томонларга,
Мен уларни мардга қиёс этганим йўқ.
Фахрлансам арзир юртим, элим билан,
Шу юрт меҳри лим-лим тўлган дилим билан.
Эл дардини куйлаб ўтсам шеърим билан,
Бахтлидирман, ўзга бахтни кутганим йўқ.

2002й

«КИЧИК ДЎРМОН» ИЛҲОМЛАРИ

Болаликдан зўр ҳавас билан
Шоирликни қилгандим орзу.
Хаёлимдан Дўрмон боғларин
Кечар эди баҳору ёзи.
Илҳомланиб гўзал шеърлардан
Шеър ёзардим мен ҳам гоҳида.
Эҳ, қанийди юрсайдим, дердим,
Мен ҳам шоирларнинг сафида.
Йиллар ўтиб мана ушалди,
Қалбимдаги у гўзал армон.
Турғун ака чойхонасини
Атадик биз «Кичкина дўрмон».
Бунда ширин суҳбат, шеърлардан
Ором олиб яйрайди диллар.
Умид борким, бу нафис мажлис
Давом этар яна кўп йиллар.

17.05.2004.



ШОИРЛИК

Шоирликни маддоҳлик билиб,
Қалам тутган булҳаваслар кўп.
Топган сўзни қофия қилиб,
Мадҳиялар ёзишар тўп-тўп.
Англолмаслар, шоирлик асли,
Худо берган дарддир, жабрдир.
У таъмага бўлмагай таслим,
Шоир қалби улкан қабрдир.
Фақат ёниб битса ярашар,
Она юртни куйлаб қасида.
Шоир таъма либосин ташлар,
Шеърятнинг бўсағасида.

06.04.02.

ХАЛҚ ШОИРЛАРИГА

1

Азалдан шарафли кордир шоирга
Турунда халқ учун жондан кечмоқлик.
Муслмон ўлкада ордир шоирга
Подшоҳлар соғлиги учун ичмоқлик.

2

Иқболи пастликдир, шармандалиқдир
Элнинг аҳволдан кўз юмар бўлсак.
Рост сўзни айтиш ҳам бугун мардликдир-
Боқийлик топармиз Ҳақ йўлда ўлсак!



3

Токи эл зулмдан қутулмас экан
Чумчуқ юрак экан халқ шоирлари,
Зулм кишанлари ечилмас экан
Обод бўлмагайдир Турон ерлари!

12.10.2013-йил

ШЕЪРИЯТ

Шеърият, сен менинг тириклигимсан,
Сенсиз ўтган умрим тенгдир ўлимга.
Борган сари сени қанча кўп севсам,
Шунча ғов кўпайиб борар йўлимда,
Ҳар битта мисрамда яшар умримнинг
Вақтни енгиб ўтган гўзал дамлари.
Эҳ қанча фурсатни бой бериб қўйдим
Банд этган чоғида турмуш ғамлари.
Токи мавжуд экан дилда иштиёқ,
Машъалдек кўтаргум шеър яловини.
Мен енгиб яшайман ғовларни, бироқ,
Топа олсам басдир сўз каловини.

18.02.2011



ОРЗУЛАРИ ОППОҚ ЭЛИМ

Ўзбекнинг ҳовлиси кўркам бўлади,
Ўзининг жамбилу райҳони билан.
Муаттар атридан кўнгил кулади,
Уйлари гўзалдир айвони билан.
Ўзбекнинг тили ҳам шакардан ширин,
Аския, ҳазили дилларга ёқар.
Катгаю кичиги сизлар бир-бирин,
Қалбида меҳрнинг дарёси оқар.
Ўзбекнинг уйи ҳам мудом бозордир,
Бир этак ўғилу қизлари билан.
Орзулари оппоқ, ниятлари соф,
Меҳмон кутар нону тузлари билан.
Ўзбекнинг тушига жаннатлар кирар,
Эзгулик безайди хаёлларини.
Ўзбек аёллари гулларни севар,
Эрлари севади аёлларини.

08.2005



ЎН ОЛТИ ЁШДАМИЗ

Ўн олти ёшдамыз дўстларим бугун
Қувонч шодлигимиз сиғмайди танга.
Хаёллар бир нафас бермайди тиним,
Юракда туйғулар олар аланга.

Ўн олти ёшдамыз дўстларим бугун.
Болаликнинг сўнгги ёшидамыз биз.
Бизни кутаётир зафарлар муштоқ,
Зафарли йўлларнинг бошидамыз биз.

Кириб бораяпмиз боқий ҳаётнинг,
Қувончу ташвишли қучоқларига.
Кириб бораяпмиз биз ҳиссиётнинг,
Чўғи яшнаб турган ўчоқларига.

1984й.



ҲҲЛАР

Чексиз ҳасратларнинг ғариб макони-
Кўнглим дардларига излайман дармон.
Англайман умрнинг етгач хазони,
Ёшлик бўлар экан энг буюк армон.
Бир пайтлар баҳорий ёмғирдек шошқин,
Тошқин дарёлардек жўшиб, ўйноқлаб,
Мен шеърга солардим ёруғ ҳисларни,
Юлдузлар сафидан топиб, сўроқлаб.
«Мукамал кўрмоқчи бўлиб дунёни»¹
Интилиб яшадим ёруғ кунларга.
Юракдан улашиб меҳр–зиёни,
Умримни қизғандим қаро тунларга.
Аммо нима топдим, нега эришдим,
Фақат дардмандликни топди юрагим.
Халқнинг бахти дея доим талашдим,
Эзгу, буюк эди дилда тилагим.
Йўқ, йўқ. Мен бахтлиман, жуда бахтлиман.
Кўнглим буюрганин ёзолдим ҳар он.
Демак, яшаш учун ҳали ҳақлиман,
Демак дардимга ҳам топаман дармон.

2003.

1. А. Орипов сатри.



ШОИР ВА ХАЛҚ

Қизик бўлар шоирлар жуда
Бир-бирини тушунмас сира.
Баҳлашарлархуда-бехуда,
Таъъларини қилишиб хира.
Гўё улар айтган сўзидан,
Ҳал бўлади халқнинг ташвиши.
Халқ югурар пулнинг изидан,
Шоир билан ҳатто йўқ иши.

26.12.02.

РОСТ СЎЗНИ АЙТГАН МАРДДИР

Арслон изидан қайтмас, йигит сўзидан дерлар
Лафзи йўқ зотлар мудом халқнинг бошига дарддир.
Яхши-ёмон кунларда марду номард билинар,
Қилич келса ҳам бошга рост сўзни айтган марддир.
Ҳақ ризосин топмоқлик ҳар бандага қарз эрур,
Бу бизга Яратгандан фарз бўлган буюк ахддир.
Ваъдага вафоси бор дилларда жўшар сурур,
Қилич келса ҳам бошга рост сўзни айтган марддир.
Ёлғончи, мунофиқни Ҳақ ҳам, ҳалқ ҳам севмагай.
Ёруғ юзла яшамок нақадар олий бахтдир.
Имони бор инсонлар то абад кам бўлмагай,
Қилич келса ҳам бошга рост сўзни айтган марддир.

19.01.05



ШОИРЛАРГА

Ҳаёт давом этаркан мудом,
Янгиланар заминнинг юзи.
Неча- неча шаҳар, қишлоқни
Вақт шамоли кетади бузиб.
Улар кетар мозий қаърига,
Номини ҳам эсламас башар.
Лекин тарих китобларида
Шоири бор қишлоқлар яшар.

24.05.2003.



Тинчланаман шеърга кўчириб
Юрагимнинг ларзаларини.
Сатрларга бераман бўлиб,
Ўз умримнинг лаҳзаларини.
Умр тангри берган омонат,
Бир кун келар унинг поёни.
Лекин мангу яшар умримнинг
Сатрларда акс этган они.

28.12.02



Ороста юр, озода кийин,
Ўзингни тут, окшому сахар.
Кўникмасанг бўлади қийин,
Қабул қилмас сени бу шаҳар.
Дардинг бўлса ичингга ютгин,
Ҳар даврада юрмагин айтиб,
Ҳаммасидан воз кечиб буткул
Мен Боғбонга кетаман қайтиб.
Нимага ҳам эришдим, бу тош—
Шаҳарларга умримни бериб.
Бахтли эдим юрганда бебош,
Адирларда бойчечак териб...

26.12.02.

ЯШАМОҒИМ ШАРТДИР

Мени қуршаб олиб тинчлик бермайди,
Қайғу ҳасратларнинг кучли еллари.
Кўзим очмоқликка имкон бермайди,
Таъна, маломатнинг қора дўллари.
Мени қуршаб олиб, тинчлик бермайди,
Бу еллар эдилар қайси томондан?
Фарёд чекай десам- фойда бермайди,
Таъна эшитаман яхши, ёмондан.
Теграмда айланар қайғу еллари,
Қисматим шу экан, иложим қанча.
Тош келса кемириб, сув келса симириб,
Яшамоғим шартдир энди ўлгунча.

01.02.2010й



Режалар тузаман эртани ўйлаб,
Бугунимдан асло кўнглим тўлмайдди.
Кечаги кунларим тушса ёдимга,
Чексиз армонларнинг доғи қийнайди.
Умрим ўтиб борар мана шу тахлит,
Қатра ором йўқдир менинг жонимда.
Ўтмишу келажак қилади тахдид,
Яшамокчи бўлган ҳар бир онимда.

03.02.03



Ўтиб кетар бир кун умр-туш,
Эрта тонгда уйғониб кетгум.
Шунда балки инжа руҳимнинг
Маъносини ҳам англаб етгум.
Узиларман ернинг қарзидан
Топширарман унга вужудни.
Бандиликда яшаш тарзидан
Олиб кетгум ёлғиз сужудни.
Тарк этмаса дилни умидим,
Ҳамроҳ бўлса иймон, эътиқод.
Юксакларга парвоз этарман
Юз очади абадий ҳаёт.
Сокин тунлар кезаркан руҳим,
Коинотлар, қитъалар аро.
Сени асло эслагим келмас
Гуноҳларга бошлаган дунё.

2011



Ёмғир ёғар тун бўйи тинмай,
Бўйсиниб тангрининг амрига.
У тонгни соғиниб ёғади,
Йиғлайман кўшилиб ёмғирга.
Тун бўйи чак-чаклаб ёғади,
Дардим-да тўкилар тун бўйи.
Бағримни соғинчлар ўртайди,
Мен тонгни кутаман шу куйи.

04.09.2005



Ўттиз етти, ўттиз етти,
Ярим умрим ўтиб кетди.
Осмон эди кўзлаганим,
Вафо эди излаганим,
Тақдир ҳукми бешафқатдир,
Армон бўлди сўзлаганим.
Ўттиз етти, ўттиз етти,
Ярим умрим ўтиб кетди,
Бу шум рақам ёқмас сира,
Қийнар мунгли бир хотира.
Кўз олдимда гавдаланар,
Қатағон йил ғира-шира.
Ўттиз етти, ўттиз етти,
Ярим умрим ўтиб кетди.
Битта савол қийнар чунон,
Жавоб топмай ўртанар жон.
Ўлсам мени эслагулик,
Қолдирдимми бирор нишон?!

14.06.05





ИҚРОР

Ҳайиқмасман ёвлардан аммо,
Дўстларимдан кўрқаман бироқ.
Неча дўстим ёнимда юриб,
Кўкрагимга қадади пичоқ.
Айб ўзимда, дея, ҳар қалай,
Мен кечирдим уларни бесўз.
Янги дўстлар топдим бир талай,
Ёвдан бадтар меҳру вафосиз.
Ва англадим бу олам аро,
Битта дўст бор, бор битта ғаним-
Ягона дўст ўзингсан, Худо!
Шайтон эрур асл душманам.

08.08.2004й

КАЙФИЯТ

Баъзан тоғларнида талқон қилгудай,
Ўзимда катта бир кучни сезаман.
Баъзан эса ғариб бир мусофирдай,
Ғамгин сатрларла шеърлар ёзаман.
Гоҳ қувнаб юрсакда, гоҳида ғамгин,
Қалбимизда мудом соф бўлсин ният.
Инсоннинг ҳар қандай ҳаракатини,
Бошқариб турувчи асли кайфият.

2006



ЯХШИЛИКНИНГ РАНГИ

Яхшиликнинг ранги аслида
Камалакдек ранг-баранг, порлоқ.
Қора ранг ҳам гўзалдир жуда,
Ёмонликнинг ранги йўқ бироқ.
Бўлиб бериш керак бўлса гар,
Ҳар бир рангга битта фазилат.
Иккиланмай ҳар битта рангга
Эзгуликдан тақардим зийнат.
Қизил рангда товланар шафқат,
Ям-яшилдир савобнинг ранги.
Хайриҳоҳлик энг мовий хислат
Шундан ҳаёт гўзал ва рангин.
Инсоф азал бинафша тусли,
Оппоқ эрур меҳр-оқибат.
Сариқ рангга менгзайди соғинч,
Қора рангда соғлом рақобат.
Хуллас, жами ранглар аслида
Яхшиликнинг йўлида чирок.
Қора ранг ҳам гўзалдир жуда
Ёмонликнинг ранги йўқ бироқ.

2003.



Офтоб кўқдан боқади ҳорғин,
Кезиб юрар кузнинг шарпаси.
Замин узра тўшалар сўлғин,
Хазонларнинг заррин кўрпаси.
Хазон топди яна бир йилинг,
Мустаҳкам бўл, қалбим қўрғони.
Куз бу асли ўлим ҳақдаги,
Сабоғидир кўҳна дунёнинг

2002

БИР КУНИ

Бир куни хазонлар пойимга
Поёндоз мисоли тўшалгай.
Сарғайиб тош қотган армоним,
Бир куни тупроқдек ушалгай.
Бир куни бу хаста вужудим,
Рухимни қўйворар қафасдан.
Тириклик занжири узилиб,
Кетгуси энг сўнги нафасдан.
Кетарман тарк этиб заминни
Қуш каби учарман арш томон.
Мўминлар айтишгач «Омин» ни,
Рухимда бир байрам бошланар...

2001.



Ўзинг асра мени туморим
Нажотгоҳим, содиқ ҳамроҳим.
Сўнди қалбда умид чироғим
Худойимга етмади оҳим.
Ортда қолди ёруғ ўйларим,
Йўлларимда хира туманлар.
Одамлармас мени гўёки
Ўраб олган чаён, илонлар.
Ўзинг асра мени туморим,
Узоқлатгин бир зум фироқни.
Токи аста ортга қайрилиб,
Ёқиб олай ўчган чироқни.

2001



Йўли очиқ бўлсин йигитнинг илло,
Умидли дунёда эртаси бўлсин.
Баъзан омад ундан тушса ҳам айро,
Қадди дол бўлмасин, елкаси бўлсин.
Турли тасодифга тўладир дунё,
Баъзан сийлар, баъзан қаттиқ ранжитар,
Йўли очиқ, бўлса йигитнинг илло,
Ҳаёт залворини елкада тутар.

2003.





Баъзан ҳаёт менгзайди дорга
Яшамокдан қолади кўнгил.
Ҳиёнатнинг тиконларига
Дош беролмас умр-нозик гул.
Шунда ўздан сўрайман ахир
Бу дунёга келганмиз нечун?
Ахир бизни яратган Яздон
Мўжизалар яратмоқ учун.

2003.

ҚИСМАТ ТЕГИРМОНИ

Ҳамроҳ бўлиб гоҳо яхши, ёмон билан
Гоҳо шодлик, гоҳо алам, армон билан.
Муросада яшамокқа маҳкум инсон
Ўзи яшаб турган даври замон билан.
Умр йўли баъзан равон, баъзан эса
Тўсилгандир турфа қиру довон билан.
Кимга омад қулиб боқса, ғолиб ўша,
Уйғунликда яшагайдир жаҳон билан.
Дунё қисмат тегирмони, омадлидир
Бу дунёда ким яшаса иймон билан.

13.07.2012йил

*«Бу кун кимга айтдинг,
Кимларга айтдинг?
Баъзан одам эмас, шоирлигимни».*

Асқар Маҳкам.

Бу кун кимга айтдинг?
Кимларга айтдинг?
Мен сенга ишониб айтган сиримни.
Бу кун кимга айтдинг?
Кимларга айтдинг?
Танҳо сенинг учун айтган шеъримни.
Бу кун кимга айтдинг?
Кимларга айтдинг?
Дунё деб оримдан кечмаслигимни.
Бу кун кимга айтдинг?
Кимларга айтдинг?
Хатто сенинг учун ичмаслигимни.
Бу кун кимга айтдинг?
Кимларга айтдинг?
Гоҳида шайтондан мағлублигимни.
Бу кун кимга айтдинг?
Кимларга айтдинг?
Айбим-бир озгина мағрурлигимни.
Бу кун кимга айтдинг?
Кимларга айтдинг?
Мен ҳам хом сут эмган бир бандалигим.
Бу кун кимга айтдинг?
Кимларга айтдинг?
Худонинг олдида шармандалигим...
Бу кун кимга айтдинг?
Кимларга айтдинг?

2013 й

V

Жигарбандларим



Аждодларимизнинг пок рухларига бағишланади

- *Мирзобек бобомнинг армони*
- *Давронбек бобомнинг армони*
- *Қамчинбек бобомнинг армони*
- *Наманган согинчи*
- *Гарчи Ватан*
- *Куйлаганда*
- *Илтижо*
- *Согинч*
- *Буюк давлат*
- *Онамни согиниб*
- *Қшилогимга кириб бораркан*
- *Онам тирик бўлганида*
- *Изтироб*
- *Богбонқшилоқ ҳувиллаб қолди*
- *Онам хотирасига*
- *Бошимга савдолар юбрди*
- *Дуо қилинг азизлар*
- *Янгаларим*
- *Ўзларингиз*
- *Она*
- *Дуолари қалқон онам*
- *Опам ва поччамга*
- *Марсия*
- *Орзу*
- *Одам*
- *Тилак*
- *Ватан бахти*
- *Қизим Наргизага*
- *Ўғлимга насиҳат*
- *Ўғлим Маъмуржонга*
- *Ўғлим Маъруфжонга*
- *Жасурбекка*
- *Кўнглим гули*
- *Ўғит*



МИРЗОБЕК БОБОМНИНГ АРМОНИ

Юртни босди насл – насабсиз,
Диёнатни унутган каслар.
Мени сотди қўрқоқ, иймонсиз,
Тузим ичган у зоти пастрлар.
Йўлга тушдим пою пиёда,
Бошим олиб кетдим мен сендан.
Молу мулкни нетгум дунёда,
Бағрингга гар сиғмасам, Ватан.
Сарҳадингдан мен кетдим йироқ,
Қўниб топдим фақат шу жойда.
Қамишзорлар босган бу тупроқ,
Ватан, сенга жуда ўхшайди.
Мен ишладим, тинмай ишладим,
Айлантирдим юртни чаманга.
Узун тунлар кўрган тушларим,
Сен ҳақингда бўлди Наманган.
Ота-онам хоки бор сенда,
Рухим сенда, гарчи бунда тан.
То қиёмат ёнгум кўйингда,
Пешонамга сиғмаган Ватан.

2001



ДАВРОНБЕК БОБОМНИНГ АРМОНИ

Қора кунлар келди чинакам
Осмон узок, ер қаттиқ бўлди.
Наҳот юртда йўқ одил ҳакам
Дашти қипчоқ қабрга тўлди.
Акам, менинг мард, ботир акам
Бошинг олиб қайларга кетдинг.
Дилни тиглар бир аччиқ алам,
Қай ўлкага, манзилга етдинг?
Қайга борай бу ердан кетиб,
Укам сари бормоқ таҳлика.
Тақир чўллар, тоғлардан ўтиб
Топарманми мен сизни ака?
Бу юрт нега бунчалар сабил,
Бу юрт нега ғафлатда қотган?
Қайси айби учун бу халқни,
Тангрим томуғ-дўзахга отган?!
Акам, менинг мард, ботир акам
Юриб-юриб сизни топарман.
Баланд тоғлар бағрида қолиб
Ватан, сени мен яратаман.

11.03.2001йил



ҚАМЧИНБЕК БОБОМНИНГ АРМОНИ

Миллатчи деб атабсан мени нокас,
Миллатимни жондан азиз кўраман.
Бой одамнинг фарзандиман бу ҳам рост,
Шунинг учун назарим тўқ юраман.
Не истайсиз эй, кўзи оч нокаслар,
Аллоҳ севиб имон берган элимдан?
Оқ, қизилга бўлинган ғофил каслар,
Қийнасанг ҳам қайтмагайман йўлимдан.
Ўз беклари бирлашмаган ўлкада
Хазон бўлди жаннатмакон боғ-роғлар.
Бўлинганни бўри еди йўлкада,
Ёпирилиб келди қўшқалла зоғлар.
Биз алдандик сиёсатнинг макрига,
Асли оқ ит, қора ит ҳам бир бўлди.
Эрк истасанг агар халқим дунёда,
Бир ёқадан бош чиқариб юр энди.

2001йил.



НАМАНГАН СОҒИНЧИ

Наманган, қайдасан боргим келодир,
Олма, ўригингни тергим келодир.
Олма, ўригингни кўзимга суртиб
Давру давронимни сургим келодир.
Наманган, гулларга тўлган диёрсан
Азалдан севимли бўлган диёрсан.
Бобомнинг армони менга ҳам ёрсан
Боғингдан гулларинг тергим келодир.
Наманган, сойларинг сувларга тўлди
Сув эмас сой тўла кўз ёшлар бўлди.
Юрак тўла соғинч, армонлар қолди,
Армоним дунёга ёйгим келодир.
Наманган, эврилиб нурга замонлар,
Кўркингдан яшнагай давру давронлар.
Мен ҳам ошиб бир кун тоғу довонлар
Бағрингда бир умр қолгим келодир.

2001.



Гарчи ватан туғилган тупрок,
Лекин тортар аждодлар қони.
Соғинаман мен сени кўпрок,
Боболарим қутлуғ маскани.
Муҳаббатинг тарк этмас дилни,
Сен оловсан қалбимда ёнган.
Машраб каби соғиндим сени,
Боболарим шаҳри Наманган.

25.10.05



Куйлаганда ҳофизлар жўшиб,
“Наманганнинг олмаси”-н ҳар чоғ.
Жўр бўламан мен ҳам қўшилиб,
Кўнглим яшнаб кетар мисли боғ.
Соғинчларим тўкила бошлар,
Ҳил-ҳил пишган олмалар янглиғ.
Кўзларимдан сизилар ёшлар,
Борай десам йўлларим боғлиқ.

2005.

ИЛТИЖО

Хазон фасли тиним билмай ёққан ёмғирлар мисол,
Кўзларимда ёшларим шашқатордир, шашқатор.
Юрагимни ғам булути ўртагай тун- кун эзиб,
Хаёлимни ота-онам хотираси банд этар.
Дилга ором тополмайман, келаверар бўзлагим,
Титроқ тутар совуқларга дош бермас бу танамни.
Ота-онам меҳрин қўмсаб, дийдорини излагум,
Рахматингга олгин тангрим, менинг ота-онамни.
Ота-она давлат экан, қиёси йўқ бир давлат,
Афсус қадрин билмагаймиз улар тирик чоғида.
Тангрим, сендан тилайдирман тирикдирман то абад:
Қабрларин боғча айла жаннатингнинг боғидан.
Ётган жойин тупроғини айлантир пар тўшакка,
Ҳавзи Кавсар сувидан бер, эшит менинг ноламни.
Бу дунёдан яхшиликни кўрмай кетишди улар,
Рахматингга олгин тангрим, менинг ота-онамни.



Суюкли зот шафоатин насиб айла уларга,
Ҳисоб чоғи ўнг томондан бер номаи аъмолин.
Пулсиротдан ўтган чоғда чироғ бўлсин иймони,
Қиёматда сен улардан дариг тутма жамолинг.
Қодир эгам, Раҳимдирсан, Раҳмондирсан сен ўзинг,
Қудратинг-ла яратгансан ўн саккиз минг оламини.
Гарчи ожиз бир қулингман, эшит менинг дил сўзим:
Раҳматингга олгин тангрим, менинг ота-онамни.

04.03.2012й.

СОҒИНЧ

Тушларимга кирмай қолсангиз
Соғинаман сизни, дадажон.
Бажардимми бурчимни дея,
Изтиробда ўртанади жон.
Баъзан тунлар уйқум келмайди
Ташқарида юраман дайдиб.
Юрагимда қуёш кулмайди,
Киргим келмас хонамга қайтиб.
Субҳидамда қабрингиз сари
Йўл оламан қийнар армонлар.
Хотирамдан кечади бир-бир
Биргаликда ўтказган онлар.
Ҳар гал сизнинг пойингизда жим
Ҳаққингизга қилганда дуо,
Ғамдан адо бўлган қалбимга
Қуёш соча бошлайди зиё.

2003.



БУЮК ДАВЛАТ

Умид билан оқ ювади, оқ тарайди.
Фарзандим деб эркалайди, куйинади.
Ота-она қандай буюк давлатлиги
Фақат улар ўтгандан сўнг билинади.

Бир бурда нон ё ширинлик топса агар,
Ўзи емай фарзандига илинади.
Ота-она қандай буюк давлатлиги
Фақат улар ўтгандан сўнг билинади.

Рўзгор деймиз, юмуш деймиз, югурамиз,
Бизлар учун булар муҳим туюлади.
Ота-она қандай буюк давлатлиги
Фақат улар ўтгандан сўнг билинади.

Бир боргина эшитсам деб овозларин,
Соғинчлардан юрак бағрим тилинади.
Ота-она қандай буюк давлатлиги
Фақат улар ўтгандан сўнг билинади.

09.02.2005.



ОНАМНИ СОҒИНИБ

Қабрингизда очилибди райҳон, она,
Юрак бағрим изтиробдан вайрон, она.
Сизсиз умрим боғи сарик, хазон она,
Кӯз ёшимдан тўлди сою сайҳонона.
Боғбон қирга яна баҳор қайтиб келди,
Қалдирғочлар кўшиғига олам тўлди.
Йўлингизда икки кўзим гирён бўлди,
Наҳот энди сизни кўрмоқ армон, она.
Бир сиз билан қаро тупроқ тўярмиди?
Мен йиғласам бирор инсон куярмиди?
Мени сиздек бирор инсон суярмиди?
Пойингизга бўлай ўзим қурбон, она.
Энди менинг бошларимни силайди ким?
Сахарларда менга оқ йўл тилайди ким?
Бир кун ўлсам «ўғлим»дея йиғлайди ким?
Сиз эдингиз бошимизга посбон, она.
Айтган билан битмас дардим, ожиз тилим,
Ҳасратларга тўлган менинг оҳ, бу дилим.
Соғинчлардан бағрим бўлди тилим-тилим,
Кӯз ёшимдан тўлди сою сайҳон, она.

20.03.02.



Қишлоғимга кириб бораркан
Ҳовлимизга яқинлашган дам,
Мени кутиб ўлтирган каби
Туюлади, меҳрибон дадам.
"Ўғлим, яхши келдингми?" -дея,
Тикилгандек кўзимга оғир.
Йўл бошлайди ҳовлига қараб,
Оҳ, соғинчдан юрагим оғрир.
Ўтар экан остона ошиб,
Бир нур чулғар сеҳрли, жозиб,
Ана, тахта сўри устида
Бувим кутар дастурхон ёзиб.
"Болажоним, келасан дея,
Ёпиб қўйдим сенга иссиқ нон.
Кўзларингдан бувинг ўргилсин,
Кел, бағримга босай, болажон!"
Оҳ, қадрдон она масканим,
Ширин хотиралар кўргони.
Ҳар гал сенинг бағрингга келсам,
Ота-онам келар кўргани.
Ҳовлидаги райҳонзор бўйлаб
Онам ташлар оҳиста қадам.
Уфқларга тикилиб ўйчан,
Хаёл суриб ўлтирар дадам.

16-17.2009.



Онам тирик бўлганида
Ғам нелигин билмас эдим,
Онам тирик бўлганида.
Асло бемор бўлмас эдим,
Онам тирик бўлганида.
Кутганимиз меҳмон эди,
Ҳовли тўла райҳон эди
Ҳар ишда бош, сорбон эди
Онам тирик бўлганида.
Опаларим инок эди
Укаларим қувноқ эди,
Йўлларимга муштоқ эди,
Онам тирик бўлганида.
Шоир эдим, оқин эдим,
Олов эдим, чақин эдим,
Мен жаннатга яқин эдим,
Онам тирик бўлганида.

27.12.05.





ИЗТИРОБ

Юпанч йўқдир дил тугёнига,
Жудоликдан эгилган бошим.
Мўминхўжа қабристониди,
Ётар менинг ою қуёшим.

Ҳаётимнинг юлдузи сўнган,
Осмонларим булутли, хира.
Юрагимни тилгани тилган,
Зулфиқордек кескир хотира.

Тополмайман энди сўроқлаб,
Кўзларимдан сизилар ёшим.
Қизғалдоқдек бағримни доғлаб,
Ботиб кетди ою қуёшим.

2002.



Боғбон қишлоқ хувиллаб қолди,
Ўтиб кетди қанча азизлар.
Юрагимнинг қабатларида
Қолдиришиб муқаддас излар.
Болаликни эсларкан ҳар гал,
Қалбим ўксиб кетар аламдан.
Муслим момо, Саодат хола,
Бувим, дадам ўтди оламдан.
Бир болага етти маҳалла
Ота-она деган гап ҳам бор.
Хаёлимдан ўтиб туради
Қўшниларим сиймоси такрор.
Боғбон қишлоқ мунис бағрингга
Келиб яна яйраб овундим.
Қайда бўлмай, қаерга бормай,
Сени кўмсаб сени соғиндим.
Қалби дарё одамларингдан
Меҳр кўриб ғазаллар битдим.
Фақат сенинг бағрингдагина
Мен ўзимни енгил ҳис этдим.
Ҳали ҳануз кўмсайди юрак,
Илк мактабга борган дамларни.
Илк муаллим - Ражабов домла,
Ва Нурали муаллимларни.
Боғбонқишлоқ ота-онамдан
Менга қолган ёдигорликдирсан.
Бу дунёга келиб топганим
Бойликларим ичра бир дурсан.

03.08.08.



ОНАМ ХОТИРАСИГА

Эрта баҳор. Қошинга келдим.
Хас-хашакни оралаб ўтиб.
Хазон босган юрагим билан
Манзилингга келдим мен етиб.
«Она» дейиш нақадир оғир
Совуқ, қора қабрга боқиб.
Кўзларимдан ёшларим оқар
Ўт-ўланга, бағримни ёқиб.
Тақдирнинг тор кўчаларида
Она сенсиз бўлдим оввора.
Кўзларимга дунё қоронғу
Баҳор келди, аммо, дил- пора.
Она, ҳали Боғбон қирлари
Яшилликдан киймади либос.
Сайрагани йуқ қушлар ҳануз,
Гўё баҳор энди бахт эмас.
Кўнглим ўксиб бўзлагим келар
Уввос солиб, дардларим айтиб.
Мўъжиза юз берсайди қошки,
Қошки, она, келсайдинг қайтиб.
Сизсиз ёлғиз қолдим мунғайиб,
Бошимни-да силамас ҳеч ким.
Ўтиб кетар бўлсам дунёдан
«Болам» дея йиғламас ҳеч ким.

26/07/12.



БОШИМГА САВДОЛАР ЮБОРДИ ХУДО...

Бошимга савдолар юборди Худо
Бандам етсин деб ҳаёт қадрига.
Неча азизлардан айлади жудо
Хўрсиниб боқурман улар қабрига.

Гоҳ йўлдан адашдим, гоҳо тойилдим
Балки англолмадим ҳаёт қадрини.
Гоҳ панд берди менга тўғри сўзлим
Гоҳ тортдим вафосиз дўстлар жабрини.

Аммо ҳақиқатни сўйладим доим,
Шунданми йўлларим ранжли ва пурғам.
Ёшим ўтганида тушуниб етдим
Бу нокас дунёнинг доим бири кам.

Менда на имкон у на сарват бисёр
Дунёнинг камини тўлдирай десам.
Шукр, алп қоматли икки укам бор-
Тобутим кўтарар бир куни ўлсам...

26.10.2013-йил.



ДУО ҚИЛИНГ АЗИЗЛАР

Бир укамга қарасам ёдимга тушар отам,
Бир укамга қарасам тоғам келар ёдимга.
Онажоним сиймоси пайдо бўлар дам ба дам,
Жиянларим югуриб келар экан олдимга.
Қизимнинг юзларида опамнинг чиройи бор,
Ўғлимнинг келбатида бордир отам суврати.
Кўзларида юлдузи, юзларида ойи бор,
Фарзандларим хулқида бордир бобом сийрати.
Инсон яшар абадий авлодлар сиймосида,
Ёди ўчмас дунёда токи унинг насли бор.
Дуо қилинг, азизлар фарзандларнинг ҳаққига,
Барҳаётдир одамзод гар наслининг асли бор.

12.10.2011й.

ЯНГАЛАРИМ

Онам номин ҳурмат билан ёдга олган,
Кўриб қолса «жияним» деб алқаб, суйган.
Юзларида онам нигоҳлари қолган
Янгаларим бордир менинг, янгаларим.
Ҳали ҳамон «опам» дея эслаб юрар,
Ҳар даврада онам ҳақда сўзлаб берар.
Яхши-ёмон кунларимда ҳолим сўрар
Янгаларим бордир менинг, янгаларим.
Умр нима, умр ҳам бир ширин тушдир,
Инсон номин асрагувчи яхши ишдир.
Мен уларни кўрсам доим кўнглим хушдир,
Янгаларим бордир менинг, янгаларим.

22.10.2011йил



ЎЗЛАРИНГИЗ

Кароматли пирларидан тилаб олган
Фотимаю Зухроларга ўхшасин деб.
Мавлуд ойи ҳурматига исмин қўйган,
Гуландому Гулчеҳралар қизларингиз!
Ҳасан десак ёлғиз дея «бой»ни қўшган,
Анвар атаб орзу қилган ёруғликни.
Тангри Икромидан қувнаб, бахтдан жўшган,
Отажоним, онажоним ўзларингиз!

22.10.2011

ОНА

Ҳижратларда юрганимда «болам» дебон
Эртаю кеч бизни дуо этган онам.
Умид билан бир ёстикқа бошин куйган,
Отам билан видолашмай кетган онам.
«Мендан рози бўлиб кетсин онам»дея,
Онасини бошларида тутган онам.
Ўз меҳрини аямаган ҳеч кимсадан,
Отам билан видолашмай кетган онам.
Такдиридан нолимасдан шукр қилиб,
Тангри берган дардга сабр этган онам.
Фарзандларин ҳузурини кўролмасдан
Отам билан видолашмай кетган онам.
Отам ҳануз гурбатларда юрар сарсон,
Уларсиз бўш, хувиллайди ғариб хонам.
Менинг хаста юрагимни эзар армон:
Отам билан видолашмай кетган онам.

Қодир эгам илтижомни айла қабул,
Не дард бўлса бу дунёда тортган онам.
Онам учун шафоатхоҳ бўлсин расул,
Отам билан видолашмай кетган онам.

03.07.2015йил

ДУОЛАРИ ҚАЛҚОН ОНАМ

Чорак аср бўлди сизнинг бағрингиздан кетганимга
Онажоним, меҳрибоним олам аро оламдирсиз.
Фарзанд бўлиб хизматингиз қилолмадим, минг бор афсус.
Эртаю кеч дуо айлаб “омон бўлгин, болам” дерсиз.
Дуогўйим, дуолари балогардон онажоним,
Сиз туфайли Аллоҳ асрар балолардан онажоним.

Сарсон кездим эртаю кеч тирикликнинг сайҳонида
Дайдиб юрдим шамоллардек кўним билмай, тўзим билмай,
Қолиб кетдим гоҳ қисматнинг талотумли тўфонида,
Хиёнатнинг камонига нишон бўлдим ўзим билмай.
Дуогўйим, дуолари балогардон онажоним,
Сиз туфайли Аллоҳ асрар балолардан онажоним.

Бошим узра ёғилгандан ноҳақ маломат тошлари,
Кўнгил шишам чилчил синди, тилка бўлди жону танам,
“Бошинг тошдан бўлсин” дея дуо қилардингиз мени,
Минг шукрки бошим омон, дуолари қалқон онам,
Дуогўйим, дуолари балогардон онажоним,
Сиз туфайли Аллоҳ асрар балолардан онажоним.

15.03.09



ОПАМ ВА ПОЧЧАМГА

Маърифатнинг Сирожидан олиб зиё,
Муаллимлик Шуҳратини элга ёйган.
Хақ расули Акрамининг суннати деб
Меҳрин берган ўшал танҳо Кибриёга;

Аҳмад исми пайғамбарнинг исми дея
Фарзандига Аҳмаджон деб исм қўйган,
Манглайида бахт юлдузи порлаб турган.
Поччам менинг акам каби улуғимсиз,
Опам менинг меҳрибоним, суюғимсиз.

23.10.2010.

ПОЧЧАМ САДРИДДИН ФАХРИДДИН ЎҒЛИГА МАРСИЯ

Тонг чоғида келган совуқ хабардан
Қарсиллаб синди бу юрак дарахтим.
Тоғлар қулаб тушди, ёрилди осмон,
Қиёмат қўпгандек бўлди гўёки.

Тилимга сўз келмас, бўғзимга йиғи,
Йўлда туриб қолдим бир лаҳза карахт.
Жигаримни тешди ғамнинг санчиғи,
Сафаринг бахайр, эй улкан Дарахт!

20.04.2012йил

ОРЗУ

Туғилсангу дунёда,
Ёмонликни кўрмасанг.
Дўстинг бўлса зиёда,
Меҳрга зор бўлмасанг.
Бошингда омон бўлса,
Дуогўй ота-онанг.
Бағринг фарзандга тўлса,
Нурга тўлса остонанг.
Чинор янглиғ ҳар маҳал,
Собит турсанг иймонда.
«Бир кам дунё» деган нақл,
Бўлмасайди жаҳонда.

2002

ОДАМ

Укам Анварга

Бунёд этди ўз илми билан
Жаннатида қудратли Яздон.
Азиз бўлди фаришталарга
Одам дея ном олган инсон.
Деди: «Ема ушбу дарахтдан,
Сени йўлдан урмасин шайтон»,
Нафсига қул бўлди жаннатда
Одам дея аталган бу жон.
Сўнг туширди замин юзига
Айлай дея уни имтиҳон.
Сарсон юриб тазарру қилгач,
Авиз бўлди заминда инсон.



Халифалик унвонин берди,
Келтир дея Үзимга иймон.
Ваъда этди жаннат, дўзахни,
Огоҳ этди қилма деб гумон.
Аммо инсон мудом исенда,
Гуноҳларга ботади ҳар он.
Нафсу шайтон йўлида ҳануз
Үз жонини этмоқда қурбон.
Пайғамбарлар, набилар берди,
Китоб берди ўқи деб Яздон.
Ҳар гал йўлдан адашаверди
Одам дея аталган бу жон.
Мудом ўзин ўтга ташлар у,
Осийликка ўрганган бу жон.
Үн тўрт аср чорлаб турса ҳам
Ҳақ йўлига муқаддас Қуръон.
Эй одам, сен кўзларингни оч,
Тафаккур эт, ҳушёр торт бир он.
Раҳминг келсин жисму жонингга,
Фойда бермас сўнгги пушаймон.
Бир бор кўрқкин эртанги кундан
Унда фақат жаннатмас ёлғиз.
Ўтин ғамлаб олов ёқиш-чун
Пойлаб турган дўзах бор, ёвуз.
Наҳот сенга ўрнак бўлмаса
Ўтганларнинг умр сабоғи?
Токай умринг кечгай исенда,
Исёнингнинг борми адоғи?

14.02.2012

ТИЛАК

Зилол сувдек тиниқ бўлсин ҳаётингиз,
Боқий равон бўлсин ҳаёт йўлларингиз.
Лобар қизлар, ўғилларнинг бахтин кўринг
Латиф ҳислар тарк этмасин дилларингиз.

23.10.2011

ВАТАН БАХТИ СЕНИНГ БАХТИНГ

Ўғлим Муҳаммадҷонга

Сен туғилган улуғ кундан,
Нурга тўлди бу олам.
Сенинг қутлуғ қадамингдан
Кўнглим чоғ бўлди, болам.
Сендек зукко набирасин,
Бобожонинг кўрсайди.
Яратганга айтиб таҳсин,
Кўнгли тоғдек ўсарди.
Умр-қарвон, тақдир–сорбон,
Тутиб борар кўлингдан.
Паст-баландга дуч келганда,
Адашмагин йўлингдан.
Менинг умид чироқларим
Ёритсин толеъингни.
Сенга айтган ўғитларим,
Тарк этмасин дилингни:
Ўсиб-улғай, ўқиб-ўрган,
Элга хизмат қил, болам.



Ботирлардек жангга киргин,
Чорлаганда эл, болам.
Шу Ватаннинг бахт-иқболи
Сенинг иқболинг чиндан.
Фарзанд бўлгин, мард, фидойи,
Рози бўлсин эл, Ватан.

2001

ҚИЗИМ НАРГИЗАГА

Қизим, мен ўзимни сенда кўраман,
Қоп-қора кўзларинг ўзимнинг кўзим.
Ҳатто ўжарлигим ўтгандир сенга,
Ўзимнинг ой қизим, танҳо, ёлғизим.
Бир парча эт эдинг кечагина сен,
Бугун укаларинг чопар ортингдан.
Рўзгоримиз обод, бахтимиз тугал,
Бу ҳам бўлса сенинг шарофатингдан.
Асло ғам кўрмагин, шодон юр доим,
Фақат бир ўтинчим айтаман такрор:
Сени ҳадя қилди менга худойим,
Унинг йўриғидан чиқмагин зинҳор.

2004.



ЎҒЛИМГА НАСИҲАТ

Дунё деганлари имтиҳон эрур
Оқибат савоб ё интиқом эрур.
Умр бир лаҳазалик фано ҳаётдир,
Охират ҳақиқий абадиятдир.

Аллоҳ ризқни таъмин этгувчи Раззоқ,
Ҳалолу ҳаромдан сўрайди бироқ,
Фақат унга қуллиқ қилмоқлик керак,
Инсонлик қадрини билмоқлик керак.

Осонмас қуллиқни адо этмоқлик,
Бир пирнинг этагин керак тутмоқлик.
Сабр либос бўлсин сенга ҳар доим
Фарзу суннатларни айлагин қоим.

Қалбингда имонинг бўлса мустаҳкам,
Икки дунёда ҳам бўламагайсан кам.
Ўғлим шеър сўнгида бир ўтинчим бор,
Кимсага ўзингни хор қилма зинҳор.

20.09.2004



ЎҒЛИМ МАЪМУРЖОНГА

Маъмуржоним, кенжатоим,
Кўзларингдан айланайин.
«Дадажон» деб жаранглаган
Сўзларингдан айланайин.
Ҳофиз бўлсин машҳур дея,
Исминг қўйган бобожонинг.
Қуёш каби нур балқиган
Юзларингдан айланайин.
Ҳар субҳидам сен боғчага,
Мен иш сари йўл оламиз.
Остонамда сен қолдирган
Изларингдан айланайин.
Бу дунёда мендан кейин
Чироғимни ёқиб тургин.
Серфарзанд бўл, сенинг ўғил,
Қизларингдан айланайин.

2004.



ЎҒЛИМ МАЪРУФЖОНГА

Ислом ҳилқатида дунёга келган,
Азиз фарзандимсан, Маъруфжон ўғлим.
Митти қалбинг тоза ҳисларга тўлган,
Сўзларинг шириндир, кўзларинг чўғли.
Жойнамозни тўшаб менинг ёнимда
Ўтирган чоғингда тасбеҳни ўйнаб,
Тангрига шукрона қиламан дилдан
Эзгу амалингда кетаман қувнаб.
Ўғлим бахтимизга ўсиб, улғайгин,
Оқил инсон бўлгин, қилма хижолат.
Яратганга доим итоат қилгин,
Мудом тарк этмасин сени шу ҳолат.

2010



ЖАСУРБЕККА

Жондан ширин фарзандисан Шаҳзоданинг
Авайлайди сени ҳатто бизлардан ҳам.
Соғинади бир кунгина кўрмаса гар,
Улғайтирар бўлмасин деб кўзларинг нам.
Рози дилим айтай дедим ушбу кунда
Бошинг омон бўлсин доим жасур ўғлон.
Енгилмагин сен ҳеч қачон курашларда,
Кўрганида қувнаб юрсин эл ҳар қачон.
Кўзларингда порлаб турсин ҳаёт шавқи,
Асло сени тарк этмасин яшаш завқи.

01.11.2011йил



КҮНГЛИМ ГУЛИ

Кўнглим гули, кўзим нури фарзандларим, ўзингизсиз,
Дил офтобим қалбим кўри фарзандларим, ўзингизсиз.
Сиз умримнинг мазмунисиз, давомчиси наслимизнинг
Менга азизларнинг зўри фарзандларим, ўзингизсиз.
Беғуборсиз фариштадек, пок виждонли, тоза хаёл,
Гирдингизда гиргиттондир эртаю кеч мушфиқ аёл.
Шу аёлдир адангизнинг кўз қувончи, дил овунчи
Борда хўп деб, йўғида ҳам бирор марта этмас савол.
Ўғил қанотли от бўлса, қиз қанотли қуш демакдир,
Умр мангулик олдида бир лаҳзалик туш демакдир.
Фарзанд ўсиб, элга ҳизмат қилса унинг кўрки бўлиб,
Дуо қилса элу улус, элнинг кўнгли хуш демакдир.
Ўғил қизлар мард бўлса гар омад кулиб боқар доим,
Бир насихат айтай сизга, келиб қолди гапнинг жойи:
Бошингизга қилич келиб турганда ҳам ростни сўзланг,
Ёлғончини суймас азал ҳам пайғамбар, ҳам худойим.

11.04.2007

ЎГИТ

Болам, ҳазар қил ҳаромдан,
Ҳалоллаб е нонингни.
Кӯз гавҳарин асрагандек,
Асрагин иймонингни.

Билсанг болам тож-тахт эмас,
Меҳнатла улуғ инсон.
Пешона тер, меҳнат билан
Топгайдирсан шуҳрат, шон.

Ҳаёт бепоён манзилдир,
Умр эса йўл, болам.
Улуғ элнинг фарзандисан,
Унга лойиқ бўл, болам.

То тириксан эл коридан
Аямагин жонингни.
Шунда элу юрт ҳеч қачон,
Унутмайди номингни.

2003йил.

VI

Садъ иҗу



- *«Чўли Ироқ»ни тинглаб*
- *Муножот*
- *Наът*
- *Саловот*
- *Хуш келдингиз*
- *Абу Бакр Сиддиқ р.а.*
- *Инсоф мезон бўлса*
- *Ҳазрат Усмон р.а.*
- *Имом Аъзам р.а*
- *Ғайбдан келган садо*
- *Видолашув тасбеҳи*
- *Ражаб ойи*
- *Қаноат гўшаси*
- *Қиёмат қарз*
- *Қадр*
- *Ваъда*
- *Сабр*
- *Савоб*
- *Бир азиз зот*
- *Яшашни ўрганиши*
- *Пайгамбар демшики*
- *Маъжнун фарёди*
- *Ёлғизлик*
- *Азиз дўстим*
- *Умид ҳақида*
- *Жисминг қафас*
- *Иймон ва ихлос*
- *Тогларга*
- *Менинг азизларим*
- *Буюк аришининг*
- *Тасбеҳ*
- *Унутмагин*
- *Ҳаёт бир бор*
- *Одам бўлсанг*
- *Ёшинг ўтган сайин*
- *Тангрининг*
- *Оила бахти*
- *Руҳимга*
- *Ният*
- *Ишон*
- *Дунё*
- *Кечиримлилик ҳақида*
- *Кибр ҳақида*
- *Ибрат*
- *Хушфевъллик ҳақида*
- *Тасаввур эт*
- *Ўзимга насиҳат*
- *Бомдод*
- *Ҳалоллик*
- *Илтижо*
- *Қўрқув ва умид*
- *Жуфтила яратиб*
- *Инсоф*
- *Ҳақиқат*
- *Хулоса*
- *Улуг кун ёди*
- *Нурдан яралгандир*
- *Афу этгин*
- *Севгим*
- *Энг улуг неъмат*
- *Ўзликни англаши*
- *Кўнглим*
- *Энди ҳақ деб*



“ЧҮЛИ ИРОҚ»НИ ТИНГЛАБ

Ёндириб юборар жону дилимни
Вужудимни чулғар бир ҳазин титроқ.
Ёдимга солади ҳайҳот, ўлимни
Минг асрлик фарёд - “Чўли ироқ”.
Кўз олдимга келар қалбимда тошдек
Армонга айланган қадрдонларим.
Дунё қалқиб турар кўздаги ёшдек,
Нечоғлик ғанимат ушбу онларим.
Эвоҳ, арзигулик бир савобим йўқ,
Тангрим, тўзим бергин ожиз қулингга.
Умрим ўтаяпти учиб мисли ўқ,
Тангрим, ихтиёрим сенинг қўлингга.
Шаъни улуг зотнинг карами ҳам кенг,
Қулнинг иши эса ялинмоқ фақат.
Рўзи қиёматда ўзинг бандам де,
Рўзи маҳшар ўзинг айлагин шафқат.
Ёритиб юборар фикру ёдимни,
Вужудимни чулғар бир ҳазин титроқ.
Ёдимга солади ҳайҳот ўлимни,
Минг асрлик фарёд – “Чўли ироқ”.

23.04.09.



МУНОЖОТ

Бисмиллоҳир раҳмонир раҳим!
Ба ҳурмати Қуръонил-азим!
Тингла раббим арзу ҳолимни,
Қабул айла дуо-зоримни.
Сен«бӯл»десанг бӯлғуси ҳар иш,
Мушкуллар ҳам топгай кушойиш,
Тенгинг йўқдир, тимсолинг йўқдир,
Ҳукминг сенинг мисоли ўқдир.
Мен бандангман–ожиз қулингман,
Сенсиз ҳеч ким-ночиз қулингман.
Гар қўлласанг омадли банда,
Қўлламасанг хору шарманда.
Юрагимда умид ва кўркув
Кеча кундуз қилади ғулув.
Шукр менга ҳиммат айладинг,
Муҳаммадга уммат айладинг.
Ислом ила шарафлантирдинг
Имон бериб қанотлантирдинг!
Мўъмин бўлиб келдим дунёга
Шундан дилим тўлуғ зиёга.
Етти пуштим мусулмон этдинг,
Менга бахтнинг калитин тутдинг.
Шундан мудом қилгум шукрингни,
Тилдан кўймам сенинг зикрингни.
Аммо минг бор шукр айласам,
Исминг минг бор зикр айласам,
Эй, подшоҳи олам, мен-гадо
Ҳаққингни ҳеч этолмам адо.

Фазлинг чексиз, караминг кенгдир,
Ўхшашинг йўқ, йўқ эрур тенгинг!
Ботинимда не фикрим бўлса,
Зоҳиримда не зикрим бўлса,
Барчасидан хабардор ўзинг,
Олам ичра Биру Бор ўзинг!
Фурсат етиб келди ушбу кун
Оромимни йўқотдим тун-кун.
Жамлаб қоғоз, хомаларимни
Янги шеърий номаларимни,
Китоб этмоқ истадим дилдан,
Кушойишу ижобат сендан!
Ҳамду сано мақтов сенгадир,
Бор хатолиғ, нуқсон менгадир.
Раҳматил-лил-оламин бўлган
Оламларга нур бўлиб келган
Муҳаммадга саловот бўлсин,
Равзалари нурларга тўлсин!
Ғавсул Аъзам пир инояти-
«Етти гўзал исм»инг ҳурмати
Мақсадимга ноил эт мени,
Қудратингга қоил эт мени!
Ишларимга кушойиш бергин,
Умримга зеб, оройиш бергин!
Файз ато қил хонадонимга,
Барокот бер ҳар бир онимга!
Айбларимни ислоҳ айлагин,
Имонимни ҳамроҳ айлагин.
«Ёдинг ила бедор»эт доим,
Тўғри йўлда айлагин қоим.



Улуғ Раббим шу китобимни
Китоб эмас дил офтобимни,
Муборак эт ўқиган зотга,
Ким ўқиса етсин муродга!
Кимки менга мухлис, дарддошдир,
Ким бўлса ҳам кекса ё ёшдир,
Фазлинг ила қўнглин айла шод,
Дуоларда қилсин мени ёд!

06.11.2013-йил.

НАЪТ

Умримиз ҳам улуғ неъматдир, бироқ,
Мангулик олдида мисли шамчироқ.
Раҳнамо топмадим сиздан яхшироқ
Ассалому алайка ё Расулуллоҳ,
Ассалому алайка ё Ҳабибуллоҳ!

Юрардим адашиб сарсон, саргардон
Гоҳида шодону гоҳида гирён.
Шукр, дилда туйдим нурли галаён,
Ассалому алайка ё Расулуллоҳ,
Ассалому алайка ё Ҳабибуллоҳ!

Меҳрибон яратган айлаб ҳидоят
Ҳақ йўлни англадим мен ҳам ниҳоят.
Дилда дардларим кўп қилсам ҳикоят
Ассалому алайка ё Расулуллоҳ,
Ассалому алайка ё Ҳабибуллоҳ!



Гарчи гуноҳим мӯл, ҳулқим ёмондир,
Айбларимни ўйлаб рангим сомондир.
Сизга эргашганлар мудом омондир
Ассалому алайкум ё Расулуллоҳ,
Ассалому алайка ё Ҳабибуллоҳ!

Ҳақнинг бир сифати Ғафурур Раҳим
Унинг изнидадир жаннату жаҳим.
Ҳаққа сиз туфайли етгайдир оҳим
Ассалому алайка ё Расулуллоҳ,
Ассалому алайка ё Ҳабибуллоҳ!

Дилимда бир улуғ армоним бордир
Эзгу ниятларга ҳақ ўзи ёрдир.
Сизсиз ўтган умрим қоронғу тордир
Ассалому алайка ё Расулуллоҳ,
Ассалому алайка ё Ҳабибуллоҳ!

Аллоҳ насиб этса бешинчи фарзим
Адо этмоқ эрур тилагим, орзум.
Равзангиз зиёрат қилмоқлик қарзим
Ассалому алайка ё Расулуллоҳ,
Ассалому алайка ё Ҳабибуллоҳ!

20.11.2013-йил.



САЛОВОТ

Тенгингиз йўқ камолотда,
Мислингиз йўқ саховатда.
Ҳам раҳмату барокотда,
Ё Муҳаммад Мустафо! (с.а.в.).

Қалбимнинг кўри ўзингиз,
Кўзимнинг нури ўзингиз.
Бор олам сири ўзингиз,
Ё Муҳаммад Мустафо! (с.а.в.).

Сиз вафода денгиз мисол,
Юсуфданда соҳибжамол!
Соҳибмеърож, соҳибвисол
Ё Муҳаммад Мустафо! (с.а.в.).

Гарчи осий умматдирман,
Ёдингиз-ла сармастдирман.
Толиби шафоатдирман,
Ё Муҳаммад Мустафо! (с.а.в.).

27.05.2012йил





ХУШ КЕЛДИНГИЗ

Дарак берди бизларга ҳилол
Муборак ой-мавлуд ойдан.
“Ху, ху ё ху” дея тебрандим,
Юракнинг энг чуқур жойидан.

Раҳматга кон, нурсиз биз учун
Сиз севсангиз севади Аллоҳ.
Жоним фидо бўлсин сиз учун,
Хуш келдингиз, ё Расулуллоҳ(с.а.в)!

31.01.09й.



*Расулуллоҳ (с.а.в)нинг гордаги биродарлари
Абу Бакр Сиддиқ (р.а)нинг пок руҳларига*

Дўстлар бўлинг садоқатли, Абу Бакр Сиддиқ каби,
Самимий ва матонатли Абу Бакр Сиддиқ каби.
Кеча кундуз яшайдиган мўъминларнинг дарди билан,
Инсон бўлинг шижоатли, Абу Бакр Сиддиқ каби.
Ёлғончилик хиёнатдир, тўғрилиқ ҳам омонатдир,
Бўлинг ростгуй, жасоратли Абу Бакр Сиддиқ каби.
Ким камтарин бўлса агар Ҳақнинг ўзи юксалтирар,
Бўлинг фазлу камолотли, Абу Бакр Сиддиқ каби.
Тўғри яшаш бош усули, раҳнамоси Ҳақ Расули,
Бўлинг ҳаққа ҳидоятли, Абу Бакр Сиддиқ каби.
Ғойиб изҳор этди дилин, дилдан тилаб ҳақнинг йўлин,
Тангрим этсин диёнатли, Абу Бакр Сиддиқ каби.

31.01.2012 й.



ИНСОФ МЕЗОН БЎЛСА

*Адолатли амир Ҳазрат Умар (р.а)нинг
пок руҳларига*

Юрт гуллаб яшнагай бўлса адолат,
Инсоф мезон бўлса ҳар бир юмушда.
Хотиржам яшагай аҳли раият,
Одиллик устувор бўлса ҳар ишда.
Мўминлар амири ҳазрати Умар(р.а.)
Омонат деб билган давлат молини.
Шундан башарият мамнунлик билан
Хануз зикр этар унинг номини.
Азиз ватандошим, келгин, бизлар ҳам
Аждодлар пандига қулоқ тутайлик.
Адолат, инсофни кўнгилга жойлаб
Она юртимизни обод этайлик.

2011йил



*Ҳазрати Усмон разияллоҳу
анҳунинг пок руҳларига*

Умр омонатдир бани инсонга
Яшамоқлик керак хиёнат қилмай.
Топширган чоғда ҳам жонни Яздонга,
Халос бўлиш йўқдир ҳисобин бермай.
Шу ўй, андишалар ўртаб дилини
Кўркувдан титрарди ҳазрати Усмон.
Унинг ҳаёсидан, андишасидан
Малаклар уятга қоларди шу он.

«Кошки яратилсам наботот бўлиб»-
Деган ўй бағрини тиғларди.
Жаннат ваъда этилган бу зот,
Дарахтни кучоклаб йиғларди.

29.03.2013йил



*Имоми Аъзам Абу Ҳанифа
Кўфий раҳматуллоҳи алайҳ зикрида*

1

Ҳазрат айлади-ку бир кун тавозуъ
Бир бойга, шайтоннинг сўзига кириб.
Сўнг минг бор Қуръонни хатм қилди у
Каффорат бўлсин деб дилдан ўкиниб.

2

Қай бир масалада туғилса мушкул
Қирқ бора Қуръонни хатм этарди.
Ноил бўлиб ҳақнинг раҳматига ул,
Масала кашф бўлиб, мушкул кетарди!

13-май 2013-йил.

ҒАЙБДАН КЕЛГАН САДО

«Сизга бу дарсдир, вале сиз беҳабар»¹
Сизга бу фарздир, вале сиз беҳабар.
Сизни яратмоқдан мурод тоат эди,
Бандалик қарздир, вале сиз беҳабар.

08.03.2012.

1. Қуръон ояти.



ВИДОЛАШУВ ТАСБЕҲИ

Алвидо, алвидо Тангри раҳмати
Ёғилган мунаввар тунлар, алвидо!
Алвидо, алвидо Ҳақ мағфирати
Ёғилган муборак кунлар, алвидо!

Алфироқ, алфироқ Ҳақ инояти-
Бизларга Тангридан нажот- алфироқ!
Алфироқ, алфироқ тунлар тоату
Кундузлар рӯзали ҳолат алфироқ!

Алвидо, алвидо хайру саховат
Ҳам меҳру муҳаббат шаҳри алвидо!
Алвидо, алвидо ҳатму қироат,
Зикру тиловатлар шаҳри алвидо!

Алфироқ, алфироқ меҳрибон Аллоҳ
Шайтоннинг шарридан асраган онлар.
Алфироқ, пайғамбар суннати дея
Таровех ўқиган азиз инсонлар!

Юраклар ўртанар, кўзлар ёшланар-
Қўрқув ва умид-ла қилурмиз дуо:
Келгуси муборак Рамазонгача
Бизни паноҳингда асрагин, Худо!

06-07.2013-йил.



РАЖАБ ОЙИ

Устимизда Аллоҳнинг ойи
Истиғфор айт, тавба қил банда.
Замин асли имтиҳон жойи
Бандалик қил, бўлма шарманда.
Бандалик бу мусулмонликдир.
Муъмин бўлар мардларнинг зўри.
Ражаб ойи. Бошимиз узра
Ёғиб турар тангрининг нури.

13.06.2010.

ҚАНОАТ ГҶШАСИ

Бизлар бу дунёда меҳмонмиз ахир,
Омонат берилган бизга жону тан.
Нафсининг тузоғига бўлмасдан асир,
Қаноат гўшасин айлайлик ватан.

Қайга югурамиз, қайга чопамиз,
Ахир кўнгилдадир Аллоҳ висоли.
Бир дилни шод қилсак савоб топамиз
Байтуллоҳни тавоф қилган мисоли.

22.02.2004



ҚИЁМАТ ҚАРЗ

Комил инсон бўл, деди Аллох,
Яратганда Одам Атони.
Айб қилса ҳам бўлиб хайрихоҳ,
Кечирди у қилган хатони.
Ҳамду сано ўзига лойиқ,
Ҳар бир иши мақтовга арзир.
Кечиримли, узрли бўлмоқ,
Бандаларга қиёмат қарздир.

2001.

ҚАДР

Қадрлидир кимнинг ахлоқи гўзал,
Ҳамда мавжуд бўлса дилда ҳиммати.
Солиҳ инсонларни дўст тутган маҳал,
Ортиб борар яна қадр-қиммати.
Ноёб неъмат эрур қадр туйғуси,
Аммо энг муҳими уни сақлашдир.
Қадрни сақлашнинг ягона йўли,
Ёмон амалардан ўзни асрашдир.

09.02.11



ВАЪДА

Кимки ваъдасида устувор бўлса,
Бажарса Холиқнинг барча фарзини.
Омонат ҳаққига риоя қилса,
Вақтида қайтарса олган қарзини.
Ҳалол касб айласа бу даҳри дунда,
Оллоҳни ёд этса саҳар чоғлари,
Унга насиб этар боқий умрда
Тенги, қиёси йўқ жаннат боғлари.

29.29.2002.

САБР

Омад келганида ҳовлиқиб кетиб,
Асло кибрланма, вазмин ҳар он.
Заҳмат келганда ҳам бошингга етиб
Ўзингни йўқотиб қўйма ҳеч қачон.
Иймнинг маҳкам тут, адашма роҳдан,
Гарчи сабр йўли мушкилдир, аён.
Бир ҳадис қолмишдир Расулуллоҳдан:
«Сабрсиз камолга етмагай иймон».

18.02.03.

САВОБ

Кўчадан бир тошни чеккага олиб,
Ташламоқ ҳам катта савобдир, асли.
Беминнат қилинган бундай амалдан
Қоқилиб кетмагай одамзод насли.
Эмишки, ким агар эзгу амални
Дилида қилмоқни айласа орзу.
Меҳрибон Зулжалол унинг ҳаққига,
Шу амал савобин кўяркан ёзиб.

18.01.03.



Бир азиз зот кўрдим такводор, мўмин
Яшайди борига қаноат қилиб!
Бошқа зотни кўрдим дунёнинг қули,
Яшайди ўзгалар ҳаққини юлиб.
Дунё қанча бўлса кўрингайдур кам
Сабр айланмаса содиқ ҳамроҳга
Биздан рози бўлгай ўз нафсимиз ҳам
Бўйсуниб яшасак одатуллоҳ¹га.

04.09.05

1. Оллоҳнинг қонуни, йўли.



ЯШАШНИ ҶҮРГАНИШ

Умрим ғафлат билан ўтмасин десанг,
Бажаргин Холиқнинг ҳар айтганини.
Умрдан не маъно келсангу кетсанг,
Ҳатто танимасдан Яратганингни.
Тириксан, тангрига имонинг келтир,
Бенасиб қолмагин бундай шарафдан.
Агар ниҳол бўлсанг илдизинг қидир,
Яшашни ўргангин улуғ Дарахтдан!

18.02.03.

ПАЙҒАМБАР ДЕМИШКИ...

Бу зебу зийнатлар, нақшунигорлар,
Ҳаммаси ўткинчи, ҳаммаси бекор.
«Дунё меникидир» деган ғаддорлар
Ажал қаршисида титрарлар ночор.
Мол-дунё ортидан кибрланганлар
Тангри раҳматидан абад маҳрумдир.
Расулуллоҳ (с.а.в.) демиш: «Эй умматларим,
Билсангиз, фақирлик–менинг фаҳримдир».

20.01.2003.



МАЖНУН ФАРЁДИ

Дилимни ишққа тўлдурғон
Ўзингдирсан, ўзингдирсан.
Тилимга зикрин билдирғон
Ўзингдирсан, ўзингдирсан.

Балога мубтало айлаб,
Мажнуни бенаво айлаб.
Фироғингда зор куйдирғон
Ўзингдирсан, ўзингдирсан.

Ошиқлигим ҳаддан ошди,
Завқим дилдан жўшиб, тошди.
Жабрини жонга туйдирғон
Ўзингдирсан, ўзингдирсан.

Ҳажрингда сарсон юргайман,
Гоҳ йиғлаб, гоҳ кулгайман.
Ҳам куйдириб ҳам суйдирғон
Ўзингдирсан, ўзингдирсан.

Муродимни ўзинг бергин,
Ҳаста жонга тўзим бергин.
Лайлини менга севдирғон
Ўзингдирсан, ўзингдирсан.

24.01.2012



ЁЛҒИЗЛИК

Дўстларимга розимни айтиб
Давраларда айшимни сурдим.
Лекин бари туш каби ўтиб,
Ўзим билан тоқ, ёлғиз қолдим.
Санамларга кўнглимни бериб
Лабларидан бўсалар олдим.
Аммо бари туш каби ўтиб
Ўзим билан тоқ, ёлғиз қолдим.
Саркашликни айладим канда,
Юзим бурдим муқаддас роҳга.
Кечалари ёлғиз қолганда,
Сажда қилдим буюк Аллоҳга.
Ва англадим буюк ҳикматни:
Унингдек йўқ дўсту вафодор.
Дил розию ишқ-муҳаббатни
Танҳо унга айтмоқлик даркор.

27.01.02.



Азиз дўстим дил каъбасини
Поклаб тургин такрор ва такрор.
Суюкли дўст бир кун ичида
Назар ташлар унга неча бор.
Меҳмон келса дастурхонингни
Безагандек нозу неъмат-ла.
Яхши ният, дуолар билан
Ҳар сония уни зийнатла!

12.02.11



УМИД ХАҚИДА

Умидсизлик нечун айтгин эй юрак,
Қисмат зарбларидан қолдингми толиб.
Тангридан тиласанг чин ихлос билан
Эртага сен яна бўласан ғолиб.
Ҳақ бизга яқиндир ҳаммадан кўра
Унга таваккал қил - дунё боумид.
Нима орзунг бўлса ўзидан сўра,
У севган куллари қўймас ноумид. 2011



Жисминг қафас, руҳинг эса қуш,
Ақл сенга берилган чироғ.
Ўлимгача бир лаҳзалик туш,
Гарчи туюлса ҳам кўп йироқ.
Боқий бўлиб кўринган дунё
Бир кун тутар ачиқ шаробин.
Ақл билан юксакка интил,
Тортиб қўйиб нафсинг танобин. 12.02.11

ИЙМОН ВА ИХЛОС

Сен қалбингни айлантиргин осмонларга,
Ёққин унда маърифатнинг қуёшини.
Холис бўлсанг осмонинг ҳам нузли бўлар,
Малаклар ҳам истар унинг зиёсини.
Махлуқлардан умидинг уз, ҳаққа юзлан,
Ҳар нечук сен бу иллатдан бўлгин халос.
Соғлом қалбда энг аввало билсанг агар
Жо бўлмоғи керак иймон ҳамда ихлос. 09.02.11



ТОҒЛАРГА

Тоғларга ҳавасим келади менинг
Улуғвор, ҳайбатли, гўзал тоғларга.
Улар гувоҳидир минглаб тақдирнинг,
Гувоҳ бўлган бахтли, ғамли чоғларга.
Тан бериб тақдирнинг ҳукмига дилдан
Виқорла бир жойда туришар қотиб.
Давру давронларнинг фитналаридан
Улар ўзлигини кўймас йўқотиб.
Уларда сабот бор, бордир ирода,
Мослаша олишар ҳар бир фаслга.
Тоғларнинг бир кунин зикр айласам
Ўрганмоққа етар бутун асрга.
“Камтарга камол” деб айтилган мақол
Тоғларнинг хулқиға жуда келар мос.
Демак ўсаётир тоғлар ҳар маҳал,
Демак тоғларнинг ҳам бедорлиги рост.
Эҳ, биз инсонларчи, қисқа умрнинг
Ғанимат эканин англаб етмаймиз.
Асири бўламиз нафсу ғурурнинг
Тақдирнинг ҳукмиға сабр этмаймиз.
Бас, етар, бугундан яшай бошлайман
Тоғлардек бўйсиниб Ҳақнинг амриға.
Энди тақдиримдан ҳеч зорланмайман,
Айтсам дардим айтгум танҳо Тангриға!

11.02.2009.



Менинг азизларим, биродарларим,
Қалби дарёларим, қора кўзларим.
Ҳақнинг йўлларида топган ёрларим,
Имонлари ҳамроҳ, дини борларим.
Сизгадир самимий айтган сузларим.
Атрофга боқайлик айлаб тафаккур,
Қанчалар одилдир, яхшидир замон.
Андиша қилайлик ва яна бир зум,
Бизлар мусулмонмиз, Аллоҳга шукур,
Аммо юртда камми насаб мусулмон?
Ғаришта гўдаклар туғилган замон
Қулоғига азон, такбир айтамыз.
Эзгу тилакларни тилаймиз шу он,
Лекин ўргатмаймиз ҳадису Қуръон.
Бу эзгу йўлларга қачон қайтамыз?
Шукр, етиб келди муборак чоғлар.
Шу азиз кунларга гувоҳсиз сизлар.
Аллоҳга ҳамд айтиб кўқарар боғлар,
Аллоҳнинг ёдидан бедордир тоғлар,
Қачон уйғонамиз уйқудан бизлар?!

15.09.06.



Буюк аршнинг соҳиби,
Ибрат бўлсин деб бизга,
Қаро тунни ҳар куни,
Айлантирар кундузга.

Олти кунда бор айлаб,
Еру кўкнинг мулкани.
Ҳидоят қилар ойлаб,
Бандаларнинг хулқани.

Тавба айлаб юракдан,
Ким юз бурса тавобга.
Тангри унинг гуноҳин,
Айлантирар савобга.

Дўстлар Кавсар сувидан,
Ичай десангиз қониб.
Яхшилик қилинг дилдан,
Улуғ Кунга ишониб.

2002



ТАСБЕҲ

Оқшомда жуғрофий харита бўйлаб
Шимолга йўл олдим мен секин, равон.
Ошиб ўтиб бордим тоғ, даралардан
Музлар салтанати Арктика томон.
Қизиғи шундаки бунда қиш бўйи
Қуёш нур сочмагай, ҳоким эрур тун.
Шунга қарамасдан балиқлар сузар,
Қушлар учиб юрар, бўлмасдан маҳзун.
Ризкин овлар экан оппоқ айиқлар,
Баҳайбат гавдаси бермайин ҳалал.
Музни ёриб юрар катта қайиқлар,
Қушлар тухум қўяр бунда бемалол.
Самода ложувард юлдузлар порлар,
Ой ҳам маликадек осмонни безар.
Оппоқ чағалайлар учишга чорлар,
Муз остида ҳатто мушуклар сузар.
Шунча мавжудотни сақлаб омонда,
Ризкин берган зотга айладим таъзим.
Бир оят ёдимга келди Қуръондан:
«Фасаббих би-сми роббикал ъазим»¹

12.02.2009й.

1. «Воқиъа» сураси, 96-оят.



УНУТМАГИН

Унутмагин, бир куни келиб,
Омад сендан юз буриб кетса;
Тарк этсалар дўстларинг бир-бир,
Сочларингга оқ қиров инса.
Хуш кўрмаса ҳатто хотининг,
Бор дунёнгдан бўлсанг ҳам жудо.
Унутмасанг яратганингни
Демак, сени севади Худо!

11.04.2007й



Ҳаёт бир бор берилган ахир,
Яша унда ҳалол ва мағрур.
Ёлгонларга бўлмагин асир,
Юрагингдан кетмасин сурур.
Ишқ муҳаббат майин ич тўйиб
Қўмсаб яша ёрнинг васлини.
Илк севгингни унутмагандек
Ёдингда тут хазон фаслини.

15.04.2007



Одам бўлсанг ўзингни элингдан жудо қилма,
Жондан кечсанг кечгину номусинг фидо қилма.
Кўксингда урган юрак имондан топсин дарак,
Мол дунё деб ўзингни нафсингга гадо қилма.
Кийсанг ҳам кимхоб, мовут, бағрига олар тобут,
Сўнги он надоматдан йиглабон нидо қилма.
Марддан эл фахрланар, номарддан нафратланар,
Эл назаридан қолиб адашма, хато қилма.
Ғойиб, доим ҳам замон ўхшамаску замонга,
Адолат йўқ экан деб қаддингни дуто қилма.

10.03.2010.



Ёшинг ўтган сайин юрмайсан мағрур,
Ўлим андишаси ўртар ёдингни.
Баъзан изтиробдан куяди бағир,
Дунё кўтаролмас сенинг дардингни.
Ўлим андишаси ўртар ёдингни,
Хотирга тушади қиёмат-қойим.
Тингламас у кунда ҳеч ким дардингни,
Магар раҳм этмаса қодир худойим.
Баъзан изтиробдан куяди бағир,
Лоқайдлар қалбингга беради озор.
Чоғлангинг келади курашга, тагин,
Андиша қиласан-олдда ўлим бор.
Дунё кўтаролмас сенинг дардингни,
Мардлар қарғишига учраган дунё.
Юрак, ўйла ўзинг, ўз тақдирингни
Сенинг келажагинг кундузми, тун ё?! 05.2005й



Тангрининг йўригин тутса ким
Саодат соҳиби бўлажак.
Жаҳолат аҳлидан асрасин,
Дунёга ғулгула солажак.

Жохил ҳеч нарсадан тап тортмас,
Суйгани ягона шаҳватдир.
Кўзлар кўр бўлгани даҳшатмас,
Кўнгиллар кўрлиги даҳшатдир.

2005

ОИЛА БАХТИ

Оиланинг бахт-саодати
Эр-хотининг ўзига боғлиқ.
Уйғун бўлса муносабатлар
Турмуш бўлар ширин, чиройлик.

Обод бўлса рўзғори эр ҳам
Кўча куйда юрмайди кезиб.
Аёл тунни ўтказмас ёлғиз
Оппоқ парқув болишни эзиб.

09.02.11



РУҲИМГА

Ҳаёт нима? Ўлим нима?
Мангуликнинг ёнида.
Тўлғонасан мисли кема,
Коинот уммонида.
Нурга ташна бир учкундек,
Милтирайсан уззу кун.
Ёвуз кучлар чангалида,
Қолиб кетмай деб буткул.
Вақт карвони ўтар экан,
Шиддат билан бетўхтов.
Мақсад сари интил, руҳим,
Гарчи йўлда кўпдир ғов.
Таслим бўлма, кўрқувни енг,
Шунда йўл равшан бўлар.
Сен ўзинга ишонган кун
Ғолиблик ўзи келар. 2002.

НИЯТ

Тирикликдан маъно не деб,
Ботиний бир савол келур.
Ҳаққақараб нидо қилсам
Тош юрагим қордай эрир.
Менинг умрим ишқ баҳрига
Қўшилсайди томчи мисол.
Сингиб кетсам сўнг бағрига
Насиб этса менга висол.
Менинг умрим бир шуъладек
Ярақласа ишқ даштида.
Рози эдим куйсам кулдек,
Сўнг тирилсам ҳақ ишқида. 2001



Ишон, ҳаёт ҳали олдинда,
Заминдаги умр бир довон.
Ердан кетгач само бағрида
Инсон умри этади давом.

Ҳақнинг одил ҳукмига кўра
Буюк тонгда барча тирилгай.
Унда бирдир гадо ҳам, шоҳ ҳам
Бани одам бир хил сўралгай.

Банда бўлсанг ҳаққа интилгин,
Парчалансин кўнглинг қулфлари.
Эслаган чоғ ёнингда турар
Ўтган етти пуштинг руҳлари.

Сен уларни дуо айлагин,
Тоқим улар руҳи бўлсин шод.
Қиёматни бугун ўйлагин,
Охиратинг айлагин обод.

2002



ДУНЁ

Дунё ёлғончидир, дунё ишвакор,
Ром этар ўзига, маккордир жуда.
Кеча мўмин эдик ҳамда беғубор,
Бугун югурамиз нафс илинжида.

Балоғат палласи етгани сайин,
Улғайиб бормокда нафсимиз гуё.
Асл мақсадимиз бўлса ҳам тайин,
Ўтяпмиз дунёга бўлиб маҳлиё.

Мансаб талашамиз, шаън талашамиз,
Ғийбату фасодга бойдир суҳбатлар.
Эй юрак, биз қачон қайнаб, тошамиз,
Айт, қачон излаймиз савоб, раҳматлар?!

Ўйлагин, боришинг Ўзига қайтиб,
Оқизиб кўзлардан зардобли ёшни.
Эй юрак, тавба қил, истиғфор айтиб,
Тошга ур кибрга берилган бошни.

Олдинда қиёмат даҳшати ётар,
Қара, кўринмокда аломатлари:
Тунлари кўрқувдан шиддат-ла чопар,
Самода тангрининг олов отлари.

27.09.04





КЕЧИРИМЛИЛИК ҲАҚИДА

Банда кечирмагани, Худо кечирмас дерлар
Фарзандимиз барчамиз битта Одам Атонинг.
Бир бирининг ҳаққини ейди фақат кашқирлар,
Қадри бирдай азиздир султон билан гадонинг.
“От тепкисин кўтарар от” деган мақол ҳам бор.
Одам тафтини олар фақат одам боласи.
Ноқобил бандалардан етгай дилларга озор,
Ичида бўлар экан одамзоднинг оласи.
Мен ҳам умрим йўлида кўрдим турфа зотларни.
Тақдир тақоза қилди, сабаб бўлди вазият.
Имонли инсонлардан ўргандим ҳикматларни,
Дилозор каслардан ҳам чекдим роса азият.
Не бахтким мусулмонмиз, пайғамбарнинг уммати,
Аллоҳ ўзи ёрлақар пок бўлса дилда ният.
Кечиримли бўлса ким ошар кадр-қиммати,
Бу бизга пайғамбардан суннат бўлган фазилат.

09.02.2009

КИБР ҲАҚИДА

Агар кимнинг бўлса умиди,
Охиратнинг ноз-неъматидан,
Тарк этмасин Аллоҳ ёдини,
Ор қилмасин инсон зотидан.
Ким такаббур бўлса, шайтоннинг
Амалига ҳамроҳ бўлади.
Ер устида кибрланганлар
Ҳақ наздида гумроҳ бўлади.

01.03.03



ИБРАТ

Итоатда эрур куёш,
Итоатда ой ва юлдуз.
Яратганга тасбеҳ айтиб
Айланишар кеча-кундуз:
«Субҳонал маликул қуддус»,
«Субҳонал маликул қуддус».¹

25.02.2004.

ХУШФЕЪЛЛИК ҲАҚИДА

Қай бир оилада бўлса тотувлик,
Билгинки жаннатдан кошона бўлур.
Аҳиллик бўлмаган хонадон ичра
Дўзах хаётидан нишона бўлур

Аёл эр кўнглининг хуш гули бўлса,
Эр аёл номусин кўриқчисидир.
Хуш феъл аёлларга олқишлар бўлсин,
Хуш феъллик жаннатнинг даракчисидир!

09.02.11

1. “Покдир Оллох, подшоҳдиру”



Тасаввур эт: қиёмат-соат-
Тирилмоқда сонсиз мурдалар...
Сўнг маҳшаргоҳ, ҳисобу китоб...
Одам чумолидек ўрмалар.

Кўзингни юм: тасаввур этгин
Хор турарсан маҳшаргоҳ аро...
Вақт борида кўзинг катта оч-
Келмай туриб қиёмат-жазо!

26.12.13.

ЎЗИМГА НАСИҲАТ

Бу дунёга нега келдинг деб,
Сўрадингми ўзингдан бир бор?
Ёки фақат дунё гамин еб,
Ўтмоқдасан ҳаётдан бекор?
Гарчи қазо ҳукми мутлоқдир,
Ўзгартиргин қадар ҳукмини.
Яхши амал, савоблар билан,
Осон айла сафар юкини.

2002



БОМДОД

Ҳар тонг уйғотади мени уйқудан
Беором кушларнинг сайроғи.
Тун кўрпасин олиб аста устидан
Табиат кўтарар зафар байроғин.

Шаббода юзимга майин урилар.
Ғафлатда қолмасин, дея, хойнаҳой.
Муқаддас бурчимни эслатиб турар
Офтоб шуъласида ялтираган ой.

5.03.05

ҲАЛОЛЛИК ҲАҚИДА

Инсонмиз, сўзлашга демак ҳақлимиз
Сўзимиз ҳеч кимга келмасин малол.
«Кўчада ич-дейди доно халқимиз,
Ризку насибангни тополсанг ҳалол».

Инсонмиз, яшашга демак ҳақлимиз,
Бизга бу ҳуқуқни берган Зулжалол.
Биздан рози бўлгай элу юртимиз,
Шу қисқа умрда яшасак ҳалол.

22.11.2003



ИЛТИЖО

Қуёш юзин тўсди чанг, тўзон,
Оқ либосин унутди тоғлар.
Юрагида буюк бир армон,
Қовжирайди гулзорлар, боғлар.
Кечир, бўлса гар бизда гуноҳ,
Махлуқингмиз- юмшат қаҳрингни.
Бандаларга раҳм қил, Оллоҳ,
Бандаларга тўкма захрингни. 2003

ҚЎРҚУВ ВА УМИД

Яшамоқ оғирдир яшамоқ қийин
Номарду нокаслар ичра одамдай.
Ловуллаб куяди аламдан бағир,
Дунёда бирорга мард қолмагандай.
Хиёнат тиғидан озор кетса ҳам
Оллоҳ раҳматидан бўлмама ноумид.
Омад куши мени ташлаб кетса ҳам
Дилдан кетмаса бас қўрқув ва умид. 2005



Жуфтила яратиб Зулжалол,
Сарафроз айлади инсонни.
Дунёда яшанг деб пок ҳалол,
Қалбига жойлади имонни.
Эркаклар бўлса мард, имонли
Пок тутар оила қўрғонин.
Эр зоти унутса иймонни,
Аёллар бузгайдир дунёни. 01.09.03.



ИНСОФ

Ҳар нарсанинг ўлчови бордир,
Мавжуд ҳатто инсоф мезони.
Тарозуси марҳамат бўлса,
Шафқат эрур унинг мезони.
Бузилмасин десангиз агар,
Бу дунёнинг мувозанати.
Чикманг инсоф чегарасидан
Инсоф эрур ҳаёт зийнати.

2002.

ҲАҚИҚАТ

Бир қудрат бор қиличдан кескир,
Эгилса ҳам ҳеч қачон синмас.
Ёвуз кучлар бирлашганда ҳам,
Бу қудратни парчалай олмас.
Хоҳ шоҳ бўлсин, хоҳ бўлсин гадо,
У барчага бера олар панд.
Тилда ёлғон айтган кимса ҳам
Дилда унга доим берар тан.
Писанд қилмас у ҳеч бир зотни,
Қўрқмагай у шайтон макридан.
Ҳатто ёлғон тўла ҳаётни
Кутиб олар ўлим шаклида.

05.03.03



ХУЛОСА

Ўтиб бормоқдадир умрим
Гоҳо очман, гоҳида тўк.
Танҳо ҳикмат англаганим:
Сабрдан эзгу амал йўк,
Сабрдан ўзга амал йўк.

01.02.2010

УЛУҒ КУН ЁДИ

Тин билмай ўтар умр,
Карвон ичра карвондек.
Лаҳзалар кечар бир-бир,
Юракдаги армондек.

Ўтмоқдамиз саргардон,
Хаёллар гирдобида.
Гоҳ ғамгинмиз, гоҳ шодон,
Улуғ Куннинг ёдидан.

Ҳеч ким бўлмади устун
Юмалоқ ер шарига.
Сингиб кетамиз бир кун
Абадият қаърига

15.04.02.



Нурдан яралгандир асли одамзод,
Фақат унинг шакли қорилган лойдан.
Бир куни у шаксиз бўлажак озод
Ва учиб кетади ер деган жойдан.
Муқаддас даргоҳда у бошлар ҳаёт,
Илоҳий сувратда латиф ва нурлик.
У ерда янграйди энг гўзал баёт,
У ерда ҳукмрон абадий ҳурлик.
Ўшал манзил сари талпинар руҳим,
Дилим ишқ ўтида куйиб борадир.
Бу дунё шунчаки мусофирхона,
Бунда вужудимнинг кули қоладир.

2002



АФУ ЭТГИН

Эртанги кун тақдир хатида
Не ёзилган менга ноаён.
Лой вужудим салтанатида
Рухим тинмай қилар ғалаён.
Кимлигингни англа деб гирён,
Юксакликка мени чорлайди.
Лекин нафсим ошноси- шайтон
Ҳар қадамда йўлим пойлайди.
Икки ўтнинг исканжасида
Мен иккига парчаланаман.
Турган каби жар ёқасида
Изтиробдан лов-лов ёнаман.
Фақат сенга айтгум дардимни,
Танҳо ўзинг энг содиқ ёрим.
Кеч уйғонган ожиз бандангни
Афу этгин, Парвардигорим!

2004.



СЕВГИМ

Марвариддек қалбим тубида
Пок севгимнинг ёди яшайди.
У умримга бағишлар илҳом,
Унинг билан умрим яшнайти.
Маккор дунё хийлаларидан
Бўлмагайман асло паришон.
Унинг ёлғон салтанатида
Яшайпман етгунча имкон.
Қисматимдир- оғиру енгил
Йўлларига кўниб қолганман.
Чин дунёга ёруғ юз билан
Бормоқликни ният қилганман.
Севгимнинг пок шуълаларидан
Кўнглим турар доим ёришиб.
Бир кун тугаб қолганда умрим
Рухим кетар унга қоришиб.

2005й.



ЭНГ УЛУҒ НЕЪМАТ

Турфа одамлару ташвишлар аро,
Яшаркан фикринг ҳам борар ўзгариб.
Онгинг ҳам ўсади лаҳзама лаҳза,
Очилиб боради қалбинг кўзлари.
Эришдай туюлар баъзан ўзингга
Юксак оҳангларда ёзган шеърларинг.
Масъуллик сезасан ҳар бир сўзингга,
Англайсан кўплигин қалби кўрларнинг.
Баъзан оёғингдан чалмоқчи бўлар,
Номард рақибларинг, майда гап дўстлар.
Мақсад юксак бўлса, ким бўпти улар?
Қалбингда яшашга иштиёқ ўсар.
Дунёга боқасан тийран кўз билан,
У ҳам жаҳолатдан жуда чарчаган.
Энди муҳаббату ширин сўз билан
Далда бермоқ керак барча-барчага
Сен теран англайсан нажот ишқдадир,
Энди ҳар бир фурсат сенга ғанимат.
Аллоҳ ризоси ҳам эзгу ишдадир,
Ҳақ ризосин топмоқ - энг улуғ неъмат.

13.01.2007



Ўзликни англамоқ йўлидир мушкул
Бунда бериёзат бўлмади силжиб.
Гарчи ниятинг пок холисдир буткул,
Гарчи дилда фақат Ҳақнинг илинжи.

Ибодат қилсанг ҳам топмассан роҳат,
Кўнглинг ёришмагай юурсан хомуш.
Ҳақнинг раҳматига етурсан фақат,
Рухингда юз берса буюк уйғониш.

09.09.04



Кўнглим менинг, эй нур каби ёруғ кўнглим,
Шабнам янглиғ губорлардан фориғ кўнглим.
Қисматимнинг пасту баланд йўлларида
Гоҳо баҳор, гоҳо куздек сариқ кўнглим.
Ошно эдик, гарчи гўзал хаёлларга,
Дучор бўлдик кўп доғули шамолларга.
Аршмас, фано тупроғида сарсон юрдик,
Жавоб излаб жумбоқ тўла саволларга.
Садоқату диёнатдан айтдик зорлар
Тушунмади бизни асло дўсту ёрлар.
Эрмак бўлдик юраги тош сулувларга,
Бошимизга ҳижронидан инди қорлар.
Кеч англадик Ҳақсиз дунё чоҳ эканин,
Танҳо ўзи йўлбошчию шоҳ эканин.
Ором фақат ҳақ ишқида ёнмоқлигу
Ибодат-ла дунё гулшан, боғ эканин.
Беҳудага ўтказмасдан шунча фурсат,
Бўлмасмиди Ҳақ сорига юзни бурсак.
Сароблардан ҳақиқатни излагунча
Бўлмасмиди Ҳақ ишқида ёниб юрсак.

2003 йил

ЭНДИ ҲАҚ ДЕБ ЯШАМОҒИМ ШАРТ

Яшаяпман гоҳ ғамгин, гоҳ шод
Юрак тўла илинжим билан.
Гоҳо нафсга банда, гоҳ озод,
Орзу, армон, ўтинчим билан.
Яшаяпман, қирқ тўртга кириб
Топмади ҳеч юрагим ором.
Тушларимга киради ҳамон
Олисларда қолган дилором.
Баъзан ўтган умрим дафтарин
Варақлайман сарҳисоб учун.
Яшадимми Ҳаққа муносиб,
Бандалардек мен, мисол учун?
Қулоқ тутсам халқ мақолига
Камолотга етибман мен ҳам.
Энди Ҳақ деб яшамоғим шарт,
Кичик ёшдан ўтибман мен ҳам.
Барча айбу нуқсонларимни
Тузатмасам бўлгайдир уят.
«Тангри ўзи қўллагай - дерлар,
Гар пок бўлса кўнгилда ният».
Яшаяпман гоҳ ғамгин, гоҳ шод...

15.01.2012 й.

VII

Кызтумор





ТҮРТЛИКЛАР

Ёмғир ёғаётир уйғон, эй юрак,
Заминга инмоқда неча минг малак.
Ғанимат онларнинг кадрига етгин
Ижобат бўлғуси ҳар қандай тилак.



Одамлар кўнглига кўнгил билан бок,
Қалбингда эзгулик чироғини ёқ.
Яхшилик соғиниб яшасанг мудом
Сенга ҳам яхшилик қайтгайдир ҳар чоғ.



Туғилмаган яхшидир, ғафлат босиб юргандан,
Севги нима англамай, паймонаси тўлгандан.
Ошиқларга ёр васли насиб айласин, аммо
Кутиб яшаган яхши севиб жудо бўлгандан.



Бир шеър ёзсам муҳаббатга тумор бўлса,
Тош диллар ҳам эриб ишқдан бемор бўлса.
Кўнгилларга малҳам бўлса дуо каби,
Ғойиб кўнгли кеча-кундуз бедор бўлса.



Тангри бизни лойдан пайдо айлади,
Ҳусну жамолига шайдо айлади.
Севгининг кадрига етсин деб доим,
Заминда васлига гадо айлади.





Дилинг ойинасин поклагин зангдан,
Ақл чирогингни тоза тут чангдан.
Шайтон ва нафсдан енгилмай десанг,
Бир он ҳам толмагин муқаддас жангдан!



Билмай омонатни гарданга олдик,
Бу фоний дунёда хатарга қолдик.
Ортга йўл йўқ, фақат олдинга йўл бор,
Ғариб жонимизни қийноққа солдик.



Аллоҳ ҳукмларин сен рад этмассан,
Аммо мартабага нечун етмассан?
Тасдиғинг мустаҳкам бўлса кўнгилда,
Сув узра юравер, чўкиб кетмассан!



Жаннатда яратиб Одам Атони,
Ерда авф айлади қилган хатони.
Синаб кўрмоқ учун иймонимизни,
Яратиб кўйдими бой ва гадони?



Замин юзи дастурхони раҳматдир,
Банда учун ҳаёт буюк неъматдир.
Куфронаи неъмат қилса ким агар
Оқибати қайғу ила ҳасратдир.



Одам учун ору номус қимматдир,
Мартабага элтгувчи бу ҳимматдир.
Ўн саккиз минг олам гўзалдир, аммо,
Аёл гўзал ҳилқат ичра ҳилқатдир.



Улуғ тоғлар замин учун савлатдир
Ою қуёш, юлдузлар ҳам давлатдир
Ҳақ яратган барча санъатлар ичра
Севги ҳисси энг инжа бир санъатдир.



Ҳурматга ким лойиқ эрур ҳурмат керак
Марҳаматга муҳтожларга раҳмат керак.
Ким боёну ким гадодир, бари ўтар
Охир дамда барчага ҳам нажот керак.



Эй яхшилар шукронаи неъмат қани?
Риё эмас, дуо учун хизмат ғани?
Сохиби мол аслида ягонадир,
Авомлару фақирларга шафқат қани?



Бир ҳовуч эзгулик, бир мисқол меҳр,
Бўлса агар дилни нурафшон этгай.
Шуъладек бир согинч уйғонса қалбда,
Бутун борлигингни дурахшон этгай.





Кетса ҳамки кучу қувват билаклардан,
Иймон шами ўчмаса бас юраклардан.
Дерлар, орзу-умид билан тирик инсон,
Айирмасин бизни ёруғ тилаклардан.



Қаерда бўлсанг ҳам йўлдами, чўлда
Тангри йўриғидан чиқмагин зинҳор.
Сен ёлғиз эмассан, икки елкангда
Аъмолинг ёзгувчи фаришталар бор.



Одам Ато наслиданмиз барчамиз
Лекин буни тушунмаймиз қанчамиз.
Молу дунё учун бир- биримизни
Аямасдан бошимизни янчамиз.



Дунё ўтди манманлаган зўрдан ҳам,
Мансаб кетиб тушиб қолди тўрдан ҳам.
Буюкликни даъво қилган “даҳолар”
Ожизликда баттар экан кўрдан ҳам.



Ҳаловатим сўздир, аъмолим сўздир,
Топган саодатим, камолим сўздир.
Сўз ҳажри куйдирар жисми жонимни,
Бевақт ўлар бўлсам заволим сўздир.



Ҳаёт ошиқ ўйин каби қўп хуморли,
Ёзидан сўнг қишлари бор музли, қорли.
Йиғласанг ҳам Ҳақ ҳукмидан қўрқиб йиғла,
Имон эрур мард йигитнинг кўзтумори.



Афсус чекаман ўтган азиз умримни ўйлаб.
Ҳар лахзаси гуноҳ эрур, бўлмагай сўйлаб.
Ақлим кириб тўғри яшай бошлаганимда
Остонада ажал оти турибди бўйлаб.



Сен ойдирсан, юзларида доғлари йўқ,
Сен гулдирсан, ўхшаши йўқ боғлари йўқ,
Билмам аслинг фаришталар наслиданму
Сенга ошиқ бўлганларнинг соғлари йўқ.



Сизни севиб телба бўлдим, хумор бўлдим,
Сизни севиб бир умрга бемор бўлдим.
Висолсиз ишқ оловида тобландиму
Муҳаббатни асрагувчи тумор бўлдим.



Сени севиб ишқ илмига толиб бўлдим,
Аччиқ хижрон шаробига қониб бўлдим.
Англолмадим офтобмидинг, оловмидинг,
Висолингга етмай туриб ёниб бўлдим.





Ишқнинг занжирила айладинг банди,
Жон қушин ўзинга қилдинг асранди,
Гар қўшиб узатсанг васлинг майидан,
Не тутсанг олгайман заҳар ё қанддир.



Аввало пок бўлсин дил-имонимиз,
Сўнгра ҳалол бўлсин топган нонимиз.
Шу икки нарсага муяссар бўлсак
Файзли бўлар бизнинг дастурхонимиз.



Гоҳо от сураман, гоҳо пиёда,
Курашдан қўрқмасман тайёрман доим.
Рақибларнинг иши аён дунёда,
Номард дўстдан ўзинг асра, Худойим.



Ким ошкор айтади, ким эса зимдан,
Не учун керақдир менга шеър ёзиш.
Ҳар бир яратилган янги сатримдан
Ҳаётим маъноси топар афзоиш.



Менинг кўнгилдан ўзга мулким йўқ, хирожим йўқ,
Мулк ичра умидимдан ўзга бир сирожим йўқ.
Ҳайратимдан бир водий, ишқимдан гулбоғим бор,
Меърож истайди руҳим ва лекин иложим йўқ.



Лафзи йўқ кимсаларнинг сафида марди бўлмас,
Аларда мард пойининг ҳаттоки гарди бўлмас.
Келбат кериб, ҳаволаб, виқор-ла юрган билан,
Қалбида эл дардидан заррача дарди бўлмас.

11.03.2012й.



Оғир лаҳзаларда бўлма ноумид,
Сабр либосини ташлама асло.
Дарду ташвишини кўрармиш раво,
Ўзи ёрлақаган қулига худо.

2009



Яхшилик қилгину сувга ташлагин,
Миннат каломини сўзлама зинҳор.
Савоб арқонини маҳкам ушлагин,
Унутма, олдинда ҳисоб-китоб бор.

2005



Она адирларга менгзар рангимиз,
Гиёҳдек сарғайган юрак, бағримиз.
Гиёҳчалик қадр топмадик юртда,
Хок бўлсак ошагайдир балки қадримиз.

29.10.2013

VIII

Шиюнгу мөхрәдан устувор дунё



- *Бу дунёда*
- *Дўстларим*
- *Дўстларимга*
- *Ўлмас Жамолга*
- *Усмон Азимга*
- *Шодмон Жўрага*
- *Осмон қора*
- *Ишончу меҳрдан устувор дунё*
- *Оҳу кўзлар*
- *Турғун Алига*
- *Энди йўлимиз бир*
- *Ургут*
- *Отабек Ғойибовга*
- *Бир донога*
- *Яшасалар эди*
- *Ҳиммат ва хайр*
- *Маърифат аҳлининг*
- *Фалсафа*
- *Арафа*
- *Бир дўстимга*
- *Хизматдош дўстларимга*
- *Гуллар раъноси*
- *Интернет, мен ва дўстларим*
- *Гуллар табассуми*
- *Ҳақ йўлидан кетмайлик тойиб*
- *Дўстларим-давлатим*
- *Дўстлар муҳтож бўлганда*
- *Аллоҳ ўзи сизни суйсин*
- *Қушчага*
- *Елиб борар умрим қарвони*
- *Асл инсонлардан*
- *Оналар байрами муносабати билан*
- *Армуғон*
- *Даврон Гулмуродовга*
- *Валижон Мусоевга*
- *Меҳр қадри*
- *Йўлимизни беринг, биродар!*
- *Одамий бўлмаса ким*
- *Тангри ҳар кимга*
- *Она юртим Тожикистоним*
- *Ўтган ишига–саловат*
- *Ҳикмат*
- *Зорим бор юракда*
- *Раитонзамин фарзандлари*
- *Устоз Ёдгор Обидга*



Бу дунёда энг катта
Бойлигимсиз, дўстларим.
Ўзлигимни англаган
Борлигимсиз, дўстларим.
Бир куни келиб муддат
Узилса умрим тори.
Армон бўлади фақат
Дўстларимнинг дийдори.

2003

ДЎСТЛАРИМ

Диёнатли инсонларнинг кўзида ўт чакнагай,
Ҳаққа берган ваъдасини юрагида сақлагай.
Оналарнинг оқ сунин ҳам асл мардлар оқлагай,
Бу дунёда ёруғ юз-ла яшаб ўтинг, дўстларим,
Ҳақ қошига иймонингиз олиб кетинг, дўстларим.
Асл марднинг тили билан дили доим бир бўлар,
Юрагида эзгуликдан олам-олам сир бўлар.
Умр йўли баъзан равон, баъзан доvon-қир бўлар
Бу дунёда ёруғ юз-ла яшаб ўтинг, дўстларим,
Ҳақ қошига иймонингиз олиб кетинг, дўстларим.
Бу оламда ҳамма меҳмон, танҳо Ўзидир мезбон,
Қаҳр қилса соврилгайдир тўзондек еру осмон,
Гар қутқарса бандасини қутқарар ёлғиз иймон,
Бу дунёда ёруғ юз-ла яшаб ўтинг, дўстларим,
Ҳақ қошига иймонингиз олиб кетинг, дўстларим.
Булҳаваслар қайдан билсин элнинг қадр-қийматин,



Эр йигитни эр демаслар гар бўлмаса ҳиммати,
Ҳасанбек ҳам ашъор этди улуғларнинг ҳикматин,
Бу дунёда ёруғ юз-ла яшаб ўтинг, дўстларим,
Ҳақ қошига иймонингиз олиб кетинг, дўстларим.

2006й

ДЎСТЛАРИМГА

Ғанимат умрда дўстларим,
Юракни ёндириб яшайлик.
Нур сари интилиб, талпиниб
Мардона қадамлар ташлайлик.
Вақт ўтгач дилларда қолмасин,
Афсус ва надомат куллари.
Биз ўтган йўлларда яшнасин
Мардлик ва жасорат гуллари.

2003.

УСТОЗ ЎЛМАС ЖАМОЛГА

Азиз элнинг қадр топган ўғлонисиз, азиз устоз,
Одамийлик бўстонининг боғбонисиз, азиз устоз.
Дилингиздан таралгайдир маърифатнинг шуълалари,
Нафис назмий салтанатнинг султонисиз, азиз устоз.
Истагимдир яна йиллар шу гулшанда жавлон уринг,
Девонлардан кўнгилларга бузиб бўлмас кўприк қуринг.
Ширин ҳаёт «Сурур»идан доим «Масрур» бўлиб юринг,
Сиз миллатнинг ифтихори ва шонисиз азиз устоз.

2009.





УСМОН АЗИМГА БАҒИШЛАЙМАН

Мен Усмон Азимман, тушуняпсанми?
Нега танайман мени, севгилим?
Кўргин пешонамнинг ёриқларини,
Бошимга қарагин тутунга тўлган.
Хазонга айланган дарахт-вужудим,
Унда ўз аксини қолдирди йиллар.
Севгилим, мен сенга гул келтирдим, ол,
Юрагимда унган ахир бу гуллар!
Севгилим, мен сенга гул келтирдим, гул,
Наҳот танайман мени севгилим?! 2008

ШОДМОН ЖЎРАГА

Дедим: ғамга ботдинг Шодмон не учун?
Дардинг куйламайсан чок этиб яко?
Деди: ҳақни англаб етгач мен учун
Шеър ёзиш, куйлашлар бўлди бир чақа.
Дедим: увол бўлур Тангри неъматини,
Шеър-ла баён айла холингни, Шодмон.
Деди: менга йўқдир шеърнинг қиммати,
Кўйида ғамгинман, кўйида шодон.
Дедим: ёлғизликнинг эгаси Аллох,
Узлатнинг шавқидан сўзла бир оғиз.
Деди: атрофимда одамлар тўп-тўп,
Аммо ҳамдардим йўқ, ёлғизман, ёлғиз.
Дедим: ёр васлидан мастмисан, Шодмон,
Қай мақомда ўзни ҳисоб этарсан?
Деди: ошиқликнинг лаззати ҳижрон,
Васлин топган онинг куйиб кетарсан. 09.03.2012



*«Ёмғирлар йиғлади мен кулиб ўтдим,
Қабрлар йиғлади мен кулиб ўтдим.
Кипригига ортиб дунё дардларин,
Сабрлар йиғлади мен кулиб ўтдим»*
Шодмон Жўра

Осмон қора тортиб ёмғирлар ёғса,
Сен нечун куласан, тушунтир, Шодмон?
Қабрида зор тортиб, зорлар йиғласа,
Сен нечун куласан, тушунтир, Шодмон?
Кипригига ортиб дунё ғамини,
Сабри тугаб борар зотлар йиғласа,
Айтчи, сен топдингми дунё сирини,
Недан шодсан, Шодмон, нега куласан?
Қаламни синдирдим, энди ёзмайман,
Тамоша айлайман, -дейсан, дунёни.
Қалам синдиргунча Мавлоно Румий
Ҳақ йўлга чорлаган бутун Қўниёни.
Маломат қилишдан йироқман, аммо,
Маъносин топмадим мен ушбу сирнинг.
Тилагим, ҳақ йўлдан чиқмайлик асло,
Руҳи мадад бўлсин Мавлоно пирнинг.

10.03.2012й



ИШОНЧУ МЕҲРДАН УСТУВОР ДУНЁ...

Биродарим Маҳмадали Назаровга

Меҳру муруввату хайру саховат
Асл мардларга хос бўлган хислатдир.
Ҳожати бўлганга айламоқ рағбат,
Мӯъмин бандаларга гўзал суннатдир.

Асл мақсад Ҳақнинг ризосин топмоқ,
Дунё бизлар учун имкон- фурсатдир.
Азалийдир банда ризку рӯзи ҳам,
Лойиқ яшаб ўтмоқ кўп машаққатдир.

Инсонни Ҳақ лойдан барпо айлади,
Қодир сифати-ла, бу бир санъатдир.
Оламга халифа этиб сайлади
Демак, инсон қадри нечоғ баланддир.

Ишончу меҳрдан устувор дунё,
Рост сўз қиролидир имон шаҳрининг!
Гоҳо таърифлашга ожизман чиндан,
Аллоҳ розилигин тилаб чин дилдан
Ғойиб изҳор этди сизга меҳрини!

03.12.2014йил.



ОҲУ КЎЗЛАР ТАЪРИФИДА

Олма-Ота бағрида ўтди
Ёшлигимиз, навқирон онлар.
Бизни ишққа мубтало этди
Оҳу кўзли уйғур жононлар.
Бахтимиздан куйларди кўшиқ
Нафис, хушбўй олмалар гули.
Дардимизни куйларди кўшиб,
“Бўзтўрғай»га қозоқ булбули.
Оҳу кўзлар таърифин куйлаб
Ёзсак арзир минг битта ғазал.
Уйғур қизлар бўлмаса агар
Олма-Ота бўлмасди гўзал.

2.03.08.



ТУРҒУН АЛИ АСРОҒА

«Узоқ йиллар бундан илгари
Келиб кетган эмиш бир карвон».
Шундан бери ҳижрон даштида
«Афсус» чекар Турғун паҳлавон.
«Қизғонарди шаббодадан» ҳам
«Орзулари бир жаҳон» эди.
«Кўшни қиз»нинг асири бўлиб
«Ҳаётимсан сен менинг» дерди.
Аммо тақдир шу экан, карвон
Олиб кетмиш сулув ёрини.
Юрагида «бир жаҳон армон»,
Куйлаб юрар кўнгил зорини:
«Алдаманг эй, алдамчи қизлар,
Ҳар қадамда сизни деган бор.
Ўзга юртдан сиз изламанг ёр,
Суйган қалблар чекмасин озор».

03.10. 2011йил.



ЭНДИ ЙЎЛИМИЗ БИР...

Яратган Эгамдан илтижо билан
Дунё сўрамадик, сўрадик иймон.
Бору бирлигига таваккал қилиб,
Офият тиладик, қилмадик гумон.
Дўст бўлдик, таъманинг илинжи эмас,
Ҳақнинг ваъдасига ишониб дилдан.
Англадик умримиз абадий эмас,
Фақат пиллапоя ҳақиқий йўлда.
Масжид ҳовлисида тафаккур этиб,
Тикилдик очилган қийғоч гулларга.
Бир дарвиш домла¹нинг этагин тутиб,
Кўшилдик мўмину содиқ қулларга.
Балки машҳур шоир бўлмадик, аммо,
Туйдик бандаликнинг оғир юкини.
Энди йўлимиз бир, йўлимиз танҳо
Яшаймиз ягона Ҳаққа юкиниб.

7.08.05

1. устоз Мирзоали Абдурахмон ўгли кўзда тутилган.



АХИЛ ЭЛНИНГ ДАСТУРХОНИ

Эсанбой акага

Менинг доим Ургут томон боргим келар,
Гўзал Ургут боғларини кўргим келар.
Хунарманду саховатли одамларнинг
Таърифида кўшиқ куйлаб юргим келар.
Дунёларга донғи кетган Ургутдирсан,
Хўжа Хизр назар қилган Ургутдирсан.
Қайга борса ўшал юртни обод қилган,
Ахиллигу дўстлик қасрин бунёд қилган.
Неча улуғ сиймолари бор Ургутнинг,
Элу юртнинг бахти учун хизмат қилган.
Дунёларга донғи кетган Ургутдирсан,
Хўжа Хизр назар қилган Ургутдирсан.
Дунёдаги барча қавму қариндошлар,
Сиздек иноқ бўлса агар олам яшнар.
Ахил элнинг дастурхони файзли бўлар,
Тотувликдан элу юртнинг кадри ошар.
Дунёларга донғи кетган Ургутдирсан,
Хўжа Хизр назар қилган Ургутдирсан.

2011.



ОТАБЕК ҒОЙИБОВГА

Йиғилишар эмиш оқ туялардек
Маҳшарда масжидлар Ҳақнинг қошида.
Масжидга боғланур чин ошиқлардек
Омад қуши кўнса кимнинг бошига.
Чунки бунда банда ўз тилагини
Тангридан сўраса етгай муродга.
Ҳақ дегай: «Уйимда ноумид қилсам,
Ярашмас мен каби шарафли Зотга!»

20.06.2011йил



Бир донога бердилар савол:
«Айт, ҳаётдан афзалроқ не бор?»
Деди: «Кимдан қолса яхши ном,
Афзалроқдир ҳаётдан минг бор»
Сўрадилар донодан такрор:
«Айт, ўлимдан афзалроқ не бор?»
Деди: «Ёмон отлиқ бўлмоқдан,
Ўлим афзал саналар минг бор».

2004





Яшасалар эди одамлар
Етиб бир бирин қадрига.
Камайрди юракда ғамлар
Қўшиларди умр умрига.
Муте экан умримиз токи
Дунё деган ёвуз сеҳрга.
Яшагаймиз доимо ёлғиз
Мудом ташна бўлиб меҳрга.

2004

ҲИММАТ ВА ХАЙР

Йигитнинг бир қўли хайр дейдилар,
Ҳиммат камарини боғланг йигитлар.
Эл дуосин олай десангиз ўзни
Ватан хизматига чоғланг йигитлар.
Буюк боболарнинг авлодидирмиз,
Шу юрт ободлиги бизнинг бахтимиз.
Йўли очиқ бўлса кимнинг агарда,
Умри узун бўлгай дейди халқимиз.
Асли савоб ишда сиз бир сабабкор,
Тангри ўзи қўйган ризқ-рўзни сочиб.
Қишлоқ четидаги хув бобо чинор,
Минг йил яшаётир кафтларин очиб.

20.06.2010й.



Маърифат аҳлининг бедор қалбида,
Эзгу ҳис-туйғулар этар ғалаён.
Ўз бурчин англайди Ватан олдида,
Дилда борин тилда айлайди баён.

Маърифат аҳлининг дил ойнасида,
Акс этиб туради мозий суврати.
Ҳар ёзган сатридан туғилажакдир,
Эртанги кунларнинг тасаввуроти.

17.04.07

ФАЛСАФА

Сийлаганди тангри таоло,
Бадавлату бахтиёр эдим.
Менга бойлик керакмас асло,
Дўстларим бор бўлса бас, дердим.
Ногоҳ, омад юз бурди мендан,
Фақирликни юборди тақдир.
Дардим айтай десам юракдан,
Тинглагувчи дўсту ёр йўқдир.
Тарк этдилар ошнолар бир-бир,
Дарвиш руҳим ёлғиз қолмоқда.
Тангрим, менга молу-давлат бер,
Дўстларимни сотиб олмоққа.

08.08.2004 й



АРАФА КУНЛАРИ

Арафа кунлари муҳаббат билан
Кўнгил эшикларин очиб қўйинг ланг.
Кимнингдир дилини оғритиб билмай,
Кимгадир яхшилик қилгансиз, эсланг.
Арафа кунлари меҳрингиз дўстим
Асло дариг тутманг бир-бирингиздан.
Токим яхшиликнинг гул, чечаклари
Яшнаб униб чиқсин дил тўрингиздан.

11.01.2010й

БИР ДЎСТИМГА

Йўқламаймиз бир-биримизни
Аввалгидек ғамгусорлик йўқ.
Билиб бўлдик бор сиримизни
Устимиз бут, қорнимизда тўқ.
Тоғиб олдик ўз йўлимизни,
Ўтаётир рўзғоримиз ҳам.
Кўрсак ташлаб кўз қиримизни
Бош ирғаймиз-кетамиз илдам.
Иккимиз ҳам эмасмиз айбдор
Айбдор эрур ғурур, кибримиз.
Дўст бўламиз тупроқдек хоксор
Дўппайганда бир кун қабримиз...

11.10.2013-йил



ХИЗМАТДОШ ДЎСТЛАРИМГА

Бизлар аҳил сафдошлар эдик
Тарқалмаган эди иттифок.
Майда- чуйда гапни айтмасак
Орамизда йўқ эди нифок.
Ҳар қандайин ҳолатда, ишда
Мардлик эди бош шиоримиз.
Яқдил эдик ҳар бир юмушда,
Улуғ Ватан ифтихоримиз.
Эзгу орзу, пок ниятлардан
Қалбимизда жўшарди ҳислар.
Ҳали яна учрашамиз деб
Ишонч билан яшардик бизлар.
Бизлар тожик, уйғур, ўзбек, рус-
Фарзандлари бир мамлакатнинг,
Битта байроқ остида юриб
Ўтагандик Ватан хизматин.
Қорлар юрти олис Камчатка
Бизлар учун эди қадрдон.
Эй хизматдош дўстларим сизни
Дийдорингиз кўмсайман ҳар он.
Ҳар йил зафар сафин тузардик
Ўзимизни курашга чоғлаб.
Эзгулик ва эрк тантанаси¹
Мудом бизни тургайдир боғлаб.

04.05.2010

1. 1-9 май-кўзда тутилган.



ГУЛЛАР РАЪНОСИ

Раъно Муборизга

Зебо санамлар ичра тенгсиз барноси сенсан,
Боғу чаманлар ичра гуллар раъноси сенсан.
Шоираи давронлар ичра аълоси сенсан,
Тожик қизи бу жоним бўлсин жонингга пайванд,
Оташин нигоҳларинг этди мени чашмбанд.

Дур, жавоҳир йиғилган хазинами даҳонинг,
Шириндир шаккардан ҳам, айтчи, болми забонинг?
Тоғ гулидек муаттар бўй таратар ҳар ёнинг,
Тожик қизи бу жоним бўлсин жонингга пайванд,
Оташин нигоҳларинг этди мени чашмбанд.

Гуллаб яшнади Ватан истиқлол давронида,
Барпо бўлди боғ, чаман яқдиллик замонида.
Ғойиб топди бахтини шоирлар маконида
Тожик қизи бу жоним бўлсин жонингга пайванд,
Оташин нигоҳларинг этди мени чашмбанд.

07.07.2015 йил.



ИНТЕРНЕТ, МЕН ВА ДҮСТЛАРИМ

Интернет Худонинг неъматидесам,
«Дажжолнинг кўзи у» дер бир танишим.
Кимга қандай билмам, у туфайли мен
Кўплаб янги дўстлар билан танишдим.
Ёдгор Обид деган шоир номини
Ўқигандим Устоз¹ шеърида бир пайт
Интернет туфайли ҳамсухбат бўлдим
Шеърларин ўқийман энди ҳамма вақт.
Мавлон Шукурзода –асил зиёли
Ҳайрхоҳ устоздир, дўстдир беминнат.
Шеърларим чоп этди суратим билан
Ватандошим дея кўрсатиб ҳиммат.
Шеърларини ўқиб катта бўлганман
Хуршид Даврон, Солиҳ, Усмон Азимнинг!
Интернет орқали ташаккуримни
Билдирмоқ шогирдлик бурчим ўзимнинг.
Рауф Парфи каби сочлари оппоқ
Карим Баҳриевни борми билмаган?
Озод, эркин сўзга у доим муштоқ!-
Ҳақ учун курашни канда қилмаган.
Катта мансабларда ишламаса ҳам
Ҳамиша миллатнинг ғамини ейди.
«Бир неча тилларни биласиз, ука,
Яхши ёзмоқликка мажбурсиз» дейди.
Ахмад Аъзам менга меҳрибон устоз!-
Ҳол авҳол сўрасам кетади яйраб.

1. Абдулла Орифнинг «Ҳайронлик» шеъри кўзда тутилган.



Тоби йўқлигидан нолийди бир оз,
Доимо шай турар қаламин қайраб
Исмат Хушев номи ҳаммага таниш
Унга хос очиклик ва самимият.
Ўзбеклар номини дунёга ёйиш,
Исмат ака учун энг улуғ ният.
Шоир аҳли азал зиё истайди
Маърифат нурида қалбини поклаб.
Давронбек дўстимни бир бор кўрсайдим
Бағримга босардим маҳкам кучоқлаб.
Икки китобимнинг нусхаси мавжуд
Давронбек дўстимиз яратган сайтда.
Кувонч, ҳаяжондан титрайди вужуд,
Бунда интернетнинг хизмати катта!
Қанча дўстлар топдим, мард ва самимий:
Умидбек, Мурадбек, Дадахон Ўзбек,
Дилшод Жамолиддин, Фазлиддин ака
Дилимга яқинсиз- узукка кўздек.
Шавкат Раҳмон руҳи биз билан яшар
Мудом чорлаб турар юксак парвозга!
То зулм бор экан «ўтқир сўз»¹ билан,
Бизлар жўр бўламиз жасур овозга!
Сирожиддин менга ҳамиша ҳамроҳ,
Ҳар ишда суянчиқ ва мададкорим.
Тушкунликка тушиб қолганда ногоҳ,
Тасалли берувчим ва дилбардорим.
Элда дерлар «жиян тоғага тортар»,
Мен эса аксинча жиянга тортдим-

1. Шавкат Раҳмон бораси.

Адашиб юрганда нодўстлар аро
Унинг сиймосида чин дўстни топдим.
Сўлим Сирдарёда Устоз Аҳмадий
Шогирдларга таълим, тарбия берар.
Тошкент эсламаган шоирларни у
Интернет орқали эслатиб турар.
Ким ватандўст бўлса чиндан, агарда
Аввало туғилган юртини севар.
Маръямбону яшар Тожикистонда,
Аммо Фарғона деб юраги куяр!
Ўш –менинг бобомнинг туғилган ери!
Болаликдан менга қадрли бу ном!
Аъзам Раҳим билан Зиё Шокирни
Қондош, қардошим деб қилгум эҳтиром.
Бир садо келади Наманган ёқдан
Ширин соғинчларни кўзғаб дилимда.
Муслимбек шеърлари барчага ёқар,
Ўзи ҳам ярашур муслим элимга!
Дунёда аёлдек меҳрли зот йўқ
Мен бунга неча бор бўлганман иқрор.
Матлуба опамдан мудом кўнглим тўқ-
Мендан ҳол сурайди такрор ва такрор.
Бетакрор шоира Олимабону
Олис Европадан салом йўллайди.
Нуқтадон билимдон –тилшуносдир у!
Ҳар қандай ҳолатда мени қўллайди.
Руҳан яқин бўлар дўстлар аслида
"Дўст дўстнинг ойнаси" деган гап ҳам бор.
Опа-сингил топдим назм дарсида-
Жумагул, Хосият дўстдир бетакрор.



Ғазал бўстонида ташбеҳлар излаб
Юрган Гулбаҳорга тасанно дегум.
Юрагим турганда ғашланиб, бўзлаб
Қувонч бағишлайди бир Ғўзал Бегим!
Умр иборатдир қувончу ғамдан
Баъзан шодман, баъзан чўкади кўнглим.
Тасалли беради қайғули онда
Мени олислардан йўқловчи синглим!
Бир Момо Ҳаввонинг муносиб қизи
Москва шаҳрида ижод қилади.
Соҳиббахонимнинг ҳар битта сўзи,
Кўнглим боғларини обод қилади!
Хосият Бекмирза – Ўшликлар фаҳри,
Бобур ижодининг ошиғи эрур.
Чоп бўлган китоблар меҳнат меваси-
Хосиятнинг зорли кўшиғи эрур!
Улуғ боболардан бизларга суннат
Ўқиб ўрганмоқлик форс шериятин.
Кимга ошно бўлса шижоат, ғайрат,
Ортгуси билими ва маърифати.
Неъмат чексиздир одил худонинг
Менга замондошдир икки улуғ зот.
Неъматулло ака, Одил Икромий
Мавлавий руҳини айламоқда шод.
Менинг юрагимни ўртар бир армон,
Унутиб бўлмайди бу улкан ғамни.
Эсламай бўлурми ахир, ушбу он,
Оташнафас шоир Асқар Маҳкамни!



Ваҳдатдан¹ Тошкентга келгач шоирнинг
Тафаккур чечаги яшнаб очилди:
««Эрк»деди, бўғзини қиличлар тилди,
Ва сўзлар дорига осилди...»²
Шавкат Раҳмон каби жўмард ва ботир,
Мусулмон элининг шоири эди.
Бугун унинг ўрни билинаётир,
Румий шуносларнинг нодири эди.
Ҳали ёш эди у, балким яшарди,
Бўлганда озгина олгир, устамон.
У "теран англади аҳли башарни
Қутқарса кутқара олади имон!»³
Қадим Авестони ўзбек тилига
Ўгириб миллатга этди армуғон.
Маломат ханжарин шоир дилига
Санчди шафқат билмас жоҳил оломон!
Ғоят оғир эди «гуноҳ» залвори-
Ҳаллождек ҳайқириб «Аналҳақ» деди!
Буюк шоирларнинг шудир қисмати -
Жоҳиллар шоирнинг бошини эди.
Аммо неча йилдир кўҳна Туронда
«Ҳақ»ила «Аналҳақ» қўлдан тушмайди.
Шоирни ўқишар Афғон, Эронда
Демак, Асқар Маҳкам номи ўчмайди!
Умр ўтар экан ҳар лаҳза, ҳар он,
Кўрган кечирганин сўйлар ҳар одам.

1. Кофарниҳон ноҳиясининг ҳозирги номи.

2. Шодравон Асқар Маҳкам сатрлари.

3. Шодравон Асқар Маҳкам сатрлари.



Ўз ҳолига қараб бо қадри имкон
Дунё келажагин ўйлар ҳар одам.
Ўзбек шериятин кенгдир осмони-
Офтоби, юлдузи ҳамда ойи бор!
Агар бутун бўлса дилда имони
Ҳар битга овознинг ўрни, жойи бор.
Ҳақиқат туғилар баҳс, талошларда,
Халқ борки бўлғуси шоиру оқин.
Ҳозирги ёшлардан–қаламкашлардан
Жавоҳир Абдулла дилимга яқин.
Бир фикрим бор дилда қатъий, синашта,
Не чоғлик тўғридир –буни билмадим.
Шеърият ортидан шуҳрат талашган
Кимсаларни сира шоир демадим!
Қисмат кимга қандай насиба берур,
Ҳеч кимса олдиндан айтиб беролмас.
Қувғинда эрк истаб юрган зотлар ҳам
Ўзбекнинг фарзанди-бегона эмас!
Кўп яхшилик кўрдим инсон зотидан-
Мунис ота-онам, опам, синглимдан.
Ушбу сатрларни ёзар эканман
Ўтган азизларим ўтар кўнглимдан.
Кетишди васлига зор килиб мени
Қанийди бир бора яна кўрсайдим.
Бошимга кўтариб юрсам арзирди,
Тириклар сафида улар юрсайди!
Аммо тақдир ҳукми шунақа экан
Ўзинг сабр бергин Қодир Аллоҳим!
Муборак онларда улар қабрини
Жаннат гулларига тўлдир илоҳим!



Яхшиям сиз борсиз яхши одамлар,
Сиз бирла ободдир синиқ кўнгиллар.
Ғам ғусса дилимни чулгаган дамлар
Сизнинг далдангиздан дардим енгиллар.
Бугун арафадир азиз дўстларим,
Қалбингиз илоҳий нурларга тўлсин!
Янаги муборак ҳайитга қадар
Ҳар янги кунингиз хайрли бўлсин!

12-14.10.13й

ГУЛЛАР ТАБАССУМИ

Шоира Гўзал Бегимга

Гуллар табассумин сиз кўрганмисиз?
Чиройли табассум қилади гуллар.
Улар суҳбатида ҳеч бўлганмисиз-
Кулганда юракдан кулади гуллар!

Гуллар табассумин сиз кўрганмисиз? -
Инсонга яхшилик тилайди улар.
Бахш этар эзгулик, бахш этар шодлик
Шундан яйраб-яшнаб унади гуллар!

Гуллар табассумин сиз кўрганмисиз? -
Самимий табассум қилади гуллар.
Сохталиқни билмас, ёлғондан кулмас,
Ёлғон табассумдан ўлади гуллар!

04.10.2013-йил, 14-30





ҲАҚ ЙЎЛИДА

Дўстим Эркинга

Дунё нима? Талошли уйми,
Ёки катта бозорми, дунё?
Марднинг марги номардга тўйми?
Яхшиларга озорми, дунё?
Тўғри яшаб юрганигни ҳам,
Кўролмади бир тўда олчок.
Ортингдан тош отиб дам- бадам
«Дўстим» дея очади қучок.
Бундайларга дилингни берсанг,
Ўт қўйишар хонумонингга.
Молингни-ку тортиб олишар,
Кўз тикарлар яна жонингга.
Дилни бериб ягона Ёрга,
Ҳақ йўлидан кетмайлик тойиб.
Салом бўлсин содиқ дўстларга!
Сана. Имзо. Ҳасанбой Ғойиб. 15.02.2011.

ДЎСТЛАРИМ - ДАВЛАТИМ

Мен билмаган эканман,
Мен адашдим бегумон.
Дўстлар давлатим экан.
Дўстларсиз ҳаёт ёмон.
Мен билмаган эканман,
Ўртанар жон беомон
Ёлғизлик азоб экан,
Ёлғизлик жуда ёмон. 01.02.2010



Дўстлар муҳтож бўлганда
Кўнгил эшигин очдим.
Бошимга иш тушганда
Дўстлар кўзимни очди.
Номард дунё, хор дунё,
Дўстлардан қилди жудо.
Мендан юз бурсалар ҳам
Уларни асра, Худо!

02.2010.

АЛЛОҲ ҒИЗИ СИЗНИ СУЙСИН...

Дўстим дея бағрим очиб
Сийлаганим билмаганлар.
Нозик онлар четга қочиб,
Ҳолим сўраб келмаганлар.
Омад кулиб боққан чоғлар
Мақтовдан тил тиймаганлар.
Бойлик учун мени севиб,
Аллоҳ учун сўймаганлар.
Яхши ёмон давраларни
Бизга раво кўрмаганлар.
Ваъда бериб оғир кунда
Ўз сўзида турмаганлар.
Шу ўткинчи дунё молин
Бизга кўзи қиймаганлар.
Гуноҳлигин билиб аммо,
Ғийбатдан тил тиймаганлар.



Аллоҳ сизга раҳм қилсин
Бизга раҳми келмаганлар.
Аллоҳ ўзи сизни суйсин
Севги нима билмаганлар.

03.12.2008.

ҚУШЧАГА

Ташрифингдан митти дўстим,
Хаста дилим тоғдай ўсди.
Ҳар кимнинг бор каму кўсти,
Бунга парво этмайсанми?
Ярим умрим ўтиб кетди,
Ошноларим сотиб кетди,
Менга тошлар отиб кетди,
Сен ҳам бир кун сотмайсанми?
Дўстлар қадрим билмадилар,
Назарга кам илмадилар.
Аҳдга вафо қилмадилар,
Сен ҳам ташлаб кетмайсанми?
Кўнглим эди меҳрга зор,
Топдим фақат ранжу озор.
Дунё экан кўхна бозор,
Дилим вайрон этмайсанми?
Давраларда юрдим, толдим,
Дўстларимдан кўнглим қолди.
Сенга дардим тўкиб солдим,
Элга дoston этмайсанми?

02.07.05 й



ЕЛИБ БОРАР УМРИМ ҚАРВОНИ

Ташвишлардан толиққанимда
Ўз қалбимга далда бергани.
Кетгим келар ёшлигим ўтган
Адирларга равоч тергани.
Юрсам дейман дўлона териб
Қизилжарнинг этакларида.
Умрим қолса аста айланиб
Болаликнинг эртақларига.
Аммо афсус қалбим армони
Ёшлиқ қайтиб келмас ҳеч қачон.
Елиб борар умрим қарвони
Борса келмас манзилга томон. 27.04.03.

АСЛ ИНСОНЛАРДАН ЯХШИЛИК ҚОЛУР

Жаҳонга келдингми сен меҳмон бўлиб
Ўшадир иқболинг, ўшадир бахтинг.
Рози бўлса сендан эл кўнгли тўлиб
Аслида шу эрур энг баланд тахтинг.
Барча атрофингда бўлса парвона
"Оллоҳга минг шукр"-пичирлар лабинг.
Йилларни ўйласанг мисли афсона,
Шу қадар тез ўтмиш-оқар сув каби.
Аҳли дардлар сендан шифо топсалар
Мамнун яшасалар ҳаётга қониб.
Исминг эшитганда "Балли" десалар,
Елкадош бўлсалар чорлаган онинг.
Вақтнинг шиддатини эзулик енгар,
Гарчи умр оти чопишдан толгай.
Асл инсонлардан яхшилик қолур,
Ғойибдан яхшилик бўлиб шеър қолгай. 2015



ОНАЛАР БАЙРАМИ МУНОСАБАТИ БИЛАН ЁЗИЛГАН ШЕЪР

Онадек вафодор борми дунёда?
Онадек фидокор борми дунёда?
Онадек ватандор борми дунёда?
Онадек ҳаққа ёр борми дунёда?
Онадек бахтга ёр борми дунёда?
Борлигин бахш этиб фарзанди учун,
Унинг камоли деб аямас кучин.
Ранжитса кечирар, олмагай ўчин,
Ҳақ талаб қилмагай хизмати учун,
Бахтли санамасин ўзини нечун?!
Ундан ўрганайлик вафодорликни,
Ундан ўрганайлик фидокорликни,
Ундан ўрганайлик ватандорликни,
Ундан ўрганайлик ҳаққа ёрликни,
Ундан ўрганайлик бахтиёрликни!
Кўзимизга суриб хоки пойини,
Уй тўрида тутиб унинг жойини.
Поёндозлар тўшаб атлас, шойини,
Дастурхонга кўйиб ширмой нонини,
"Онажон, сен менинг яғонам" дейлик!
"Дилдаги энг гўзал таронам" дейлик!
«Сен борсан дунёда-мен бахтлидирман,
Бошдаги тож ўзинг, мен тахтлидирман!
Сенинг дуонг билан мен аҳдлидирман,
Дунёда сен ўзинг яғонам» дейлик,
«Дилдаги энг гўзал таронам» дейлик,
«Онажон, сен менинг яғонам» дейлик!!!

09.03.15.



АРМУҒОН

Бир истагим бор сиздан дилдор,
Дунёларни кезайлик бирга.
Ҳақ сориға биргина йўл бор,
Ошноликда етайлик Сирга!
Сизга қалбим армуғон дилдор,
Меҳрим сизни чулғасин нурга!
Танҳо Ҳаққа бандалик қилиб
То қиёмат бўлайлик бирга!
Сизга жоним армуғон дилдор,
Дунё ўзи қоришган сирга.
Муҳаббатдан бахтимиз топиб
Талпинайлик илоҳий Нурга!
Сизга борим армуғон дилдор,
Дам ураркан Исрофил Сурга,
Ҳар гал бизни қўлласин Аллоҳ!
Жаннатда ҳам бўлайлик бирга!

18/07/2013-йил



*“Шашмақом” ансамбли раҳбари, Тоҷикистон
халқ ҳофиси Даврон Гулмуродовга*

Бир ариқдан сув ичганмиз Даврон билан,
Гоҳо шарбат, гоҳ қолганмиз айрон билан.
Шеърү ғазал бўстонида дил қонидан
Лавҳлар битдик, вале, юрдик замон билан.



Халқ хофизи бўлди бугун Даврон ака,
Ифтихорга тўлди бугун Даврон ака.
“Шашмақом”ни чорак аср эл ёдида
Сақлаб келди бахти бутун Даврон ака!

11.03.2012й.

ВАЛИЖОН МУСОЕВГА

Сенинг асли ярминг тожик, ярминг ўзбек,
Икки элни қадрлайсан худди ўздек.
Жисмингга мос исминг бордир Вали деган,
Ярашиқли, узукка жой бўлган кўздек.

11.03.2012й.

МЕҲР ҚАДРИ

Тош меҳр дунёда айландик тошга
Оқибат қолмади дўсту ёронда.
Ҳеч ким бир-бирини йўқламас бошқа,
Учрашувлар тўйда ё ресторанда.

Эшик таққиллатиб аҳвол сўраш йўқ.
Кибру ғурур бугун тож эрур бошга.
Муҳими устинг бут, қорнинг бўлсин тўқ
Эрк бериб яшаймиз баҳсу талошга.

Ҳаммамиз оқилу, ҳаммамиз доно,
Кимсан, буюқларнинг наслидандирмиз.
Биз каби тўра йўқ бу дунё аро,
Бизлар аслларнинг аслидандирмиз.



Биримиз саййиду, биримиз хўжа,
Баланддир бизларнинг шараф-шонимиз.
Бизлар оддий элдан фарқлимиз жуда,
Файзли, пурнеъматдир дастурхонимиз.

Бизлар чанд поғона юксалиб кетдик,
Эъвоздамиз шону шавкат бағрида.
Тўкин-сочинликнинг қадрига етдик,
Аммо, етолмадик меҳр қадрига.

04.10.2013

ЙЎЛИМИЗНИ БЕРИНГ, БИРОДАР!

Эй, биродар бу фоний дунё
Айтинг кимга қилибди вафо.
Дўстлигингиз истардик, аммо,
Бир калима ширин сўзингиз
Кўрмадингиз биз учун раво.
Меҳр тўла кўнглимиз билан,
Саховатли кўлимиз билан,
Ширу шакар шеъримиз билан,
Биз сиз сари интилдик, аммо,
Боқмадингиз биз томон ҳатто.
Англаб етдик, бизни севмассиз,
Молингизни бизга бермассиз.
Дилингизни бизга бермассиз.
Ҳиммат қилинг ҳаётда бир бор:
Йўлимизни беринг, биродар,
Йўлимизни беринг, биродар!

07 10 2011





*Раиш ноҳиясининг собиқ раиси мухтарам
Саидумрон Абдурахмонзодага*

Одамий бўлмаса ким
Сўз қадрин қайдан билсин.
Сўз қадрини билмаган
Ўз қадрин қайдан билсин?

Ўз қадрини билмаган,
Эл қадрини билурми?
Умрида йўл юрмаган
Йўл қадрини билурми?

Ким элдан қилса ҳазар,
Ҳақ ҳам этмагай назар.
Худбин бўлса ким агар,
Муродига етмагай.

Эл дегай: «Куч-бирликда,
Бирлашган доим ўзар».
Эл суйган раҳбар эрур
Саидумрони Назар!

28.11.2014йил.



Дўстим Ҳабибулло Дўстга

Тангри ҳар кимга ҳам этмагай насиб
Элга хизмат қилмоқ бахтини дўстим.
Ҳамсухбат бўлганда сиз билан ҳар гал
Тоғлардай юксалдим, тоғлардай ўсдим.

Сизда истеъдоднинг гавҳари мавжуд
Ушбу гавҳарни сиз авайлаб сақланг.
Одамшунос номин олганингиз рост
Истагим элу юрт ишончин оқланг!

01.09.2012-йил.

ОНА ЮРТИМ ТОЖИКИСТОНИМ

Боболардан мерос бу макон
Офтоб янглиғ жонбахш, сеҳрли.
Болам каби азиз, қадрдон,
Онам каби мушфиқ, меҳрли.
Алла айтиб улғайтди мени
Лутф айлади эркалаб, суйиб.
Иқболимдан қувонди доим,
Тоғдек ўсдим меҳрини туйиб.
Аҳд айладим: хизматин қилгум
Бобо юртим Тожикистонни.
Алишмасман мен дунёларга
Регарзамин-кутлуғ маконни!

Зеро шу юрт, шу она диёр,
Ободлиги олий орзумдир.
Дўстлик, тинчлик –менинг шиорим,
Аҳдга вафо эса қарзимдир! 05.06.2014

ЎТГАН ИШГА–САЛОВАТ

Бизлар дину диёнати бир хил миллат,
Ўртамизда қачон пайдо бўлди иллат?
Биз Иброҳим халилуллоҳ наслиданмиз
Ҳам Муҳаммад (с.а.в) пайғамбарга содиқ уммат!
Кимки бизнинг дўстлигимиз истамагай,
Иблис-ўша! Демак унга бўлгай лаънат!
Кўҳна Турон исломият бешигидир,
Шундан Дунё аҳли ҳануз қилар ҳурмат.
Кин, адоват ярашмагай мўъмин зотга,
Мўъмин бўлсанг бир-бирингга айла ҳиммат!
Етти марта Каъба тавоф айлагандан,
Бир мўъминнинг дилин олмоқ турар қиммат.
Бир хил эрур хатто тўю маъракамиз,
Бул ҳам бўлса Парвардигор берган неъмат!
Туронмизми, Туркистонми, Тожикистон-
Бизлар азал қондош, жондош бўлган миллат!
Динимиз ҳам дилимиз ҳам ягонадир,
Ола қараш бизларга ёт бўлган иллат.
Ғойиб сўзин оғир олманг оғаларим
Бағрикенглик, рафоқатда бўлинг ибрат!
Унутайлик адовату гиналарни,
«Ўтган ишга–саловат» деб, шудир суннат!

24.07.2013-йил



ҲИКМАТ

Ҳар инсоннинг ўз қараши, ҳулки ҳамда хислати бор,
Одамлардан олган сабоқ, хулосаю ҳикмати бор.
Кам эмасдир яралишда инсон зоти бир-биридан,
Мартабаси устун кимнинг муҳаббатга рағбати бор.
Икки дунё саодати насиб одам фарзандига,
Гар дилида иймон деган бебаҳо бир давлати бор.

2015 й.

ЗОРИМ БОР ЮРАҚДА

Зорим бор юракда, аммо зўрим йўқ,
Одиллик шиорим, бундан кўнглим тўқ.
Кимдир яхши одам, ким эса ёмон
Истагим барчаси бўлсинлар омон.
Разолат аҳлидан юрдим мен йирок,
Аҳли жўмардларга тан бергум, бироқ,
Камдир жўмардликни ихтиёр этган,
Аҳдига вафони дўст, ҳамроҳ тутган.
Гадоларни кўрдим – бошида тожи,
Англадим, бой улким, йўқ эҳтиёжи.
Ғалат экан одам аталган махлук,
Оллоҳ деб, шайтонга қилади қуллуқ.
Йўлим тўғри айла, этмагин маҳзун,
Инсон боласининг орзуси узун.
Барига гувоҳсан эй, қодир Эгам,
Дардим фориғ айла ўзинг мени ҳам.
Аллоҳим зикрингда зокир эт мени,
Нажот бер, тоатда моҳир эт мени.

18.05.2012 й.



**РАШТОНЗАМИН
ФАРЗАНДЛАРИ**

Аҳлиддини Ҳисорий-
Раштонзамин фарзанди.
Фақат оддий фарзандмас
Жигарбанди, дилбанди.

Саидумрони Назар
Кӯп тажрибали раҳбар.
Хушрафтору хушгуфтор
Ҳақ унга этмиш назар.

Зумрадхон ва Жамила
Раштонликлар фахридир.
Мадинаи Азимий-
Ифтихорга ҳақлидир.

Нурмат Маърифхон ака
Ибратдир садоқатда.
Нуриддину Айниддин
Дӯстлигу рафоқатда!

Ҳофиз Гулназар ака
Булбул каби хушовоз.
Диловари Мирзодан
Кӯшиқ айтар жуда соз.

Раштонзамин бағрида
Ҳисорийнинг тўйида-
Устоз Файзали Шукур,
Камина Ҳасан Ғойиб,
Абдуқаҳхори Қосим
Меҳмон бўлдик ажойиб!

28.11.2014йил.


УСТОЗ ЁДГОР ОБИДГА

«Аста хорғинлашиб бормоқда кўзим,
Аста ёруглашиб бормоқда ҳаво».
Бир умр курашдим порласин дея
Адолат қуёши Туркистон аро!
Наҳотки «ҳаммаси бўлади унут,
Куйиб-пишганларим, ёнишларим ҳам».
Наҳот яшаб ўтар қарори-сукут,
Абу Турк авлоди бир умр мулзам?!
Асло! Зое кетмас ҳеч бир ҳаракат,
Мудом турғунликда қолмагай дунё!
Имоним комилдир бўлажак шаксиз
«Тўлқинлар ортидан тўлқинлар пайдо!»

13.04.2013йил.

IX

Тули хандон кӯринмасму



- *Кўринмасму*
- *Санам*
- *Қоронгу оқшом чоғи*
- *Ул ёр хабардормикан*
- *Титраб турар бу эсонимиз*
- *Ошиқона*
- *Ховалинда*



ҒАЗАЛЛАР

КЎРИНМАСМУ

*«Менга шиқинг йўлида қон кўринур,
Юзинг ойинасида жон кўринур»*

Ҳофиз Хоразмий

Сахарда боғ аро кезсам, гули хандон кўринмасму,
Сарандозин сабо ўйнаб, жон ичра жон кўринмасму?
Дилим яйрар висолидан, кўзим қувнар жамолидан,
Кетолмасдан хаёлимдан, ўшал жонон кўринмасму?
Қаро тун қўйнида порлоқ, мисоли ой эрур моҳим,
Булутлар ичра гоҳида бўлиб пинҳон, кўринмасму?
Савол сўрсам суманлардан жавоб айтмоққа ор айлар,
Сирин фош айламасликка этиб фармон, кўринмасму?
Соғинч тиғи дилим ўртар, кутарга тоқатим етмас,
Менинг озурда жонимга бўлиб дармон кўринмасму?
Ғойиб, ишқни бало дерлар, на чоранг бор чидайдирсан,
Магар ишқ йўлида айтгил, жон ила қон кўринмасму?

24.03.09



САНАМ

Ҳар кеча ёдимга тушгай кўзлари шахло санам,
Боқиши жоним олиб, боз айлагай эҳё санам.
Боғима ташриф этиб лутф айласа ул моҳирўй
Гуллар ичра энг гўзал бўлгай ўшал раъно, санам.
Неча йилки ҳажрида овворадирман дар ба дар
Мажнун этди васлининг уммедида лайло санам.
Ул менинг жоним, жаҳоним, ул ягона матлабим
Истагим бўлса умрбод мен ила ошно санам.
Ғойибо, гар бўлса пок кўнглингдаги орзу ният
Ғайбдан нажот этиб бўлгай сенга шайдо санам.

25.03.09

ҚОРОНҒУ ОҚШОМ ЧОҒИ

Қоронғу оқшом чоғи кездим мисли девона,
Топаи дедим, изладим изларингдан нишона.
Оҳ қанийди топсайдим изларингнинг гардини,
Юзларимни босардим мен унга ошиқона.
Хазон қўшиқларини куйлаётган дарахтлар,
Шовуллашиб бўлдилар атрофимда парвона.
Ҳолим хабарин еллар айтдиму абрларга,
Кўз ёшларин тўкдилар мен каби ғарибона.
Васлинг қўмсаб эй жонон, Ғойиб бўлди саргардон,
Қилсанг бўлмасму эҳсон изингдан бир нишона.

2002





УЛ ЁР ХАБАРДОРМИКАН

Ҳажрида ўртанганимдан ул ёр хабардормикан,
Мен каби тунлар соғинчдан уйкусиз бедормикан?
Севгининг сирли тузоғи ўй-хаёлин банд этиб,
Йўлларимда интизору ошиғи дийдормикан?
Субҳидам эсган сабодан ишқ сабогин ўрганиб,
Субҳдан оқшомгача қилган иши такрормикан?
Мен унинг лаъли лабидан дилга малҳам истасам,
Киприги жонимга ханжар, зулфи тори дормикан?
Ғойибо, айт, бу жаҳонда тарки жон этмай туриб,
Маҳлиқонинг васлини кўрмоқ бахти бормикан?

2009.

ТИТРАБ ТУРАР БУ ЖОНИМИЗ

Мисли гул япроғидек титраб турар бу жонимиз,
Гарчи қисмат зарбидан қочмоққа йўқ имконимиз.
Гарчи бу дунёи дун ҳеч кимсага дўст бўлмагай,
Мангулик даъвосида ўтмоқдадир ҳар онимиз.
Бандаларга бу умр вақтинчалик сармоядир,
Истаган чоғ қошига чорлар яна Султонимиз.
Охират айёмида Тангри ўзи бергай мадад,
Тавба, истиғфор билан покласак иймонимиз.
Маърифатнинг нуридан бўлгай мунаввар кўнглимиз,
Аҳли диллар даврасида бўлса гар маконимиз.
Ғойибо, ихлос билан тутсанг ҳақиқат йўлини,
Охират мулкида ҳам обод бўлур кўрғонимиз.

2002

ОШИҚОНА

Висолига муштоқману, кўрай десам кўзим етмас,
Жамолига ошиқману, таърифлашга сўзим етмас.
Бунчалар ҳам кўп бўлмаса Ёрнинг нозу адолари,
Севганимни билиб туриб бир ишора, имо этмас.
Тонглар кутдим зор, интизор, йўлларми деб бир хушхабар,
Саҳар кезган насимлар ҳам аҳволимга парво этмас.
Шунчалар ҳам кўп эрурми менинг журму гуноҳларим,
Ёлборсам ҳам эртаю кеч, даргоҳига зорим етмас.
Ғойиб доим дуо айла, дуо ҳам бир ибодатдир,
Ҳадислардан далил борким, дуолар бесамар кетмас.

05.10.2009й.




Ховалинга бор экан обу ҳаволар хуш-хуш,
Сувларида дард учун бордир даъволар, хуш-хуш.
Султон Увайс Қароний ҳазратимнинг равзасин,
Ким зиёрат айласа топгай маънолар, хуш-хуш.
Худди жаннатдан нишон айлаб Худо бизлар учун
Ҳадя этмиш, арзига айтсак санолар, хуш-хуш.
Хушзабону хуш зеҳин мардумлари бу ўлканинг,
Кўнгли пок, ихлослари юксак, аълолар, хуш-хуш.
Йўл юриб, дунё кезиб ҳеч қайда мен учратмадим
Хуш ҳаво, хуш манзара, гўзал маъволар, хуш-хуш.
Ғойибо, ибрат учун ер юзин сайр айласанг,
Босган изингдан очилур гули раънолар, хуш-хуш.

30.04.06

IX

Ғарзона тоғ отағи



- *Машираб газалига мухаммас*
- *Ҳазиний газалига мухаммас*
- *Авлиёхон Эшон газалига мухаммас*
- *Ўлмас Жамол газалига мухаммас*
- *Ўлмас Жамол газалига мухаммас*
- *Саййид Неъматуллоҳ Иброҳим газалига мухаммас*
- *Асқар Маҳкам газалига мухаммас*



МУҲАММАСЛАР

МАШРАБ ҒАЗАЛИГА МУҲАММАС

Неча йиллар фироғида куйган сорбонларим келди,
Бобомлардан қолиб кетган қатор карвонларим келди.
Ота-онам етолмаган орзу, армонларим келди.
Намангон шаҳридан, дўстлар, менинг ёронларим келди,
Отам бирла онамни билгувчи меҳмонларим келди.

Боболар ҳасратин айтсам, замин титраб, куйгай офтоб,
Тарқалиб кетмиш алар кўнгли доғ, бағри кабоб.
Айрилиқнинг жабридан чеккан аламу изтироб,
Шижоат бобида ҳар қайсиси Рустаму Сухроб,
Адолат тахтига минган бу кун Султонларим келди.

Бу оламда ҳар бир ишга бўлғусидир сабаб, омил,
Озодликнинг насимидан саодатга бўлдик ноил.
Боболарнинг руҳлари шод, ҳамд айтмоққа тиллар мойил,
Иноятли, диёнатли яна ҳам муршиди комил,
Ҳама ориф, ҳама содик, ҳама ирфонларим келди.

Алар дийдорини кўргач, кетгай дилдан сиёҳ, Машраб,
Тангри ўзи раҳм айлаб боқди бизга қиё, Машраб.
Битгай ушбу мухаммасни Ғойиб ҳам бериё, Машраб,
Аларнинг хоки пойи кўзларимга тўтиё, Машраб,
Чироғимни мунаввар қилғучи ҳоқонларим келди.

03.03.2012 йил.



ҲАЗИНИЙ ҒАЗАЛИГА МУҲАММАС

Ёдинг ила бедорман жонона тонг отгунча,
Кӯчангда зор юргайман мастона тонг отгунча.
Энди менга ҳаловат бегона тонг отгунча,
Ҳижрон ўтига бағрим сўзона тонг отгунча,
Ўйлаб юрагим, жисмим бирёна тонг отгунча.

Ҳажрингда қон ютурман таҳаммул этолмасдан,
Дол бўлди тик қоматим, қаддимни тутолмасдан,
Сарсону саргардонман олисга кетолмасдан,
Мен Вомиқу Узро-сан, васлингга етолмасдан,
Ҳар кеча қароргоҳим остона тонг отгуна.

Кӯз ёшларим юволмас бағримдаги ғуборим,
Танҳо мақсудим ўзинг эй дилдаги туморим,
Дардимга бўлгин дармон, дилозор дилоромим,
Раҳм айла бу ҳолимга, эй кўзлари хуморим,
Ҳажрингда бу кўнгиллар вайрона тонг отгунча.

Ошиғи мубтолангман, тингласангчи зоримни,
Истасанг нисор этгум сенга йуғу боримни.
Васлингга ноил айлаб, олсанг олгин жонимни,
Ҳеч кимга деёлмасдан бу арз ила ҳолимни,
Қонга жигарим тўлди гирёна тонг отгунча.



Келсанг нетар кечалаб, нозу хиромон айлаб,
Ошиғларинг кўнглини бир бора шодон айлаб.
Ғойибдек бедилларни волаю ҳайрон айлаб,
Хилватда агар кўрсам, сирримни баён айлаб,
Сен бирла бўлай анда ҳамхона тонг отгунча.

То тирикман кўйингда юрак бағрим тиғларман.
Итасанг шайх Санъондек белга зуннор боғларман.
Пойингга тиз чўқмоққа ҳар дам ўзни чоғларман.
Найлайки иложим йўқ, ҳар гўшада йиғларман,
Тор ўлди Ҳазинийга Фарғона тонг отгунча.

25.03.2013йил.

АВЛИЁХОН ЭШОН ҒАЗАЛИГА МУҲАММАС

Май истаймиз ва лекин паймонани кўрмаймиз,
Сўзлашурмиз туну кун, ҳамхонани кўрмаймиз.
Ҳажрида куяр кўнгил, пинҳонани кўрмаймиз,
Ишқ келди- кўз бойланди, бегонани кўрмаймиз,
Етаклаб юр, девона, майхонани кўрмаймиз.

Ошиғу маъшуқликда фироқ бору висол йўқ,
Ҳуснига разм солсам кипригидан узар ўқ,
Гоҳо қошин чимириб зарда билан урар дўқ,
Шам бўлиб иккимиз ҳам тишладик ҳар кеча чўғ,
Қаноти чисирлаган парвонани кўрмаймиз.



Шавқим ортиб бородир ёрга интилган сари,
Ортидан чоғиб борсам ёр кетади илгари.
Жонни ўртаб юборди нозлари, хийлалари,
Бу дилнинг кўрғонига кирди ишқнинг лашкари,
Тош тегиб қон сачраган пешонани кўрмаймиз.

Ҳолимизга кулмагин эй, зоҳид, фикрингдан қайт,
Панду насихат қилма ўзгалардан ўқиб байт.
Ҳолимиз англаюрсан шу ҳолга тушганинг пайт,
Бошлама дарсхонангга, сабоғингни сувга айт,
Ишқдан ўзга мураббий, фарзонани кўрмаймиз.

Ишқ дардин қайдан билсин ғофилу қалби кўрлар,
Кўнгил қулфи очилгач, ошкор бўлгуси сирлар.
Гулдан тўшаб поёндоз, бошимдан сочиб дурлар,
Эшикларин ланг очиб, кел, деб чорлади хурлар,
Аммо юракдан ўзга ошёнани кўрмаймиз.

Васлин бир кўрай десам ёр олган юзин ўраб,
Жонни нисор этардим, қўйса агар бир қараб.
Мухаммас ёзди Ғойиб пирлардан дуо тилаб,
Эй Эшон, аҳли ошиқ бормадик ҳолинг сўраб,
Кўзинг сувиға чўккан остонани кўрмаймиз.

20.03.2012йил.



ЎЛМАС ЖАМОЛ ҒАЗАЛИГА МУҲАММАС

Офтоб юзинг сеҳрини самолардан сўрайман,
Унинг нури-тафтини ҳаволардан сўрайман.
Сарв қаддинг қадрини адолардан сўрайман,
Сочинг атрини қўмсаб, саболардан сўрайман,
Ширин-шакар лафзингни садолардан сўрайман.

Сомон йўли бу асли муборак изларинг деб,
Оламларни ёритган ой каби юзларинг деб.
Танамга руҳ бағишлар ошуфта сўзларинг деб,
Нега зиё таратгай бу қора кўзларинг деб,
Тун бағрида ярақлар Зухролардан сўрайман.

Мунаввардир бу олам маърифатдан, билимдан
Шукр қилгум ўзингга, зикринг тушмас тилимдан.
Йўл берган ҳам ўзингсан ҳам тутгувчи қўлимдан,
Нақши табассуминг бор оинаи дилимда,
Аммо яна кўрай деб раънолардан сўрайман.

Баъзида жўш урарман дил сиримни айтолмай,
Куйингда беқарорман, мақсудимга етолмай.
Ғойиб эмас ҳозирман, ҳузурингдан кетолмай,
Нозинг риёсини ёр, ҳеч нарсада тополмай,
Ушбу амални мавжи дарёлардан сўрайман.



Ҳажринг ўтида жоним, куйиб, ёндим, бўл огоҳ,
Ҳайрон бўлма, пойингга йиқилсам мен баногоҳ.
Ақлимни йўқотурман, сўзим адаштириб гоҳ,
Савдои севги сеҳри куйлатганидан огоҳ,
Тинглаганим нидони наволардан сўрайман.

Само менинг ҳолимга ҳайрон бўлиб ўзимдек,
Ғужғон-ғужғон юлдуздан маржон тўкар кўзимдек.
Ғойибдан келар садо худди менинг сўзимдек:
Ўлмасга эътиборли бўлгайми, деб ўзимдек,
Ишқинг ўтида куйган адолардан сўрайман.

11.07.2015.

ЎЛМАС ЖАМОЛ ҒАЗАЛИГА МУҲАММАС

Мени доим тўғри йўлга равон қил,
Мушкулларим арит, ишим осон қил.
Сарсон қилма сира, соҳиб макон қил,
Худовандо, имонимни омон қил,
Дағал этма тилим, ширин забон қил.

Ўзга ният дилимга тугмагайман,
Васлинг истаб юракни тиглагайман.
Даргоҳингда ҳасратдан йиғлагайман,
Ўзингдан бошқага бош эрмагайман,
Сенга бўлган ишончим бегумон қил.





Ҳисоб куни ёдга тушса баногоҳ,
Танам титраб, забун бўлурман ногоҳ.
Ўз ҳолимга ташлаб қўймагин, Аллоҳ!
Этиб куйма сира шайтонга ҳамроҳ,
Ҳақиқат йўлига доим равон қил.

Бани одам сафар чоғда-кетишда,
Беллашурлар Ҳақ сориға етишда.
Ушбу йўлда толмай одим отишда,
Сенга сидқу вафо зоҳир этишда,
Тинимни билмаган озурдажон қил.

Йўлимни бер Тангрим, йўлдан қайирма,
Манзилимга етиб олай тойилмай.
Ёлвораман мен ким, ожиз Ғойибман,
Мени асло диёнатдан айирма,
Буюк меҳрингга қалбим ошъён қил.

Не яхшилик келса билгумдир сендан,
Не хатолиғ ўтса, ўтгуси мендан.
Қувват кетмай аввал бу жисму жондан,
Чидайдурман на келса бошга сендан,
Бари банданг қатори имтиҳон қил.

Қаноатни бошимга айлагин тож,
Раҳм айла, коримга бергин ривож.
Бундан ортиқ давлат йўқдир, йўқ хирож,
Касу нокасларингга этма муҳтож,
Ечиб мушкулларим сеҳринг аён қил.

Кўнглим равшан нуринг ила эй, Моҳим,
Сенинг амринг, ҳукмларинг силоҳим.
Авф айлагин бор бўлса иштибоҳим,
Гуноҳим кўп ҳузурингда, илоҳим,
Кечиргил шафқатингдан армуғон қил.

11.07.2015.



САЙИД НЕЪМАТУЛЛОҲ ИБРОҲИМ ҒАЗАЛИГА МУҲАММАС

Кӯкда дил парвоз этар, осмон муборак бўлсин-эй,
Очса арш дарвозасин, кайҳон муборак бўлсин-эй.
Васлини кӯмсаб етилган армон муборак бўлсин-эй,
Эй муҳаббатлиғ кӯнгил, ҳижрон муборак бўлсин-эй,
Ўт аро бу топганинг имкон муборак бўлсин-эй.
Ишқнинг асрорига ҳар кимса ҳам етмас ишон,
Ғар саодат истасанг, билгил саодатдир шу он.
Ҳажрида куймоқ надир, айлагин ҳолинг баён,
Доманингга субҳидамда гул тӯкар маҳбуб ниҳон,
Чун димоғинг ичра хуш райҳон муборак бўлсин-эй.
Бешижоат бўлса ким, қолгай аро йўлларда руст,
Неча зотлар бўлди хор, рафторини этмай дуруст.
Довюрак бўл сен мудом, тоғларни теш, ғовларни буз,
Ким муҳаббатдан жудодир, ақли-жузъ, иймони суст,
Ақли куллар наздида иймон муборак бўлсин-эй.
Субҳи шом қилсанг дуо, пирларингни ёдда тут,
Мақсадинг ёр васли бўлса одатинг бўлсин сукут.
Дилдаги шубҳа, гумон илдизин буткул қурит,
Бок, бу хусрон дайрида виждон унут, иймон унут,
Кӯксинг ичра йиғлаган инсон муборак бўлсин-эй!
Бандалик қилгин мудом, тарк этмайин руҳи равон,
Дил эрур Ёр манзили мисли жон ичра бу жон,
Ғойиб ҳам дил розини Саййидига этгай баён:
Худшиносан коинот асрори ўзликда аён,
Дилда меҳвар истаган кайҳон муборак бўлсин-эй.

АСҚАР МАҲКАМ ҒАЗАЛИГА МУҲАММАС

*Чаман ичида бир гул,
Гул бир ён, чаман бир ён
Тўра Сулаймон.*

Дунё ажаб яралган аҳд бир ён, вафо бир ён,
Қисмат ўйинин кўринг раҳм бир ён, жафо бир ён.
Ёр ҳажрида бемормиз, дард бир ён, даво бир ён,
Мулки фано ичида шоҳ бир ён, гадо бир ён,
Зиндони ғам ичинда оҳ бир ён, сазо бир ён.

Биримиз ҳақ йўлида, адашганмиз биримиз,
Ажал қистовидамиз ҳоҳ ёшмиз, ҳоҳ қаримиз.
Яратганнинг қошига боргайдирмиз баримиз,
Ҳарчандким валиймиз ё ҳур ё паримиз,
Лек насли одамиймиз ҳақ бир ён, хато бир ён.

Жар солурмиз жаҳонга «Мавлоно пириимиздир»,
Қандай муридлигимиз пинҳона сиримиздир.

Оқибат якто: маҳшар йиғилар еримиздир,
Шайтон пириимиздир ҳам тийғу тийримиздир,
Ёхуд ҳар биримиздир, бад бирён, бало бирён.

Ҳар янги кун биз учун охирадан хабар бу,
Беш кунлик дунё надир? Имтиҳони башар бу.
Авжга чиқса шайтонлик қиёматдан асар бу.
Машшотаи азал бу, машшоқи бебасар бу,
Нохун кўлида хундир, савт бир ён, садо бир ён.

Ғойиб кўнгли дунёдан қолиб борар тобора,
Ўтди Асқар Маҳкам ҳам бағри бўлиб садпора.

Бунда ким ўйин ўйнар, ким чалади ноғора,
Бул шомни базморо май сун менга нигоро,
Бол тут тилингда жоно, соз бир ён, сато бир ён.

18.03.2012йил

XI

Шиким кўчалар юлдузларга



- *Ҳаё тимсоли*
- *Севдигу*
- *Ишонч*
- *Богбонқишлоқ ҳақида*
- *Чимилдиқ*
- *Маҳзун юрак нидолари*
- *Зебосанамга*
- *Баҳор келаётир*
- *Келмадинг*
- *Сен рақсга тушардинг*
- *Девонадек*
- *Йиглама*
- *Насиба*
- *Ишиқим кўчар юлдузларга*
- *Қайданам*
- *Ҳамон сени кўрсам*
- *Сен кетардинг*
- *Ёдингдами*
- *Биз топинган*
- *Сендан кетарканман*
- *Сенинг ўшал маъсум*
- *Сен бор эдинг*
- *Қисмат*
- *Сен келмадинг*
- *Оқшом согинчи*
- *Согинчларим*
- *Хайр бизга*
- *Танҳоликда*
- *Хафа бўлма*
- *Умидимнинг*
- *Чорак аср*
- *Сенсиз*
- *Куйган дилим*
- *Мен бир инсон*
- *Кезар эди*
- *Тунлар сенинг*
- *Кетар бўлсанг*
- *Савол*
- *Тилак*
- *Муҳаббат*
- *Яна юрак*
- *Сен борасан*
- *Кўнгил ва гул*
- *Қалбимда*
- *Кўзларингиз*
- *Согинганда*
- *Эй гул*
- *У дамлар*
- *Эсимдадир*
- *Қозоқ сулувиға*
- *Севги ўлани*
- *Илк севгим*
- *Кўзларингизда гар ёш кўрсам*
- *адо бўламан*
- *Умидимнинг гунчалари*
- *Лайло*
- *Бу кеча кел*
- *Муҳаббат кетмади*
- *Ишиқ дарди*
- *Ишиқ ўтида*



ҲАЁ ТИМСОЛИ

Хижолат тортгандек бўласиз гӯё
Қизариб кетади ёнокларингиз.
Чарос кўзларингиз тик боқмас сира,
Ийманиб сўзлайди дудоғларингиз.
Ҳаё тимсолини кўраман сизда
Мени асир этар ажиб туйғулар.
Сиз шунчалар масъум, сизни ўйласам
Қалбимда бокира шеърлар туғилар.

02.03.10г.



Севдигу севгидан сўзлашмадик биз,
Бирга қўл ушлашиб юрмадик хандон.
Ғамли лаҳзаларда бўзлашмадик биз,
Юраклар талпиниб турса ҳам чандон.
Йиллар ўтса ҳамки озурда дилим
Ҳамон талпинади жоним сен томон.
Соқовга айланар негадир тилим
Кўзим кўзларингга тушгани замон.
Ҳар гал қасди ортар азобнинг жонга,
Фақат алам бўлар бизнинг ҳаққимиз.
Гулим, ажралмайлик икки томонга,
Учрашиб қолганда энди иккимиз.

1986 й.



ИШОНЧ

Ишонгин баҳорлар келади,
Бир умр қолмасмиз даштларда.
Севгимиз дарахти унади,
Кўзлардан тўкилган ёшлардан.
Оташин ишқимиз тафтидан,
Ҳижроннинг даштлари ёнади.
Севгимиз дарахти шохига,
Биз кутган бахт қуши қўнади.
Бу қадим бевафо дунёда
Илк бора очилар ишқ гули.
Ошиқлар қўл очар дуога,
Биз бахтли бўламиз, севгилим.

2003

БОҒБОНҚИШЛОҚ ҲАҚИДА

Бу ерларда ёшлигим ўтди,
Илк севгимнинг азобин чекиб.
Бу ерлардан гўзаллар кетди,
Юрагимга наштарлар тикиб.
Бу ерларда содиқ сирдошим-
Кўхна чинор ўй сулар хануз.
Тушларига кирар эҳтимол,
Мени ташлаб кетган ўшал қиз.
Узун тунлар тинглаганман жим,
Дурбент сойнинг ғулувларини.
Мен севгандек севолмас ҳеч ким,
Боғбонқишлоқ сулувларини.

2002й.



ЧИМИЛДИҚ

Олисларга кетиб қолган ҳумо қушим
Сизнинг бирла учиб кетди ақлу ҳушим
Умрлик ёр атаганим ширин тушим,
Севгимизнинг чинлигини билиб қўйинг,
Чимилдиққа ундан тумор илиб қўйинг.

Минг тасаддуқ ишққа содиқ қолганларга.
Жазо бордир муҳаббатдан тонганларга.
Аҳд паймонлар айландиму ёлғонларга?
Севгимизнинг чинлигини билиб қўйинг,
Чимилдиққа ундан тумор илиб қўйинг.

Гарчи сизни мос кўрмади менга тақдир,
Бахтим қаро бўлса ҳам ки, кўнглим оқдир.
Унинг бир-ла бирга яшаб бўлинг бахтли,
Севгимизнинг чинлигини билиб қўйинг,
Чимилдиққа ундан тумор илиб қўйинг.

2001.



МАҲЗУН ЮРАК НИДОЛАРИ

Хомуш тортди дилнинг янгроқ садолари
Ўтди ёлғон муҳаббатнинг адолари.
Энди тунлар ишқ куйининг сеҳри эмас
Таралади маҳзун юрак нидолари.
Суйганларим, куйганларим тарк айлади,
Ёлғиз бошим савдоларга ғарқ айлади.
Умидимнинг гулин хазон, барг айлади,
Кўнгил уйим меҳмонлари–хатоларим.
Қайдан келди бу хиёнат – қора хатар,
Ўртамизда айриликдек савдо ётар.
Энди топган азобларим ўзим тортай,
Қолмади-ку бу жонимга фидоларим.
Дерлар, умр елдимдек елиб ўтгай,
Билмам қачон бу юракнинг дарди кетгай.
Армонларим икки дунёга ҳам етгай,
Тилда тошдек қотиб борар видоларим. 2002

ЗЕБОСАНАМГА

Бир зебосанамга бердим дилимни
Четда қолди мени севган дилдорлар.
Мен уни жонимдан севардим ортиқ
Ҳажридан дилимда қолди озорлар.

Бир зебосанамга бердим дилимни,
Энди ишқ ўтида ёниб, куяман.
Ҳавога совурди менинг кулимни
Мен уни барибир севаман.

30.10.2013-йил.



БАҲОР КЕЛАЁТИР

Баҳор келаётир мунис хотирлар,
Бир-бир елаётир хаёл кӯкида.
Баҳор келаётир сени хотирлаб,
Қўшиқлар битурман сенинг ҳақингда.
Баҳор келаётир муз қотган дунё,
Кўзини очмоқда аста уйқудан.
Қайноқ бир нафасни сезгандек гӯё,
Кўнгиллар уйғонар ширин туйғудан.
Нозларингни ая, сен ҳам эй гулим,
Қара, баҳор келар висолга ташна.
Кел, бирга бўлайлик, келгин, севгилим,
Кел, бирга яшайлик баҳордек яшнаб. 24.01.02.

КЕЛМАДИНГ

Баҳор келди қишдан, аёздан ўтиб,
Насимлар эдилар майин ва енгил.
Баҳор келди яна сени эслатиб,
Фақат сен келмадинг сочлари сунбул.
Қирларни қоплади яшил майсалар,
Ариқлар бўйида уйғонди ялпиз.
Сувлар тўйиб ундан олди бўсалар,
Фақат сен келмадинг соҳибжамол қиз.
Баҳор осмонига тикмоқ бўлиб дор,
Турналар олисдан келдилар омон.
Йўлингга кўз тутдим тунлари бедор.
Фақат сен келмадинг қошлари камон.
Интизор ҳовлимда гуллади бодом,
Кузатдим, гуллари кетди тўкилиб.



Мен умид гуллари тўкилган одам,
Сенинг йўлларингга қолдим тикилиб...

Май 2001.

СЕН РАҚСГА ТУШАРДИНГ

Сен рақсга тушардинг-гўзал вужудинг
Кўз-кўз қилган каби ноз-ла тўлғониб.
Мен эса ўзимни йўқотиб қўйиб
Қарашга қўрқардим, уятдан ёниб.
Сен рақсга тушардинг гўё қалбингда
Ишқ ўти қайтадан оловланганди.
Менчи, ўриндиқда хижолат чекиб,
Ўтира олмасдан каловланардим.
Сен рақсга тушардинг-гўзалдинг ғоят!-
Йиллар сени сира ўзгартирмапти.
Мен эса маҳлиё бўлиб, ниҳоят-
Сени қаттиқ севиб қолгим келяпти!

25.08.2014-йил



Девонадек юраман дайдиб
Кўчаларда мен кеч оқшомлар.
Хаёлимдан кетмайди сира
Сенинг бирла ўтказган дамлар.
Димоғимда сочларинг иси,
Маҳзун тунлар, интизор тунлар.
Тонг чоғида юлдузлар мисол
Дафтаримга тўкилар унлар.

01.06.2002.





Йиғлама, аягин ашкингни,
Илтижо ҳам қилма, «кечир» деб.
Қалбингда ёнган чўғ – ишқингдан
Кечмасман, сен мени кечиргин.
Беҳуда ўтказма фурсатни,
Қўз ёшинг томмасин йўлимга.
Қалбимда ёққанинг ишқ-ўтни
Мен ёқиб бораман ўлимга. 1986й.

НАСИБА

Сени телбалардек севардим
Аммо менга боқмадинг қиё.
"Ўлгунимча севаман" дердим
Телбалардек бўлиб маҳлиё.

Айро экан қисмат йўллари
Айро экан бизнинг тақдирлар.
Қай одамнинг бахтли қўллари
Бугун сени бахтла тақдирлар.

Мен телбанинг хаёлим қочди
"ЁҲу!" дедим, ўртандим ёниб.
Тангрим чин ишқ сирина очди-
Ва мен ичдим ИШҚ майин қониб.

Билгин, бир кун қиёмат келгай,
Чалингуси бурғулар, сурлар.
Менинг қутлуғ насибам бўлгай
"Чодирларда асралган хурлар".¹ 25.12.13.

1. «Рахмон» сураси, 72-оят.

ИШҚИМ КҮЧАР ЮЛДУЗЛАРГА

Сенинг қадди равонингга фидо бўлсин бу кўнгил.
Ғунча лабинг хандонига адо бўлсин бу кўнгил.
Висолингга хумор бўлиб кутгум сени дилором,
Ғар келмасанг йўлларингда гадо бўлсин бу кўнгил
Севги деган оташ бўлиб қуйдиришин билмабман,
Тушингда ҳам кўрмаганинг суйдиришин билмабман.
Ҳаёт-мамот сабоғини туйдиришин билмабман,
Ишқ йўлида майли ўздин жудо бўлсин бу кўнгил.
Кўзларингиз бунча гўзал, сеҳрлари кўп ёмон,
Сўзларингиз дилга ёқар жозибадор ва равон,
Нигоҳингиз юрагимга тиг уради беомон,
Ҳуснингизга бир умрлик шайдо бўлсин бу кўнгил.
Ғуноҳларим тўкилгайму қўлингиздан тутсам мен,
Вақт ўлчовин унутгайман, қачон сизни кутсам мен.
Ишқим кўчар юлдузларга, бу дунёдан ўтсам мен,
Сўнги дамда “севдим” деган нидо бўлсин бу кўнгил.

31.03.07



Қайданам кирдик биз бу гуноҳ йўлга,
Буйруқ бериб бўлмас экан кўнгилга.
Дунёни унутиб суҳбат қурамыз,
Тунлари боғларни тўлдириб сирга.
Бир зум кўришмасак юрак соғинар,
Энтикиб яшаймиз бир-биримизга.
Гарчи кеч бўлса ҳам учраштирди деб
Шукрона айтамыз тақдиримизга.
Қанча давом этар билмаймиз, аммо
Эҳтиросга тўла бизнинг муҳаббат.
Меҳримиз жўш уриб борар тобора
Билсак ҳам олдинда тўсиқлар қат-қат.
Мангулик олдида бу ҳаёт асли
Ўткинчи онлардан иборат фақат.
Қиймати бўлади вақтнинг қачонки
Унга ҳоким бўлса меҳру муҳаббат.

31.03.2007



Ҳамон сени кўрсам ўртанар юрак,
Ҳамон сени кўрсам лол бўлар тилим.
Неча бор аҳд қилдим унутмоқ керак,
Аммо тарк этмади ёдинг, севгилим!
Чорак аср умр кетибди ўтиб,
Ўтиб кетди неча баҳор, ёз ва қиш.
Ҳамон кечагидек сени севишим
Ҳатто, ўзимга ҳам туюлар эриш.
Ҳолимизга йўқдир ҳожати баён,
Қисмат шундай экан, шу экан тақдир.
Сочим оқарганда англадим аён:
Ишқ бизга имтиҳон-атойи Ҳақдир!

14.01.2015-йил





СЕН КЕТАРДИНГ

Сен кетардинг ойдек тўлғониб
Ногоҳ ортга нигоҳ ташладинг.
Карахт эдим, кетдим уйғониб
Беихтиёр юра бошладим.
Сен боқмадинг ортга қайрилиб
Кетавердинг нозланиб жонон.
Қолмай дея сендан айрилиб
Кетавердим ортингдан нолон,
Эҳ, қанийди бир умр шундай
Кетаверсам сени кузатиб.
Кетаверсам кечаю кундуз
Қўлларимни сенга узатиб.
Кўзга суртиб пойинг гардини
Суронларга бўлиб юзма-юз.
Эртаю кеч сенинг ортингдан
Кетаверсам сен-ла изма-из.

2001



ЁДИНГДАМИ

Ёдингдами илк учрашувлар
Ўшал ширин висол онлари.
Яшилликка бурканган олам
Навбаҳорнинг гўзал шомлари.
Кундузлари офтоб, тунлар ой,
Гувоҳ эди бизларнинг аҳдга.
Оламларга бахш этиб чирой
Бизлар тимсол бўлгандик бахтга.
Самоларда сузган абрлар
Товланарди оппоқ ва мовий.
Ёғар эди майин ёмғирлар,
Шивирлашиб сирли, самовий.
Осмон узра солиб арғимчоқ
Турналар ҳам бизни қутларди.
Қалдирғочлар териб кўзмунчоқ
Бизга бахтнинг қасрин тикларди.
Аммо, ўтди умр баҳори
Навбаҳорнинг ёмғири янглиғ.
Дилда қолди севги озори,
Дилда қолди хотира-мунглиғ.
Букун ғамгин боқар борлиқ ҳам,
Офтоб хира, ой эса синган.
Осмондаги булутлар-кулранг,
Мовий рангин йўқотиб қўйган.

26.04.2014-йил



Биз топинган ишқи азал
Энди менга дор бўлдими?
Мен ардоқлаб суйган гўзал
Ўзга ёрга ёр бўлдими?
Аҳдлашгандек баҳор чоғи,
Ишқ сеҳридан адо бўлиб.
Ваъдалари кўкка ўрлар
«Ёр-ёр» деган садо бўлиб.
Сеп йиғарди онажоним
«Келинга» деб сандиқ- сандиқ.
Куйганимдан бағрим аро
Излар колди чандиқ-чандиқ.
Ё, Раб, бу не жудоликдир,
Эс-хушимдан айрилдим мен.
Бу не бахти қароликдир
Бахт қушимдан айрилдим мен.
Тақдир ҳукми шундай бўлса,
Ўшал ёр-ла яшаб кетсин.
Фақат, айтинг бевафо ёр,
Юрагимни ташлаб кетсин...
Орзулаган ишқи аввал
Энди менга дор бўлдими?
Ошиқ Ғойиб ишқ кўйида
Йиғлаб, йиғлаб зор бўлдими?!

12.02.2013йил.



Сендан кетарканман дил оғрир,
Дарахтлар кузатар хўрсиниб.
Шамол изиллайди, куяди ёмғир,
Афтода ҳолимдан ўксиниб.

Сендан кетарканман йўлақлар
Чўзилиб боради тобора.
Қайдасиз эй ёруғ тилақлар,
Соғиниб йиғлайман дил- пора.

Сендан кетарканман, севгилим,
Олдинда не кутар билмайман.
Айбимми, мен сени севганим?
Севмасдан мен яшай олмайман!

Сендан кетарканман, ўйларим
Хазондек тўзғийди ҳар томон.
Бир ҳазин айрилиқ куйлари
Қалбимни ўртайди беомон.

24.12.08





Сенинг ўшал маъсум қиёфанг
Хаёлимдан кетмайди дилбар.
Сен кетдингу кўнгил уйимни
Эгаллади андуҳ ва қадар.
«Мен севаман» шу қизни дея
Айтолмадим онажонимга.
Ўйлабмидим ахир ўшанда
Ўт кетишин хонумонимга.
Чорак аср ўтса ҳам, эй қиз
Хаёлимдан кетмайди ёдинг.
Самоларга ўрлайди ҳануз
Ошиқ дилнинг маҳзун фарёди. 13.02.2011



Сен бор эдинг, мен бахтли эдим,
Гўзал эди борлиқ ҳам жуда.
Ўтказардик гўзал тунларни
То тонггача суҳбат авжида.
Мовий осмон, зангори шафак,
Туғар эди оппоқ тонгларни.
Ҳадя этар эди қуёш ҳам
Камалакдек турфа рангларни.
Ўтиб кетди, қайтмагай энди
Гўзал тунлар, у оппоқ тонглар.
Сочларимга қировлар инди,
Юрагимни қоплади занглар.
Кўкрагимни эзади бир ғам,
Ҳижрон тиғи дилни чавақлар.
Сени эсга солар ҳали ҳам,
Мовий осмон, зангор шафаклар. 15.02.2011



ҚИСМАТ

Ҳижрон ханжарлари суякка етди,
Тақдирнинг зарблари юракка етди.
Оҳ урдим, оҳларим фалакка етди,
Нечун сенга менинг зорим етмайди?
Ишқинг деб қалбимдан сочдим ёғдулар,
Мақсудим бол эди, ичдим оғулар.
Оқибат қуюлди ҳазин туйғулар:
“Тақдир ишқ жомини менга тутмайди”.
Хазон фаслидаман, ўтди баҳорим,
Жоннинг қасдидаман, кетди қарорим.
Дорнинг остидаман, эй гўзал ёрим,
Нечун юрагимдан доғинг кетмайди?

2002.

СЕН КЕЛМАДИНГ

Ишқ–бало даштида оввора бўлдим,
Андухларга тўлди сабр соғари.
Кўнгил чаманида гунчалар сўлди,
Аммо, сен келмадинг, мени ахтариб.
Мажруҳ юрагимни анордек тилиб,
Осмоним тарк этди феруза ранглар.
Шаблар нола қилдим куйиб, ўртаниб,
Зухра чалиб берди ҳазин оҳанглар.
Ҳижрон оташида кул бўлди таним,
Тупрокка қорилдим хазондек ғариб.
Танҳо ўзинг эдинг зор-зор кутганим,
Аммо, сен келмадинг, мени ахтариб.

2002



ОҚШОМ СОҒИНЧИ

Кундуз шомга беланди,
Кўкда ҳилол кўринди.
Шундай гўзал оқшомда
Ёлғизлигим билинди.
Рўй кўрсатди юлдузлар-
Самовий гўзал қизлар.
Қаердасан, юлдузим
Қалбим сенга йўл излар.
Оқшом шамоли елар,
Тол барглари ҳилпирар,
Соғинч ўртаган бағрим
Баргдек ерга тўкилар.

2002.



Соғинчларим қолди сарғайиб,
Кўзларимнинг қароғларида.
Тунлар кездим мижжа қоқмайин,
Маъюс кўнглим чорбоғларида.
Армон тоши майдалаб эди,
Юрагимнинг қабатларини.
Танҳоликда сенсиз ўтказдим,
Гул умримнинг соатларини.
Тийра дилга бахш этар роҳат,
Изтиробли севги лаззати.
Ўлганда ҳам ўлгумдир фақат,
Сен томонга қўлим узатиб.

2002



ХАЙР, БИЗГА

Хайр, бизга этмади насиб
Бирга яшаш бахти, севгилим.
Ўзни ҳижрон дорига осиб
Кетмоқдаман, хайр, эй гулим.
Гарчи севар эдик биз чиндан,
Туйғулар ҳам эди бокира.
Қисмат юзин ўгирди биздан,
Ёлборсак ҳам боқмади сира.
Зоримиз кўп, зўримиз етмас,
Илож йўқдир, қилмай итоат.
Дунё подшоҳ, маслаҳат этмас,
Ўз ҳукмини ўтказар фақат.
Балки бир кун пайт келиб яна,
Учрашармиз иккимиз такрор.
Муҳаббатсиз хор бўлган дунё,
Севгимизга бўлганда иқрор.

2002

ТАНҲОЛИҚДА

Не ошиқ кунларни сенсиз яшадим,
Ҳижрон даштларида кечди йўлларим.
Руҳим рангларидан сўзлар ясадим,
Шеър бўлиб қуюлди бор хаёлларим.
Аммо сен келмадинг қошимга, гўзал,
Гарчи чорак аср севдим девона.
Наҳотки ишқ менга қисматдир азал,
Насибам ўтмоқлик ёлғиз, ягона?

2002.





Хафа бўлма дўстим, азалдан,
Муҳаббатнинг кўзлари ожиз.
Тунлар эзилсанг ҳам азобдан,
Тақдирга тан бермоқлик жоиз.
Ошиқлик ҳам буюк бир бахтдир,
У ҳар кимга этмайди насиб.
Ўлдирса ҳам ўлдирсин тақдир,
Муҳаббатнинг дорига осиб.

2003.



Умидимнинг гуллари сўлди,
Узун ҳижрон кечаларида.
Армонларим дарахтдек унди,
Боғбонқишлоқ кўчаларида.
Келин бўлиб ойдек нурафшон,
Ўзга уйни тўлдирдинг нурга.
Мен дардимни айтдим ҳар оқшом,
Содиқ дўстим кўҳна чинорга.
Гул умримнинг шаън онларига,
Ўз ҳукмини ўтказди тақдир.
Боғбонқишлоқ шўх сойларида,
Аламларим сув бўлиб окди.
Жононларнинг меҳр кўрида
Овутдим мен телба жисмимни.
Лекин ҳамон қалбим тўрида,
Авайлайман сенинг исмингни.

2001



Чорак аср ўтса ҳамки,
Сўнмас ошиқ дил хумори.
Сени ҳар гал кўрганимда
Тебранади кўнгил тори.
Оҳ, афсуски, ўшал дамлар
Қайтиб келмас энди ортиқ.
Агар қайтса умрим жамлаб
Қилар эдим сенга тортиқ.

2003.

СЕНСИЗ

Шум қайғунинг қора қушлари,
Ишғол этди кўнгил боғимни.
Кундуз ўйлар, тунлар тушларим
Емиради юрак-тоғимни.
Осмонимни қоплади ғамнинг
Булутлари саф- саф тизилиб.
Сўнмоқдадир умидим шами,
Тоқат ипи борар узилиб.
Чор тарафдан қилади таъқиб
Ўшал масъум оташ нигоҳлар.
Соғинч номли қобикдан чиқиб,
Юрагимда кўқарар оҳлар.
Сенсиз кезсам йўллар ҳам ҳатто,
Қайларгадир кетар қайрилиб.
Билганимда ўшанда асло,
Кетмас эдим сендан айрилиб.

08.02.2002.





КУЙГАН ДИЛИМ

Куйган дилим яролари асло битмас,
Юрагимдан илк севгимнинг доғи кетмас.
Осмонларга етган зорим сенга етмас,
Висолингга эртаю кеч зор бўламан,
Агар кўнсанг сенга содиқ ёр бўламан.
Кўнгил иши кимларгадир ўйин экан,
Чин севгининг савдолари қийинэкан.
Аммо унинг азоблари ширин экан
Висолингга эртаю кеч зор бўламан,
Агар кўнсанг сенга содиқ ёр бўламан.
Не тиласам тилагумдир яратгандан,
Молу дунё сўрамасман гўзал, сендан,
Гарчи тақдир айро солди сени мендан,
Висолингга эртаю кеч зор бўламан,
Агар кўнсанг сенга содиқ ёр бўламан.

02.12.2001.



*«Эй, гулим, кўзларга ёшлар тўлганда
Соямиз кушилган дамларни эсланг»*

Шавкат Раҳмон

Мен бир инсон эдим меҳрга ташна,
Тақдир иккимизни учраштирганда.
Сен келдинг баҳорий гул каби яшнаб,
Кўнглим қувончларга тўлди ўшанда.



Афсус, яшолмадик бир бутун бўлиб,
Хижрон қасдимизда қайради тиғлар.
Ўртамизда унди айрилиқ гули,
Мунгли хотиралар қалбимни тиғлар.
Сен бирла иккимиз бирга бўлганда,
Қалбимда яшарди энг ёниқ ҳислар.
Энди хотиралар хуруж қилганда
Яшайман ул бахтли дамларни эслаб.

10.09.04



Кезар эди кўкда ой,
Ёлғизгина ойжамол.
Деразадан бир аёл
Боқиб турар ғамгин, лол.
Ойнинг сариқ сочлари,
Осмон узра таралар.
Аччиғ хижрон ёшлари
Аёл қалбин яралар.
Тун бағрида гўзал ой
Кезар эди тўлғониб.
Йиғларди ойдек аёл
Ёлғизликдан қийналиб.

2002.





Тунлар сенинг ёдингла ўтар,
Сени эслаб отар тонгларим.
Юрагимни соғинчлар ўртар,
Фақат сенга етмас зорларим.
Ишқ деб ўргилади бу жоним,
Ишққа йўғрилади бу жоним.
Сени қўмсаб ўтар кундузим,
Кузатаман қўмсаб шомларни.
Сенинг ҳижронингда, юлдузим
Мен ўтказдим қанча онларни.
Ишқ деб ўргилади бу жоним,
Ишққа йўғрилади бу жоним.
Сенинг ёдинг билан, эй жонон,
Менга ҳаёт туюлар мангу.
Гарчи васлинг бўлса ҳам армон,
Мангуликни топдим, не қайғу?
Ишқ деб ўргилади бу жоним,
Ишққа йўғрилади бу жоним. 2007.



Кетар бўлсанг илтимос дилдор,
Хотирангдан ўчир исмимни.
Кўриб қолсанг қилма эътибор,
Кўча-кўйда кезган жисмимни.
Севгимизни афсона деб бил,
Эсламагин бирор сўзимни.
Ахир, сенсиз мен кимман, айтгил?
Эслолмайман ҳатто ўзимни! 03.03.2003.



САВОЛ

Наҳот изсиз кетди у гўзал онлар,
Наҳот унут бўлди у илоҳий сир.
Наҳот ёшликдаги аҳду паймонлар
Саробга айланиб кетдилар бир-бир.

Яшамок мумкинми лоқайд, беқайғу,
Дош бериб хижроннинг азобларига.
Бахт дея аталмиш муқаддас туйғу
Қолдими дунёнинг каззобларига?

Қисматку айирди, жоним, бизларни.
Тингла, сенга бордир менинг саволим.
Наҳот қалбингдаги нафис ҳисларни
Олиб кетган бўлса вақтнинг шамоли.

Ёки яшаяпсан кўникиб сўзсиз,
Ҳақ билиб манглайга битилган йўлни.
Наҳот яшаш мумкин севгисиз, ҳиссиз,
Армон чангалига тутқазиб дилни?!

07.09.2003.



ТИЛАК

Бу кун тақдир тугунлари ечилади,
Сизга бахтнинг эшиклари очилади.
Пойингизга ишқ гуллари сочилади,
Сизга бўлар бу дунёнинг имконлари.

Уйингизга тўлар қувонч чечаклари,
Қўлида гул табрик айтар дўстлар бари.
Маст қилади бу гулларнинг мушқ, анбари,
Гулга тўлар бу дунёнинг осмонлари.

Ҳавас қилар сизга дунё ошиқлари,
Янграганда илк бор алла қўшиқлари.
Тебранганда илк бор гўдак бешиклари
Унут бўлар бу дунёнинг армонлари. 2003.

МУҲАББАТ

Кўнглимни риштасиз боғлаган,
Қалбимни мунаввар айлаган,
Дунёда бир мени сайлаган
Ўзингсан муҳаббат, ўзингсан.
Дилимга шеър ишқин жойлаган
Гоҳ қийнаб, гоҳида сийлаган,
Куну тун мен ёниб қуйлаган
Ўзингсан муҳаббат, ўзингсан.
Сен ёруғ бир нурсан, ҳеч сўнмас.
Қай дилга ўт ёқсанг кам бўлмас.
Шеъримга сабабчи мен эмас,
Ўзингсан муҳаббат, ўзингсан. 07.12.2005



Яна юрак бўзлар, юрак ўртанар,
Яна янгиланди дилнинг яраси.
Ох, нечун мен сени учратдим, дилбар,
Энди тинчлик бермас кўнгил ноласи.
Гарчи шак келтирмам сира қисматга,
Аммо менда мавжуд битга эътироз:
Нечун чин ошиқлар етмас муродга,
Нечун ҳақиқий ишқ топмагай эъзоз?!

07.09.2003.



Сен борасан, шамоллар ўйнар
Сенинг ҳарир кўйлақларингни.
Менинг эса ўтмоқда умрим,
Пойлаб сенинг йўлақларингни.
Сен борасан, жонланар ерлар,
Жозибали қадамнинг бўйлаб.
Мен ёзаман ғамгин сатрлар,
Йўлларингда келишинг пойлаб.

2002.





КҮНГИЛ ВА ГУЛ

Менинг подшоҳ кўнглимни
Гадо айлади бир гул.
Кўксимдаги қумримни
Шайдо айлади бир гул.
Ўтса ҳам неча баҳор,
Ўтса ҳам неча ой, йил.
Гулни кўмсаб тунлари
Зор-зор йиғлайди кўнгил.
Дерлар ишқ ёш танламас
Унга тенгдир шоҳ, гадо.
Мени севмаган гулнинг
Ҳажрида бўлдим адо.

14.03.2003.



Қалбимда ястанди хижроннинг чўли,
Дилимни тарк этган муҳаббат гули.
Менга муносибдир танҳолик йўли,
Сен мени севаман, демагил, гўзал.
Бир вақтлар бўлганман мен ҳам шўх, шодон,
Меҳру муҳаббатга ташна эди жон.
Умрим заҳарлади бир гўзал жонон,
Сен мени севаман демагил, гўзал.
Не-не савдоларни ўтказдим бошдан,
Кўзларим дарёси қуриди ёшдан,
Кўксимда доғ қолган бир қалам қошдан,
Сен мени севаман, демагил, гўзал.

3.07.02



Кўзларингиз бунчалар маъюс
Кўрсам эзилади юрагим.
Кўзларингиз бунчалар маъюс,
Борми менинг сизга керагим?
Кўзларингиз бунчалар маъюс,
Хаддим сиғмас кўпроқ боқишга.
Юрагимни қийнайди бир ҳис
Ҳаёт менгзаб бормоқда тушга.
Кўзларингиз бунчалар маъюс,
Кўзларимдан сизмоқда ашким.
Сизни шундай ҳолатга солган
Бевафога келади рашким.
Кўзларингиз бунчалар маъюс,
Мафтун бўлдим мен сизга жуда.
Сиз шунчалар гўзал ва масъум,
Мен кўрқаман бўлмоқдан жудо.

22.04.07



Соғинганда тунлари бедор,
Сени эслаб ёнаман дилдор.
Юрагимда сенинг аксинг бор,
Келгин жоним, ёнимга келгин.
Билсанг ҳаёт эмас абадий,
Чин дунёга элтгувчи водий.
Севилмоғу севмоқ табиий
Келгин жоним, ёнимга келгин.
Бу очунда муҳаббат нима,
Суронларда изғиган кема.
Соғинтирдинг мени ёрим-а,
Келгин жоним, ёнимга келгин
Очиқ экан то икки кўзим,
Сени жондан севаман ўзим.
Фақат сенга айтгум дил сўзим,
Келгин жоним, ёнимга келгин.

2001



Эй гул, менинг ноламсан, озоримсан,
Армонимсан, юракдаги зоримсам.
Тушларимга ойдек кирган ёримсан,
Туморимсан, бўйнимдаги туморим.
Ҳижронингда бамисоли қизғалдоқ. –
Кўксим алвон-алвон ранглиғ, бағрим доғ,
Осмон қора тортар агар чексам оҳ,
Ғуборимсан, бағримдаги ғуборим.
Сени мендек бирор ошиқ суймаган
Васлинг қўмсаб фироғингда куймаган.
Чорак аср мени ўртаб, қийнаган,
Хуморимсан, кўнглимдаги хуморим.

2003

У ДАМЛАР

У дамлар биз бошқача эдик
Бироз содда ва лекин ўктам.
Эзгуликка ошно эдик,
Уйғун эди юрак билан тан.
У дамлар биз бошқача эдик.
Умидларга тўла дилимиз.
Биз ҳаётни жуда севардик,
Юлдуз каби ёруғ йўлимиз.
У дамлар биз бошқача эдик
Муҳаббатдан сармаст ошиқлар.
Ҳануз дунё кенгликларида
Янграр бизлар айтган кўшиқлар.

12.01.07й



Эсимдадир оқшом чоғи
Учрашгандек сой лабида.
Бирдан шаррос ёмғир ёғиб
Яшириндик тол тагига.

Чуғур-чуғур этиб қушлар
Бахтимиздан қувнар эди,
Висолингга тўймай ёмғир
Тинмаса деб ўйлар эдим.

Сочларингни қўлинг билан
Ушлаганча ерга боқиб,
Ширин-шакар тилинг билан
Сўзлар эдинг дилни ёқиб.

Биз севардик, унутгандик
Оқшомдан сўнг келган тунни,
Ҳали хануз қўмсар юрак
Ўшал ёмғир ёққан кунни.

2010



ҚОЗОҚ СУЛУВИГА

Ҳамон юрак қўмсар орзиқиб,
Эслаганда ҳислар авж олар.
Тунлар мени кетар оқизиб
Хотиранинг жўшқин мавжлари.
Шодон эдик ишқ баҳорида
Гувоҳ эди серёмғир шаҳар.
Олма гулин хуш ифоридай
Қалбимизда яшнарди баҳор.
Бу кун бизни тарк этган висол,
Бўзлар дилда ғамнинг ўлани.
Олатовнинг тоғлари мисол
Йўлларимиз кетди бўлиниб.
Туш кўраман овуллариғни,
Сени қўмсаб кўзи қийиғим.
Лекин ҳижрон довулларида
Ғарқ бўлади умид қайиғим.

2002.



СЕВГИ ЎЛАНИ

Исмингга мос кўзларинг ҳам жайрон эди
Кўйингда мен кеча кундуз ёнар эдим.
Сен бўлмасанг армонларда қолар эдим,
Қозоқ элин эрка қизи қайда қолдинг?
Олис юртда менга ишқдан шароб тутган,
Юрагимни бир умрга асир этган.
Кетар бўлсам келишимни зор-зор кутган,
Қозоқ элин эрка қизи қайда қолдинг?
Ишқинг оловида ёндим, чақин бўлдим,
Бўзтўрғайдай ўлан айтиб оқин бўлдим.
Элингнида севиб, унга яқин бўлдим
Қозоқ элин эрка қизи қайда қолдинг?
Кезиб чиқдим поёни йўқ Қипчоқ даштин,
Қимиз ичиб сурдим роса ёшлик гаштин.
Тулпор миниб қирлар ошдим, довон ошдим,
Қозоқ элин эрка қизи қайда қолдинг?
Дардим айтсам ҳатто осмон келади тор,
Такдир ҳукми висолингга айлади зор.
Юрагимда буюк севги ўлани бор
Қозоқ элин эрка қизи қайда қолдинг?

2003



ИЛК СЕВГИ ДОСТОНИ

Сутдек оқ либосга бурканган борлиқ
Зар янглиғ ялтирар қор учқунлари.
Менинг дилим эса бесаранжом, зик
Қордай парча-парча бўлган ўйларим.
Лайлак қор ёғарди ялтираб майин,
Иккимиз илк бора сайр қилган он.
Ким фикр қилибди йил ўтган сайин
Ғунча баҳоримиз топишин хазон.
Барча йигит-қизлар қилишиб ҳавас
Сўзлар эди бизнинг ишқий дostonдан.
Сен ҳам бу ҳислардан гўё эдинг маст,
Мен ҳам гул терардим шеърӣй бўстондан.
Кунлар шу тахлитда ўтарди, бироқ,
Ўртамизда унди қора тиканлар.
Сўнди икки қалбда порлаган чироқ,
Қолди юракларда чексиз армонлар.
Ҳеч нарса бўлмади ўзгалар учун
Бир севги достони тугади шундай.
Сенинг юрагингни билмадим лекин
Қалбимда илк севгим ҳамон ўшандай.

1984й.



КЎЗЛАРИНГДА

Олма-ота кўчаларин кезиб дар, ба-дар
Сенинг мунис хаёлингла яшаб юраман.
“Бахтсизман” деб ўртанмагин, ўртанма дилбар
Кўзларингда гар ёш кўрсам адо бўламан.
Бахт нимадир? Борми унинг ўлчови, фоли?
Ё у хаёт китобининг мангу саволи.
Бу дунёда ким яшайди қайғудан холи,
Кўзларингда гар ёш кўрсам адо бўламан.
Дардларингга ҳамдард бўлмас ҳар кас, ҳар нафар
Бир кун шодсан, бир кун сени кучмайди зафар.
“Шунақа денг?”-сўроқларинг қалбимни ўртар,
Кўзларингда гар ёш кўрсам адо бўламан.
Хаёлимда эртаю кеч ўзингсан, дилдор,
Исминг эса тилимдадир такрор ва такрор.
Сени эслаб тунларим ҳам ўтади бедор,
Кўзларингда гар ёш кўрсам адо бўламан.
На илож, ёр, сен турган жой менга ҳам ватан,
У чорласа кучоғига қайтиб бораман.
Йиғламагин, кўриб қолсанг мени дафъатан,
Кўзларингда гар ёш кўрсам адо бўламан.

1990й.



Умидимнинг ғунчалари хазон бўлди,
Сенинг валинг менинг учун армон бўлди.
Юрагимда бино қилган ишқ қасрининг
Устунлари қулаб, ўзи вайрон бўлди.
Энди менга бегонадир ишқ куйлари
Дилим эзар оғир-оғир ҳис, ўйларим.
Тушларимга кириб чиқар бахт тўйларим,
Тўйлар армон, армонларим осмон бўлди.
Бошим олиб узоқларга кетгум нетай,
Қаландарлик ҳассасини кўлга тутай.
Сен бахтли бўл, майли мен тоқ, ёлғиз ўтай,
Сенинг бирла қолиш менга гумон бўлди.

2003й.



ЛАЙЛО

Кўпдан сени эсламас эдим,
Яна пайдо бўлдинг йўлимда.
Оҳ, мен сени не учун севдим?
Ишқ ўт олди яна дилимда.
Чорак умрим ўтказдим гирён,
Йўлларингда интизор кутиб.
Ўзга ёр-ла яшадинг шодон,
Неча йиллар мени унутиб.
Тағдиримга берган эдим тан,
Унутмоғни қилган эдим аҳд.
Пайдо бўлдинг йўлимда қайдан,
Менга насиб этмаган, эй бахт?!
Кўпдан сени эсламас эдим,
Пайдо бўлдинг кўнглим боғида.
Оҳ, мен сени не учун севдим?
Адо бўлдим ишқинг доғида.

03.05.2007й.



Бу кеча кел менинг ёнимга,
Малҳам бўлгин менинг жонимга.
Мардлик қони оққан қонимга
Жоним бир тун ўзингни бахш эт,
Юрагимга сувратинг нақш эт.

Баҳслашайлик ҳаёт ҳақида,
Севги-гўзал баёт ҳақида.
Биздан қолар фарёд ҳақида
Жоним бир тун ўзингни бахш эт,
Юрагимга сувратинг нақш эт.

Сен пари бўл, мен бўлай мафтун,
Сен Лайли бўл, мен эса Мажнун.
Юраклардан кетсин мунглиғ ун,
Жоним бир тун ўзингни бахш эт,
Юрагимга сувратинг нақш эт.

25.02.2001й.



МУҲАББАТ КЕТМАДИ...

Баҳор ўтиб кетди, ёз ўтиб кетди,
Умрим - барги хазон куз, ўтиб кетди.
Дўстлар юрагимни муз этиб кетди,
Муҳаббат кетмади, кетмади.
Юлдуз каби сўнди умидим дилда,
Баъзан омад куши кетганда қўлдан.
Телбадек адашдим мустақим йўлдан,
Муҳаббат кетмади, кетмади.
Бугун руҳим синик, порадири жисмим,
Бир қисмим умиддир, армон бир қисмим.
Дилимда яшайди муборак исминг,
Муҳаббат кетмади, кетмади.
Сут билан кирса не жон билан чиқар,
Аммо ишқ савдоси йиқитар, йиқар.
Умрим боғларида куз чодир тикар,
Муҳаббат кетмади, кетмади.

06.08.05



ИШҚ ДАРДИ

Дилим шод, умримда осойишталик,
Измигга бўйсуниб қолганди омад.
Лекин сени кўргач чекинди шодлик,
Бошимга келди ишқ дарди - қиёмат.
Армон-кўҳна дўстим, ўртар бағримни
Рухимни тарк этди осойишталик.
Гарчи ўкингандим дилдан неча бор,
Аразлаб кетди деб мендан ошиқлик.
Гуссага ботсамда ботайин танҳо,
Оллоҳнинг ишқида дегандим бот-бот.
Йиғласам йиғлайин кўйида ҳақнинг,
Истасам истайин жамолин фақат.
Бугунчи қошингда турибман, дилбар,
Дунёда мен каби хор, оввора йўқ.
Аҳдингда шеър ёзиб юрибман, дилбар,
На қилай дардимга ўзга чора йўқ.

2012-йил



Ишқ ўтида куйиб ёнишлар,
Интилишлар ҳам ўртанишлар.
Соғинчларга тўла қарашлар
Бизга армон бўлади наҳот?

Икки юрак –икки саргардон,
Икки жуфт кўз-икки кадрдон,
Икки ошиқ вужуд-икки жон
Энди сарсон бўлади наҳот?

Бизлар юрган сўкмоқлар, йўллар,
Иккимизни асраган йиллар.
Ишқимиздан яралган куйлар
Элга дoston бўлади наҳот?

Кетай десам “уф” тортар хонам,
Пойим ўпиб йиғлар остонам.
Дунёларга бермас кошонам
Энди вайрон бўлади наҳот?

2003й.

Ҳасанбой Ғойиб

Ҳаёт Беланчаги

Мусаҳҳех: *Сирожиддин Фахриддин*

Саҳифа боғловчи: *Фарҳод Раҳимов*

Оро берувчи: *Алишер Алимардонов*

Ҳарф терувчи: *Наргиза Ғойибова*

Босишга рухсат этилди 02.01.2016. Бичими 60x84¹/₁₆. Офсет қоғози.

Офсет босмаси. Times New Roman Tj гарнитураси.

Нашриёт ҳисоб табағи 18,0. Нашр адади 700 нусха.

Буюртма №484. Баҳоси келишилган нарҳда.

ЧДММ “Андалеб Р”.

734036, Душанбе шаҳри, Р. Набиев кучаси, 218.

Тел: (+992 37) 233-17-17. E-mail: andaleb.r@mail.ru